

ÇE YƏHYA

NƏQL KARDƏ ŞOYƏ XƏBƏ

VƏSƏ

«Çe Yəhya nəql kardə Şoyə Xəbə» İsa bənə zolə Kəlomi təğdim kardeydə. «Kəlom bəşər be, de lutfi iyən həğiğəti pur be, çəmə arədə vırəbəvırə be» (1:14).

Kitobədə nişo karde gəzinə in Şoyə Xəbə jıqo nıvıştə bıə ki, handəkəson imon biyən bə İsa vəd kardə bıə Xıloskor iyən çe Xıdo Zoə bey, Deçəy nomi bə jimoni molik bıbun (20:31).

İsa bənə Xıdo zolə Kəlomi təğdim kardə iminə ayon bəpeştə kitobədə həməən Çəy xıdməti barədə nəql kardə beydə. In xıdmət çe İsa vəd kardə bıə Xıloskor iyən çe Xıdo Zoə bey nişo doydə. Nişo kardə bıə əloməton iyən mecuzon de izoh kardə nıtğon mişoyət kardə beydən. Kitobi in hissə nişo kardeydə kali odəmon çoknə bovə kardışone bə İsa iyən Çəy dəvoməkon bin, əmandəyon isə Bəçəy vəynə beşin iyən bovə nıkardışone Bəy. 13–17-nə semonədə esə boy çe İsa qətə şəvi Deştə şoqirdon bıə neze unsiyət iyən jə qəp bə gələm sə bıə. İsa bə çomex kəşə nıbə bənav Bəştə şoqirdon dılvandı doydə iyən çəvon əhvoli şo kardeydəbe. Oxonə semonon isə çe İsa qətə iyən məhkum bey, bə çomex kəşə bey, bəyji bey iyən bəyji bey bəpeştə bə şoqirdon çıye təsvir kardeydə.

Yəhya, de Məsihi vositə bə insonon bəxş kardə bıə zolə jimoni roy nişo kardeydə. Bə İsa ro, həğiğət iyən jimoni gəzinə imon vardəkəson in zolə jimon doə beydə. Çe Yəhya nəql kardə Şoyə Xəbə fərgin kardə cəhət əve ki, İsa ruhani dəqəron de ov, nun, qələvon iyən pəson, rəz iyən anqı gəzinə ifodon vositə oşko kardeydə.

Kitobi məzmun:

1:1-18 İsa çe Xıdo Kəlome

1:19-51 Vəftizəvon Yəhya şəhodət iyən çe İsa iminə şoqirdon

2:1–12:50 Çe İsa xıdmət

13:1–19:42 Çe İsa Yerusəlimədə oxonə rujon

20:1-31 Rəbbi bəyji bey iyən bə insonon çiyəy

21:1-25 Rəbbi Qalileyədə tıkror çiyəy

Xıdo Kəlom

1 Sıftədə Kəlom hestbe, Kəlom de Xıdobe iyən Kəlom Xıdobe. ² Əv sıftəku de Xıdobe. ³ Har çiy Deçəy vositə ofəyəy iyən ofəyə bıəyon hiç qıləyni Beəy ofəyənin. ⁴ Jimon Bəykube iyən in jimon bo insonon nurbe. ⁵ Ruşnə zılmotədə nur səğandeydə, zılmoti isə ebarde nıznəşe əv.

⁶ Çe Xıdo vıgəndə qıləy odəm hestbe, çəy nom Yəhyabe. ⁷ Əv şoydəti kardeyro bə məydon beşe ki, Nuri barədə şoydəti bıkə iyən həmməy deçəy vositə bə imon bon. ⁸ Əv ıştən Nur nıbe, intasi oməy ki, Nuri barədə şoydəti bıkə. ⁹ Im Nur həğiğiye Nurbe iyən oməy bə dınyo bə həmə insonon həğiğiye nur doşe. ¹⁰ Əv dınyoədəbe, Deçəy vositə ofəyəy dınyo, əmma dınyo nıznəşe Əv. ¹¹ Oməy Boştə xəlgi, əmma Çəy ıştən xəlgi gəbul nıkardışe Əv. ¹² İntasi har kəsi ki gəbul kardışe Əv, imon vardışe Bəçəy nomi, Əy ixtiyor doşe bəçəvon həmməy ki, əvon çe Xıdo fərzəndon bıbun. ¹³ Əvon nə xuno, nə cısmoniye orzuyo, nəən merdi piyəyo, əncəx Xıdo bə jimon oməyn.

¹⁴ Kəlom bəşər be, de lutfi iyən həğiğəti pur be, çəmə arədə səbəso be, əmənen vindımone Çəy ehtişom, Pıəku omə vohidə Zoə ehtişom. ¹⁵ Yəhya şəhodət kardışe Çəy barədə iyən car kəşəşe: «“Çımı bəpeştə Oməkəs başe çımısə, çumçiko çımısə bənav hestbe”, iməha, ə Şəxs ki, az Çəy

barədə qəp jəydəm». ¹⁶ Əmə həmməy Çəy mıbofətiku lutfi səpe lutf səmone. ¹⁷ De Musa vositə Ğanun doəbe, de İsa Məsihi vositə esə boy lutf iyən həğiğət oməy. ¹⁸ Hiç kəsi hiç vaxti vindəşni Xıdo, əmma hejo de Pıə bə ico bıə vohidə Zoə oşko kardışe Əv.

Çe Yəhya şəhodət

¹⁹ Imha, Yəhya kardə şəhodət. Yəhudi rəhbəron Yerusəlimo vığandışone kahinon de Levivijon çe Yəhya tonu ki, bıparsın çəyku: «Tı kiş?». ²⁰ Əy rosti votışe, etirof kardışe: «Az Məsih nim». ²¹ Əvon parsəyn Yəhyaku: «Bəs tı kiş? Ğavər İlyasiş?» Yəhya votışe: «Xəyr, əv nim». Parsəyn: «Ğavər omənin bıə peyğəmbəriş?» Əy votışe: «Xəyr». ²² Çəyo votışone bəy: «Bəs tı kiş? Çı cəvob bıdəmon bə əməni vığandəkəson? İştə barədə çiç voteydəş?» ²³ Əy votışe:

«“Az daştədə car kəşəkəsi sədom,
həmo bıkən Rəbbi roy”

çoknə ki Yeşayə peyğəmbəri votəşbe».

²⁴ Vığandə bıə kali fəriseyon ²⁵ parsəyn Yəhyaku: «Bəs tı Məsih, İlyas, yaan omənin bıə peyğəmbər nişbo, boçi vəftiz kardeydəş?» ²⁶ Yəhya cəvob doşe bəvon: «Az de ovi vəftiz kardeydəm, əmma şımə arədə qıləy Şəxs heste ki, şımə Əy zıneydənişon. ²⁷ Çımı bəpeştə omənin bıəy Əve, əmma az hiç loyiğ nim Çəy şıməbandiyən bo okardey». ²⁸ In hodison ru İordani bə tərəfədə bıə Betanyədə, çe Yəhya vəftiz kardə vırədə bıəbin.

²⁹ Maşkinə ruji Yəhya vindeədə ki, İsa omeydə çəy tonu, jıqo bəyon kardışe: «Çe dınyo qınoro ğırbon bıə Xıdo Pəsəvə ime! ³⁰ “Çımı bəpeştə qıləy Şəxs omeydə ki, Əv başe çımısə, çumçiko çımı bənav hestbe”. Imeha, ə Şəxs, az Çəy barədə qəp jəydəm. ³¹ İştən Əy zıneydənıbım, əmma Çəy bə İsraili zahir beyro az oməym de ovi vəftiz bıkəm». ³² Yəhya şoydəti kardışe: «Vındıme ki, Ruf osmono bənə kafe epərəy mande Çəy səpe. ³³ İştən Əy zıneydənıbım, əmma de ovi vəftiz kardeyro mını vığandəkəsi İştən votışe bəmi: “Ruf çiki səpe epəro bımando, bızın ki, de Mığəddəsə Rufi vəftiz bıke Əve”. ³⁴ Azən vındıme iyən şoydəti kardıme ki, “Əve Xıdo Zoə”».

Çe İsa iminə şoqirdon

³⁵ Maşkinə ruji Yəhya ijən əyo deştə dıqlə şoqirdi ivirədəbe. ³⁶ Əv edyəsəy vındışe İsa dəvardeydə çəyo, votışe: «Xıdo Ğırbonə Pəsəvə, Ime!» ³⁷ Həmonə dıqlə şoqirdi məsəşone çəy sıxanon, şin çe İsa dumo. ³⁸ İsa odyəsəy bə dumo, vındışe ə dıqlə şoqird, votışe bəvon: «Bəşmə çiç lozime?» Əvon votışone bə İsa: «Rabbi, Tı konco mandeydəş?» «Rabbi» sıxani mənə «Mıəllim» votəye. ³⁹ İsa votışe bəvon: «Boən Demı, bəvindeşon». Əvon şin vındışone çe İsa mandə vırə iyən həmonə ruji mandin Deəy. Çoştəsəy saat ço ərafəbe. ⁴⁰ Yəhyaku İsa barədə məse bəpeştə İsa dumo şə çə dıkəsi qıləyni Simon Peteri boə Andreybe. ⁴¹ Andrey sıftə şe pəydo kardışe ıştə boə Simon, votışe bəy: «Əmə pəydo kardımone Məsih». «Məsih» sıxani mənə «Məşh kardə bıəy» votəye. ⁴² Əy vardışe ıştə boə çe İsa tonu. İsa edyəsəy bə Simoni votışe: «Tı Yəhya zoə Simoniş, əmma Kefa votə bəbe bəti». Kefa iyən Peter sıxani eyni mənə doydə – çəvon mənə sığe.

⁴³ Maşkinə ruji İsa piyəşe bışu bə Qalileyə viloyət. Əy pəydo kardışe Filip votışe bəy: «Boy Çımı dumo». ⁴⁴ Filip Betsaydə şəhrobe, Andrey iyən Peterən çəvrəyjbın. ⁴⁵ Filipi pəydo kardışe Natanael votışe bəy: «Pəydo kardımone çe Musa Tovratədə nıvıştə, peyğəmbəronən bəhs kardə həmonə Şəxs – Yusifi Zoə Nazaretijə İsa». ⁴⁶ Natanaeli votışe bəy: «Məqər Nazareto qıləy çokə çiy bebəşe?» Filipi isə votışe bəy: «Boy ıştən bıvınd». ⁴⁷ İsa vındışe Natanael omeydə bədi Əy, jıqo votışe çəy barədə: «Im əsıl İsrailije ki, dılədəş hilə ni». ⁴⁸ Natanael parsəy: «Tı çikonco zıneydəş mını?» İsa cəvob doşe bəy: «Filip tını sədo nıkardə bənav Az inciye doy bınədə vındıme tı». ⁴⁹ Natanaeli votışe Bəy: «Rabbi, Tı Xıdo Zoəş, Tı İsraili Podşoş!» ⁵⁰ İsa cəvob doşe bəy: «Tı bı səbəb imon vardeydəş ki, Az votıme bəti inciye doy bınədə vındıme tı? Çımonsə həniyən yolə

çiyon bəvindeş». ⁵¹ İjən votışe: «Rosti, rosti voteydəm bəşmə: bəvindeşon osmoni obey iyən Xıdo mələkon Bəşəri Zoə səpe epərey iyən bə osmon pepərey».

İsa ovi bə şərov peqordıneydə

2 Dı ruji bəpeştə çe Qalileyə Qana diədə vəyə hestbe. Çe İsa moən əyobe. ² İsa iyən Çəy şoqirdon bə vəyə dəvət kardəşonbe. ³ Şərov orəxeədə İsa moə votışe Bəy: «Çımon şərov orəxe». ⁴ İsa votışe: «Moə, çiçi piyeydə az bıkəm? Hələ Çımı vaxt oməni». ⁵ Çəy moə votışe bə xıdmətəvonon: «Əv bəşmə çiç bivoto, əyən bıkən».

⁶ Yəhudiyon pok be mərosimi dəvoniyeyro əyo har qıləyni dı-se pamyə ov qətə şəş qılə sığə çəlləq hestbe. ⁷ İsa votışe bə xıdmətəvonon: «Çəlləqon de ovi pur bıkən». Detosə qəvi pur kardışone əvon. ⁸ Əy votışe bə xıdmətəvonon: «Esə kamişi peqətən, bıbən bo vəyə sərxeəy». Əvonən bardışone. ⁹ Sərxeəy çəşəşe bə şərov peqordıniyə biə ovi. Əv zıneydənibe çikonco vardəşone im, əncəx ovi vardə xıdmətəvonon zıneydəbin. Sərxeəy sədo kardışe tojəbəq, votışe bəy: ¹⁰ «Har kəs çokə şərovi sıftə doydə, şərov vey peşomə bey bəpeştə çok nıbəy doydə. Əmma tı bo esəti oqətə çokə şərov».

¹¹ İsa çe Qalileyə Qana diədə İştə in iminə əloməti nişo kardışe iyən İştə izzəti oşko kardışe. Çəy şoqirdonən imon vardışone Bəy. ¹² Çımı bəpeştə Əv Deştə moə, boon iyən şoqirdon bə ico şin bə Kafernaum, mıddəti mandin əyo.

İsa sərrofon məbədo tojneydə

¹³ Çe Yəhudiyon Pasxə id nez beydəbe. İsa şe bə Yerusəlim. ¹⁴ Vındışe əyo neqo, pəs, kaftə həvatəkəson iyən sərrofon niştən məbədi soədə. ¹⁵ Peqətışe jiyə tumo kardışe ğırmoc, deəy tojnişe əvoni həmməy məbədo, həmçinin pəson iyən neqon, peqordınişe çe sərrofon mizon, ekardışe çəvon pulon bə zəmin, ¹⁶ bə kaftə həvatəkəsonən votışe: «İmoni peqətən çıyo! Çımı Pıə kəy bə vijor oməqordınən!» ¹⁷ Şoqirdon bəştə yod vardışone nıviştə biə in sıxanon, «İştı kəy ğıryət Mını bəsute-ebəvoşne».

¹⁸ Çəyo Yəhudi rəhbəron parsəyn Çəyku: «De kon əloməti bəmə nişo karde bəzineş ki, İştı imoni bo karde səlohiyəti heste?» ¹⁹ İsa cəvob doşe bəvon: «In məbədi pevışkınən, Az bə se ruj sənibəton əy bərpo bəkardem». ²⁰ Bəvədə Yəhudi rəhbəron votışone: «In məbədi bə çılı şəş sor dutə biə, Tı bə se ruj əy bərpo bəkardəş?» ²¹ İntasi İsa məbədi voteədə İştə andomi nəzədə qəteydəbe. ²² İsa çe mardon dilədə bəyji beədə şoqirdon bəştə yod vardışone Çəy in sıxanon, əvon bovə kardışone bə Mığəddəsə Nıviştəyon iyən bə İsa votə sıxani.

²³ Pasxə idədə İsa Yerusəlimədə beədə, Çəy nişo kardə əloməton vındə vey odəmi imon vardışe Bəçəy nomi. ²⁴ Əmma İsa etibo kardeydənibe bəvon, çumçiko həmə odəmon dılı zıneydəbe. ²⁵ Ehtiyoci nıbeşe odəmon barədə kiysə Bəy jıçiy bivotı, çumçiko insoni dılı fikiron zıneydəbe.

İsa iyən Nikodim

3 Fəriseyon dılədə Nikodim nomədə qıləy Yəhudi rəhbər hestbe. ² Əv şanqo oməy çe İsa tonə, votışe: «Rabbi, zıneydəmon ki, Tı Xıdoku omə qıləy ustodiş. Hiçki İştı kardə əloməton nişo doy əzini, şayət Xıdo de ə şəxsi nıbo». ³ İsa cəvob doşe bəy: «Rosti, rosti voteydəm bəti: şəxsi ki sənibəton zandə nıbo, Xıdo Podşoəti vınde əzini». ⁴ Nikodim parsəy Çəyku: «Sinin biə qıləy odəm çoknə sənibəton moəo bey bəzine? Əv bəzine diminə kərə bəştə moə bolo dəşe ijən moəo bey?» ⁵ İsa cəvob doşe: «Rosti, rosti voteydəm bəti: şəxsi ki, ovo iyən Rufo zandə nıbo, bə Xıdo Podşoəti dəşe əzini. ⁶ Bəşəro zandə bıkəs bəşəre, Rufo zandə bıkəs rufe. ⁷ Təəccub məkə Çımı bəti “sənibəton zandə bıniniş” votəy. ⁸ Ruf bənə vavaziye ıştə piyə vırədə qıneydə, çəy sədo məseydəş, əmma zıneydəniş çikonco ome, bə kovrə şe. Rufo zandə bıkəsi holən jıqoye».

⁹ Nikodim parsəy: «İmon çoknə be bəznen?» ¹⁰ İsa votışe bəy: «Tı İsraili mällimiş. Çoko bedə imoni zıneydəniş? ¹¹ Rosti, rosti voteydəm bəti: əmə iştə zınəyon voteydəmon, bəştə vindəyon şoydəti kardeydəmon, əmma şımə Çəmə şəhodəti ğəbul kardeydənişon. ¹² Qirəm Az boşmə zəminisə bəyonku voteədə bovə kardeydənişonbu, osmonədə bəyonku bivotom çoknə bovə bəkardeşon? ¹³ Hiç kəs bə osmon rost bənəni, ğərəyz osmono omə Bəşəri Zoə. ¹⁴ Musa daştədə mori rost karde ğəzinə, Bəşəri Zoən rost kardə bənəni ki, ¹⁵ Bəy imon vardə har kəs bə zolə jimoni molik bıbu».

¹⁶ Oxo Xıdo bəşəriyəti jıqo piyəşe ki, İştə vohidə Zoə doşe, bə səbəb imi kardışe ki, Bəy imon vardə har kəs tələf nıbu, əmma bə zolə jimoni molik bıbu. ¹⁷ Xıdo bəşəriyəti mihokimə kardeyro ne, Deştə Zoə vositə xılos kardeyro vığandışe Əv bə dınyo. ¹⁸ Bəy imon vardəkəs mihokimə kardə beydəni, imon nıvardəkəs isə həni mihokimə bıə, çumçiko bə Xıdo vohidə Zoə nomi imon vardəşni. ¹⁹ Mihokimə əve ki, bə dınyo nur oməy, əmma insonon vey piyəşone toyki nurisə, çumçiko çəvon əməlon şərbın. ²⁰ Bəvəci kardə har kəs bə nuri nıfrət kardeydə iyən bə nuri tərəf nıbome ki, çəy əməlon bə oşko benışun. ²¹ Bə həğiğəti əməl kardəkəs isə bə nuri tərəf omeydə ki, çəy əməlon Xıdo piyeyro kardə bey bəlli bıbu.

Yəhya şəhodət kardışe İsa barədə

²² Çimi bəpeştə İsa iyən Çəy şoqirdon oməyn bə Yəhudəyə məhol. İsa mıddəti deyəvon mande əyo, vəftiz kardeydəbe odəmon. ²³ Yəhyan Salimi neziyədə bıə Aynonədə, ov vey bıə vırədə vəftiz kardeydəbe. Odəmonən omeydəbin, vəftiz beydəbin. ²⁴ Hələ dənoəşonnıbe Yəhya bə zindon.

²⁵ Bı vaxti pok be barədə həsbəhs eqıniye çe Yəhya şoqirdon iyən qıləy Yəhudi arədə. ²⁶ Şoqirdon oməyn Yəhya tonon votışone: «Rabbi, ru İordani bə tərəfədə iştı tonon bıə iyən iştı Çəy barədə şəhodət kardə Şəxs, iməha, İştən vəftiz kardeydə iyən həmməy şeydən Çəy tonon». ²⁷ Yəhya cəvobədə votışe: «Bə insoni osmono doə nıbo, əv hiçiy səy nıbəzne. ²⁸ İştən şoydişon bəçımı sıxani “Az Məsih nim, əncəx Çəysə bənav vığandə bım”. ²⁹ Vəyu əncəx bə tojəbəqi məxsuse. Əmma tojəbəqi çəş kardə iyən bəy quş doə dustən tojəbəqi sədo məsədə vey şo beydə. De jıqoy, çımı şoyvo həniyən vey be. ³⁰ Esət Bəy yol bey, bəmi ruk bey qərəke».

³¹ Ərşo Oməkəs həmməysə barze. Dınyoku bıə şəxs bə dınyo məxsuse iyən dınyo barədə bəvotə, osmono Oməkəs isə həmməysə barze. ³² Əv İştə vində iyən məsəyon barədə şoydəti kardeydə, əmma hiç kəs Çəy şəhodəti ğəbul kardeydəni. ³³ Çəy şəhodəti ğəbul kardəkəsi mıhi jəşe ki, Xıdo bərhəxe. ³⁴ Əve ki, Xıdo vığandə Şəxs, Xıdo kəlonon bəvotə. Çumçiko Xıdo Bəy Rufi behəd doydə. ³⁵ Pıə piyeydəşe Zoə iyən doəşe har çiy Bəçəy ixtiyor. ³⁶ Bə Zoə imon vardəkəsi zolə jimon bəbeşe, bə Zoə itoət nıkardəkəs isə jimon əvindini, Xıdo ğəzəb çəy səpe mandeydə.

İsa iyən Samariyəviyə jen

4 Bə İsa bəlli be ki, fəriseyon məsəşone, Əy Yəhyasə həniyən veyə şoqird qırdə kardəşe iyən vəftiz kardəşe, ² hərçənd, İsa İştən ne, Çəy şoqirdon vəftiz kardeydəbin. ³ Bəvədə İsa tərəq kardışe Yəhudəyə, şe bə Qalileyə. ⁴ Əv Samariyə məholiku dəvardənınbe. ⁵ Əv oməy bə Samariyə Sixar nomədə bıə şəhr. In vırə Yağubi navkonə vaxtonədə bəştə zoə Yusifi doə zəmini neziyədəbe. ⁶ Yağubi kandə çol əyobe. Roy sıst kardəşe İsa, əve nışte çoli tonon. Çoştosəy saat donzə ərəfəbe.

⁷ Qıləy Samariyəviyə jen çolo ov bekıniyəro oməy. İsa votışe bəy: «Bəmi ov bıdə, peşomım», ⁸ Çəy şoqirdon bo hardıhəş hıriyəyro bə şəhr şəbin. ⁹ Samariyəviyə jeni votışe Bəy: «Tı qıləy Yəhudiş, az esə boy Samariyəviyə jen. Tı çoknə çımıku ov piye bəzineş?» Oxo Yəhudiyon mij qəteydənini de Samariyəviyon. ¹⁰ İsa cəvob doşe bəy: «Qirəm tı zınəbəy çe Xıdo bəxşiş iyən

“Bəmı ov bıdə, peşomım” votəkəsi ki bey, tı ıştən əpiy Çəyku ov, Əvən bəti jimoni ovi ədəy». ¹¹ Jeni votışe Bəy: «Əğə, ıştı bo ov bekırniye qıləy ğabı niy, çolən nıǵıle. Bəs ə jimoni ovi çikonco pebəqəteş? ¹² Bəqəm Tı çəmə pıə Yağubisə həniyən başış? Əy doəşe in çol bəmə, deştə zoon iyən mol-məlon çı çolo ov peşoməşe». ¹³ İsa cəvob doşe bəy: «In ovi peşomə har kəs ijən təşi bəqəte, ¹⁴ əmma harki Çımı doə ovo peşomo, hiç vaxti təşi nıbəqəte. Çumçiko Çımı bəy doə ov çəy dilətonədə bə zolə jimon doə ovi səvon pebəqarde». ¹⁵ Jeni votışe Bəy: «Əğə, ə ovi bəmı bıdə ki, az hiç vaxti təşi nıqətım iyən iyo bo ov bekırniye nıvom».

¹⁶ İsa votışe bə jeni: «Bışı, sədo bıkə ıştə şuyə iyən boy iyo». ¹⁷ Jeni votışe Bəy: «Çımı şuyəm ni». İsa votışe bəy: «Tı rost voteydəş “Çımı şuyəm ni”. ¹⁸ Çumçiko ıştı penc qılə şuyə bıə, esət detı jiyəkəsən ıştı şuyə ni, tı imi rost voteydəş». ¹⁹ Jeni votışe Bəy: «Əğə, az vindeydəm ki, Tı peyğəmbəriş. ²⁰ Çəmə dədə-bobon bı bandədə ibodət kardəşone, əmma şımə Yəhudiyon voteydəşon ki, ibodət kardeyro qərəkə vırə Yerusəlimədəy». ²¹ İsa votışe bəy: «Ha jen, bovə bıkə Bəmı, həni ə vaxt rəsə ki, nə bı bandədə, nəən Yerusəlimədə ibodət bəkardeşon bə Pıə. ²² Şımə zıneydənişon bə çiçi səcdə kardeydəşon, əmə isə zıneydəmon bə çiçi səcdə kardeydəmon, oxo xılos Yəhudiyonkuy. ²³ Əmma ə vaxt omeydə iyən həni oməy ki, bə Pıə həğiǵiyə ibodət kardəkəson ruhən iyən həğiǵətədə ibodət bıkən. Pıən nəveydə Bəştə bo jıqo ibodət kardəkəson. ²⁴ Xıdo, Rufe iyən Bəy ibodət kardəkəson ruhən iyən həğiǵətədə ibodət kardəninin». ²⁵ Jeni votışe Bəy: «Zıneydəm ki, “Məsih”, yəni məsh kardə bıə Şəxs bome iyən Əv omeədə bəmə har çi y bəyon bəkarde». ²⁶ İsa votışe bəy: «Əv, Azim detı qəp jəydəm».

²⁷ Hejo bı vaxti çe İsa şoqirdon oməyn, vindeədə ki, Əv qəp jəydə de qıləy jeni, hədəyon mandin, əncəx hiçki nıvotışe «Tı çiçi piyeydə?», yaanki «Boçi qəp jəydəş de im jeni?» ²⁸ Bımədə jeni noşe ıştə səhənq bə zəmin iyən şe bə şəhr, votışe bə odəmon: ²⁹ «Boən, bıvindən çımı kardə əməlon həmməy bəmı votə ə Odəmi. Ğasbu Məsih hejo Əve?» ³⁰ Odəmonən beşin şəhro, oməyn İsa tonə.

³¹ Bı ləzədə şoqirdon əjo kardışone Çəyku: «Rabbi, xorək bəhə». ³² İntasi İsa votışe bəvon: «Bəmıku jıqo qıləy xorək heste ki, şımə zıneydənişon». ³³ Bəvədə şoqirdon parsəyn iyəndıku: «Məqər kiysə xorək vardışe Boəy?» ³⁴ İsa votışe bəvon: «Çımı xorək, Mını Vıǵandəkəsi irodə bə vırə rosniyey, Çəy koy bə sə jeye. ³⁵ Şımə “bo diveni ço manq mandə” voteydənişon? İmha, Az voteydəm bəşmə: rost bıkən ıştə səy, diyə bıkən bə məzon; məhsul rəsə, bo diveni hozıye. ³⁶ Esə dıvəkəs dastmıjdi səydə iyən bo zolə jimoni məhsul qırdə kardeydə ki, kaştəkəsən, dıvəkəsən ivirədə şo bıbun. ³⁷ Koy barədə votə bıə in sıxan “qıləyni bəkaşte, co qıləyni bədıve” roste. ³⁸ Az vıǵandıme şımə bo zəhməti nıkəşə qıləy məhsuli dıve. Co kəson zəhmət kəşəşone, şımə esə boy çəvon zəhmətiku səməərə peqətone».

³⁹ Çə jeni votə sıxani bəpeştə «votışe bəmı çımı kardə əməlon həmməy» bə şəhrədə bıə Samariyəvijon veyni imon vardışone bə İsa. ⁴⁰ Çəyo Samariyəvijon oməyn çe İsa tonə, əjo kardışone Çəyku ki, bımandı çəvon tonə. İsan dı ruj mande əyo. ⁴¹ Vey odəmonən İsa sıxanon məseədə imon vardışone Bəy. ⁴² Əvon voteydəbin bə jeni: «Əmə həni bəştı votəyon qorə ne, hejo ıştənən məsəməne iyən zınəməne ki, həğiǵətən çe dınyo Xıloskor İme».

⁴³ Dı ruji bəpeştə İsa tər q kardışe əvırə, dəro qınıye bə Qalileyə. ⁴⁴ Oxo İsa ıştən keynəsə şəhodət kardəşbe, peyğəmbəri ıştə yurdədə ğurb nıbey barədə. ⁴⁵ Esə Əv bə Qalileyə omeədə Qalileyəvijon ğəbul kardışone Əv, çumçiko əvonən idədə şəbin bə Yerusəlim, vindəşonbe əyo Çəy kardəyon həmməy.

Məmurı zoə şifo səşe

⁴⁶ De jıqo, İsa ijən oməy bə Qalileyə Qana di, Əy əyo peqordınyəşbe ov bə şərov. Hıkdori Kafernaumədə qıləy məmur hestışbe. Çəy zoə noxəş qınıyəbe. ⁴⁷ Məmurı məsəşe çe İsa Yəhudəyəo

bə Qalileyə ome, şe Çəy tonə iyən əjo kardışe Çəyku ki, bo şifo bədə bəçəy zoə, çumçiko çəy zoə marde holədəbe. ⁴⁸ Bəvədə İsa votışe bəy: «Şimə əloməton iyən mecuzon nıvındon, imon nıbəvardeşon». ⁴⁹ Hikmdori məmuru votışe Bəy: «Əğə, çanə çımı əğil mardəni, boy!» ⁵⁰ İsa votışe bəy: «Bışı, ıştı zoə səğ-səloməte». Ə odəmi bovə kardışe bə İsa sıxani, şe. ⁵¹ Bə kə omeədə çəy ğulon bəçəy navi beşin iyən votışone, ıştı zoə səğ-səloməte. ⁵² Parsəy çəvonku: «Çımı zoə keynə çok be?», əvonən votışone: «Zinə çəştəsəy saat i əbi ki, təblarzi tərğ kardışe əv». ⁵³ Pıə sərəsəy ki, İsa hejo həmonə vaxti «ıştı zoə səğ-səloməte» votəşbe bəy. Bəvədə əv ıştənən, çəy kəy həmə odəmon imon vardışone bə İsa. ⁵⁴ Im çe İsa nişo kardə dıminə əlomətbe. Yəhudeyəo bə Qalileyə omeədə kardəşbe im.

Hovuzi kənoədə biə noxəşini şifo səy

5 In hodison bəpeştə çe Yəhudiyon qıləy id be iyən İsa bə Yerusəlim şe. ² Yerusəlimədə biə Pəsə bəleti tonə, ibrani zıvonədə Betxasdə nomədə biə qıləy hovuz hestbe, çəy penc əyvoniş hestbe. ³⁻⁴ Bı əyvonoədə vey noxəşin, ku, çoləx iyən iflicə odəm olxartəbe. Çumçiko Rəbbi qıləy mələk hakənə evoydəbe bə hovuzi dilə, ov lıveydəbe. Ov ocımoş omeədə əyo dəşə iminə odəmi kon noxəşiş beydə-bıbu, xəş əbi. ⁵ Sıvı həşt sor noxəş biə qıləy odəmən əyobe. ⁶ İsa vindədə çəy əyo olxarte, zınəşe ki, əv vey vaxte noxəşe, parsəy çəyku: «Pıyeydə xəş bey?» ⁷ Noxəşini cəvob doşe bəy: «Əğə, çımı tonə qıləy odəm ni ki, ov ocımoş omeədə minı eğandı bə hovuz. Az rəsencə co kəs çımısə bənav bə ov eqıneydə». ⁸ İsa votışe bəy: «Bəşt, peqət ıştə yonqo, bıpoy!» ⁹ Ə odəmi əlbəhol şifo səşe iyən peqətşe ıştə yonqo poye.

Həmonə ruj Şanbə rujbe. ¹⁰ Bı səbəb Yəhudi rəhbəron votışone bə şifo sə odəmi: «Imruj Şanbə ruje, ıştə yonqo kırıniye bəti ğədəğəne». ¹¹ Ə odəmi cəvob doşe bəvon: «Bəmı şifo doə Şəxsi votışe bəmı “peqət ıştə yonqo, bıpoy”». ¹² Parsəyn çəyku: «Bəti “peqət iyən bıpoy” votə Odəm kiye?» ¹³ İntasi şifo sə odəm zıneydəni bə Çəy ki bey, çumçiko İsa bə əyo biə izdihomi umjən biəbe. ¹⁴ Ləzi bəpeştə İsa vindışe həmonə odəm məbədi soədə, votışe: «Diyəkə, tı xəş bış, ijən qıno məkə ki, bəştı sə həniyən bevəcə ko bo». ¹⁵ Ə odəm şe, votışe bə Yəhudi rəhbəron ki, bəy şifo doə Şəxs İsay. ¹⁶ Bı səbəb Yəhudi rəhbəron dəmandin İsa rımuz karde, çumçiko Əv Şanbə ruji imoni kardeydəbe. ¹⁷ Əmma İsa votışe bəvon: «Çımı Pıə daim ko kardeydə, Azən ko kardeydəm». ¹⁸ Çımı bəpeştə Yəhudi rəhbəron Əy kışteyro həniyən vey dastroçə bin, çumçiko İsa həmə bə Şanbə ruji riyyət nıcardışe, həmə bəyon kardışe ki, Xıdo Çəy Pıəy, İştəni de Xıdo bərobər qətişe.

Çe İsa səlohiyyət

¹⁹ De jıqo, İsa votışe bəvon: «Rosti, rosti voteydəm bəşmə: Zoə İştə Pıə kardəyon nıvındo, İştəku qıləy çiy nıbəkarde. Çumçiko Pıə çiç bıko, Zoən əy bəkarde. ²⁰ Oxo Pıə pıyeydəşe Zoə iyən İştə kardə har çiy nişo kardeydə Bəy. Çımonsə yolə koon Bəy nişo bəkarde ki, şimə hədəyon bəmandeşon. ²¹ Çoknə ki, Pıə mardon bəyji kardeydə, bəvon jimon doydə, Zoən bəki bıpiyoşe bəy jimon doydə. ²² Pıə hiç kəsi mihokimə kardeydəni, intasi hikm bekarde səlohiyəti bə Zoə doəşe ki, ²³ har kəs bə Pıə hurmət karde ğəzinə, bə Zoən hurmət bıkə. Bə Zoə hurmət nıcardəkəs, bə Əy vığandə Pıən hurmət kardeydəni.

²⁴ Rosti, rosti voteydəm bəşmə: Bəçımı sıxani quş doə, bə Mını Vığandəkəsi bovə kardəkəs bə zolə jimoni molike iyən boəy hikm benibəkan, həni əv mardiku bə jimon ovaştə.

²⁵ Rosti, rosti voteydəm bəşmə: ə vaxt omeydə iyən həni oməy ki, mardon çe Xıdo Zoə sədo bəməsen iyən ımı məsəkəson bəjiyen. ²⁶ Çoknə Pıə jimoni səvone, jəqoən Əy jimoni səvon kardışe İştə Zoən. ²⁷ Hikm bekarde səlohiyətiən doəşe Bəy, çumçiko Əv Bəşəri Zoəy. ²⁸ Təəccub

məkən bimi, oxo jıqo qıləy zəmon omeydə ki, ğəbədə bəkəson həmməy Çəy sədo bəmən, ²⁹ ıstə ğəbono bebəşən, çoki kardəkəson bo Jimoni bəyji bəben, bevəci kardəkəson esə boy bo Hikmi bəyji bəben.

³⁰ Az İstəku hiçiy karde əzımim, ıstə məse ğəzinə mihokimə bəkardem iyən Çımı doə hikm ədolətine. Çumçiko Çımı məğsəd əve ki, İstə irodə ne, Mını Vığandəkəsi irodə bə vırə bırosnım.

Bə İsa şəhodət

³¹ Qirəm Az İstə barədə şəhodət kardəmbəy, Çımı şəhodət etiboyn nəbi. ³² İntasi co kəs Çımı barədə şoydəti kardeydə iyən zıneydəm çəy Çımı barədə kardə şəhodət etiboynə. ³³ Şımə çe Yəhya tonə odəm vığandione iyən çəy Çımı barədə kardə şoydəti həğiğətə. ³⁴ İntasi ehtiyocım niy insononku şəhodət bıstənım, əncəx imoni voteydəm ki, şımə xılos bıbən. ³⁵ Yəhya qıləy vəşə iyən nur səğandə çobe ki, şımə piyəone i middət çəy ruşnədə şo bıbən. ³⁶ Əmma Çımı barədə bıə şəhodət çe Yəhya şəhodətisən barze. Pıə asbardəşe Bəmi ə koon həmməyəvo bə vırə bırosnım. Çımı esət bə vırə rosniyə koon Çımı barədə şəhodət kardeydən ki, Pıə vığandəşe Mı. ³⁷ Mını vığandə Pıə İştənən Çımı barədə şəhodət kardeydə. Şımə hiç vaxti Çəy sədo məsəonni iyən Çəy surəti vindəonni. ³⁸ Çəy kəlom şımənədə jiyeydəni, çumçiko Bəçəy vığandə Şəxsi bovə kardeydənişon. ³⁹ Şımə Mığəddəsə Nıvıştəyon tədğığ kardeydon, çumçiko şıneydon ki, deçəvon vositə bə zolə jimoni molik bəbeşon. Əmma əvonən Çımı barədə şəhodət kardeydən. ⁴⁰ Şımə isə piyeydonni bədi Mı boən, bə jimoni molik bıbən.

⁴¹ Bəmi insonon doə izzət lozim ni. ⁴² Əncəx Az şıməni zıneydəm, şımə dılədə Xıdo mehıbbət ni. ⁴³ Az Deştə Pıə nomi oməym, əmma şımə Mını ğəbul kardeydənişon. Qirəm co kəs deştə nomi bo, əy ğəbul bəkardəşon. ⁴⁴ Şımə iyəndıku izzət ğəbul kardeydəşon, iqləliyə Xıdoku omə izzəti nəveydənişon. Jıqo beədə çoknə imon varde bəzıneşon? ⁴⁵ Qımon məkən ki, Az şıməni Pıə vədə ittıhom bəkardem. Şıməni ittıhoməkə şımə umu bastə Musayə. ⁴⁶ Şayət şımə bə Musa bovə kardəyonbəy, Bəminən bovə əkeyon, oxo əy Çımı barədə nıvıştəşe. ⁴⁷ Ehanə bəçəy nıvıştəyon bovə nıkon, Bəçımı sıxanon çoknə bovə bəkardəşon?»

İsa penc həzo odəmi si kardeydə

6 In hodison bəpeştə İsa ovaşte Tiberiyə qoli bə qılə japə, həməni bı qoli Qalileyə dıyo voteydəbin. ² Çəy dumo qıləy yolə izdihom şeydəbe, çumçiko vindeydebin Əv bo noxəşinon mecuzon kardeydə. ³ İsa peşe bə band iyən nışte Deştə şoqirdon. ⁴ Çe Yəhudiyon Pasxə id nez beydəbe.

⁵ İsa edyəsəy vındışe qıləy yolə izdihom omeydə Çəy tonə, votışe bə Filipi: «Əmə çikonco nun bəhiremon, bədomon əvon bəhən?» ⁶ Əy de dəvinə karde məğsədi votışe ın sıxanon, çumçiko İştən zıneydəbe çiç bəkardə. ⁷ Filipi cəvob doşe Bəy: «Bımon dısa dinari nunən nıbəreşə ki, har kəs tikəy bəhə». ⁸ Şoqirdonədə qıləyni bıə Simon Peteri boə Andrey votışe bəy: ⁹ «İyo qıləy zoəku penc qılə qədə cəvə nun iyən dıqlə moy heste, əmma ım çiçe bo anə odəmi?» ¹⁰ İsa votışe: «Xəlği bınsəndən bə zəmin». Həmonə vırədə çokə çimən hestbe. Xəlğ nışte əyo. Merdon təxminən penc həzo kəsbin. ¹¹ Bəvədə İsa peqətişe nunon, şukur karde bəpeştə paybaxş kardışe, həmçinin jəqəən moyon, har kəsi piyə ğədərədə doşone. ¹² Əvon hardışone, si be bəpeştə İsa votışe bəştə şoqirdon: «Qırdə bıkən ziyodə mandəyon ki, hiçiy bə puçi benışu». ¹³ Qırdə kardışone, penc qılə cəvə nuni vişmandəyono donzə zambul pur be. ¹⁴ Bəvədə çe İsa kardə əloməti vində odəmon voteydəbin: «Həğiğətən, bə dınyo omənin bıə peyğəmbər İme!» ¹⁵ İsa zınəşe odəmon piyeydəşone bon Əy bıbən de zuy podşo bıkən, əve coyli peşe bə band.

İsa poyeydə ovi dimisə

¹⁶ Şanqo daraşəədə İsa şoqirdon evəəyn bə qol, ¹⁷ peniştin bə qıləy kulos, toyki daraşeydəbe, əmma İsa hələ çəvon tonon omənibe. Əvon qoli bə japədə biə Kafernaum şeydəbin. ¹⁸ Zumandə vavaziku qol ləpə jəydəbe. ¹⁹ Əvon de jıqoy çəp kəşəşone visti penc, yaan si stadi şe bəpeştə vindişone ki, İsa poyeydə qoli səpe iyən bə kulosi nez beydə. Tarsəyn, ²⁰ əmma İsa votişe bəvon: «Azim, mətarsən». ²¹ Bəvədə şoqirdon piyeydəşonbe Əy bə kulos peqətın. Əmma kulos bə ləzədə rəsəy bəçəvon şə japə.

²² Maşkinə ruji qoli bə japədə mandə xəlği vindişe ki, əyo kulos ni, əncəx iqlə kulos hesteybən ki, İsa Deştə şoqirdon bə həmonə kulosi peniştəniybən, şoqirdon Bəy şən. ²³ Bəvədə co kuloson Tiberiyəo oməyn bə həmonə vırəy nezi, konco ki Rəbbi şukur karde bəpeştə nun hardəşonbe. ²⁴ De jıqo, xəlği vindişe İsa iyən şoqirdon əyo nin, peniştin bə kuloson dəmandin bo İsa nəve, oməyn bə Kafernaum.

Jimoni nun

²⁵ Əvon vindeədə İsa qoli bə japədəy, parsəyn Çəyku: «Rabbi, keynə oməyş iyo?» ²⁶ İsa jıqo cəvob doşe: «Rosti, rosti voteydəm bəşmə: əloməton vindeyro ne, əncəx nun harde si beyro Bəmi nəveydon. ²⁷ Faniyə hardeyro ne, zolə jimon doə, daimi mandə hardeyro koon bıkən, Bəşəri Zoə əy bədo bəşmə. Çumçiko Pıə Xıdo İştə mihi Bəy jəşe». ²⁸ Əvon parsəyn İsaku: «Xıdo piyə koon kardeyro əmə çiç bıkəmon?» ²⁹ İsa cəvob doşe bəvon: «Çe Xıdo piyə ko ime: Bəçəy vığandə Şəxsi imon biyə».

³⁰ Əvon votişone bə İsa: «Tı çı əlomət nişo kardeydəş ki, bıvindəmon Bəti bovə bıkəmon? Tı çiç karde bəzineş? ³¹ Çəmə dədə-bobon daştədə manna hardişone, bı barədə nıvıştə biə: “Osmonono nun doşe bəvon bo harde”». ³² Bəvədə İsa votişe bəvon: «Rosti, rosti voteydəm bəşmə: osmonono bəşmə nun doəkəs Musa nibe, osmonono bəşmə həğiğiyyə nuni doəkəs Çımı Pıəy. ³³ Çumçiko Xıdo nun ime ki, osmonono oməy iyən bə dınyo jimon doydə». ³⁴ Votişone Bəy: «Əğə, Tı hejo in nuni bıdə bəmə».

³⁵ İsa votişe bəvon: «Jimoni nun Azim. Çımı tonon oməkəs hiç vaxti vəşi nıbəqəte, Bəmi imon vardəkəs hiç vaxti təşi nıbəqəte. ³⁶ İntasi bəşmə votime ki, Mını vındıone, əmma imon vardeydəniyon. ³⁷ Pıə Bəmi doə şəxson həmməy Çımı tonon bomen iyən Az hiç vaxti Çımı tonon oməkəsi rədd nıbəkam. ³⁸ Çumçiko Az osmonono oməm ki, İştə irodə ne, Mını Vığandəkəsi irodə bə vırə bırosnım. ³⁹ Mını Vığandəkəsi irodə ime ki, Bəmi doə biə şəxson hiç qıləyni bo həlok be nahaştım, əmma Xıdo Hıkmı Rujədə əvoni bəyji bıkəm. ⁴⁰ Oxo Çımı Pıə irodə əve ki, Zoə vındəkəsi iyən Bəy imon vardə har kəsi bıbuşe zolə jimon iyən Az Hıkmı Rujədə əy bəyji bıkəm».

⁴¹ Çımı cəvobədə Yəhudiyon qırəy kardışone İsaku ki, Əv voteydə «osmonono omə nun Azim», ⁴² votişone: «Im Yusifi Zoə ni, əmə zıneydənimon bəqəm çəy pıə-moə? Esə çoknə beydə ki, “Az osmonono oməm” voteydə?» ⁴³ İsa cəvob doşe bəvon: «İştə arədə qırəy məkən. ⁴⁴ Şayət Mını vığandə Pıə ə şəxsi cəzb nıko, əv Çımı tonon ome əzını. Az Hıkmı Rujədə əy bəyji bəkam. ⁴⁵ Peyğəmbəron Kitobonədə nıvıştə biə: “Xıdo əvoni həmməy obəmute”. Pıəku məsəkəs iyən omutəkəs Çımı tonon omeydə. ⁴⁶ Həlbətən hiç kəsi vındəşni Pıə, gərəyz Xıdoə omə Şəxsi, əncəx Əy vındəşe Pıə. ⁴⁷ Rosti, rosti voteydəm bəşmə: imon vardəkəs bə zolə jimoni molike. ⁴⁸ Jimoni nun Azim. ⁴⁹ Çəmə dədə-bobon daştədə manna hardişone, əmma iştə vaxtədə mardin. ⁵⁰ Osmonono omə in nun jıqo qıləy nune ki, əy hardəkəs hiç vaxti nıbəmarde. ⁵¹ Osmonono omə jimon doə nun Azim. Şayət kiysə çı nuno baho zol bəjiye. Ə nuni ki Az bəşəriyyəti jimoniro doydəm, əv Çımı andome».

⁵² Bəvədə Yəhudiyon iştə arədə həsbəhs kardışone: «Im Odəm İştə andomi çoknə doy bəzine bəmə bo harde?» ⁵³ İsa votışe bəvon: «Rosti, rosti voteydəm bəşmə: qirəm Bəşəri Zoə andomo nahon iyən Çəy xuno penişomon, şimənədə jimon əbini. ⁵⁴ Çımı andomo hardəkəs, xuno peşoməkəs bə zolə jimoni molike iyən Az Hikmi Rujədə əy bəyji bəkardem. ⁵⁵ Çumçiko Çımı andom həğiğiyyə hardeye, Çımı xun həğiğiyyə peşoməye. ⁵⁶ Çımı andomo hardəkəs, Çımı xuno peşoməkəs Bəminədə mandeydə, Azən bəvədə mandeydəm. ⁵⁷ Hest Bıə Pıə Mını vığande ğəzinə, Azən Pıə hımhımbədə jiyəy ğəzinə, Çımınno hardəkəsən Çımı hımhımbədə bəjiye. ⁵⁸ Osmonono omə nun ime, şimə dədə-bobon hardə manna ğəzinə ni. Əvon mardin, əmma in nuni hardəkəs zol bəjiye». ⁵⁹ İsa Kafernaumi sinaqoqədə təlim omuteədə in sıxanon votışe.

Şoqirdon veyni tərq kardeydən İsa

⁶⁰ İsa dumo şəkəson in sıxanon məseədə votışone: «In təlim ğəlizə. Ki imi sərəse bəzine?» ⁶¹ İntasi İsa faməşe şoqirdon qırəy kardeydən, bı səbəb votışe bəvon: «In təlim şiməni dəqijneydə? ⁶² Bəs çoknə bəbe, qirəm Bəşəri Zoə Bəştə sıftədə bıə vırə rost bey bıvındon? ⁶³ Ruf jimon doydə, cismi esə boy hiç foydə nişe. Çımı bəşmə votə sıxanon Ruf iyən jimon doydən. ⁶⁴ İntasi şimə dilədə imon nıvardəkəsonən hestin». Jıqo ki İsa sıftəku zıneydəbe imon nıvardəkəson iyən Bəy xəyonət kardəkəsi. ⁶⁵ Əy votışe: «Bı səbəb bəşmə votime ki, qirəm Pıə bə i kəsi imkon nıdo, əv Çımı dumo ome əzini».

⁶⁶ Çımı bəpeştə Çəy dumo şəkəson veyni tərq kardışone İsa, həni Deəy nınəvəyn. ⁶⁷ Bəvədə İsa votışe bə Donzə şoqirdi: «Bəlkəm şimənən piyeydone tərq bıkən Mını?» ⁶⁸ Simon Peteri cəvob doşe Bəy: «Ya Rəbb, əmə çiki dumo bışəmon? Zolə jimon doə sıxanon Bətıkuye. ⁶⁹ Əmənən bove kardəmonə iyən zıneydəmon ki, Xıdo vığandə Mığəddəs Tınış». ⁷⁰ İsa votışe bəvon: «Bəqəm Az İştən səçin nıkarđime şimə həmə Donzə şoqirdi? Əmma şimənədə i kəs iblise». ⁷¹ Əy Simon İskaryoti zoə Yəhudə barədə votışe in sıxanon, çumçiko Donzə şoqirdi qıləyni be-be bə İsa xəyonət bəkardə.

İsa şeydə bə Yerusəlim

7 Çımı bəpeştə İsa əncəx Qalileyədə nəveydəbe. Yəhudi rəhbəron dastroçəbin Boəy kışte, əve həni piyedəşnıbe Yəhudeyədə bıənəvi. ² Çe Yəhudiyon Xeymon id nez beydəbe. ³ Çəy boon votışone bə İsa: «Beşi çıvrəo bə Yəhudeyə bışı ki, İştı şoqirdonən İştı kardə koon bıvındın. ⁴ Çumçiko iştəni məşur karde piyəkəs niyonədə hiçiy əkəni. Madəm ki Tı imoni kardeydəş, İştəni bə dınyo oşko bıkə». ⁵ Hətto Çəy boonən Bəy imon vardeydənıbin. ⁶ Bəvədə İsa votışe bəvon: «Çımı vaxt hələ rəsəni, boşmə isə har vaxt mınosibe. ⁷ Dınyo bəşmə nıfrət karde əzini, əmma Bəmi nıfrət kardeydə, çumçiko Az şoydəti kardeydəm ki, çəy əməlon şərin. ⁸ Şimə bışən bə id, Az hələ ki nıbəşem, çumçiko Çımı vaxt hələ təmom bıəni». ⁹ İsa in sıxanon vote bəpeştə Qalileyədə mande.

¹⁰ Əmma Çəy boon şe bəpeştə Əvən oşko ne, niyoni şe bə id. ¹¹ Yəhudi rəhbəron idədə nəveydəbin bo İsa, parseydəbin: «Ə odəm koncoye?» ¹² Cəmati dilədə Çəy barədə veyə ğırbır şeydəbe. Kali kəs «çokə odəme», co kəson isə «xəyr, xəlği royku bekardeydə» voteydəbin. ¹³ İntasi Yəhudi rəhbəron tarsiku hiç kəs Çəy barədə bərmalə voteydənıbe.

¹⁴ İd bə nımə bıəbe ki, İsa şe bə məbəd dəmande təlim omute. ¹⁵ Yəhudiyon hədəyon mandin, votışone: «Im Odəmi təhsil nıbe-nıbe, çoknə beydə ki jıqo səvodine?» ¹⁶ İsa jıqo cəvob doşe bəvon: «Çımı omute təlim Çımı ne, Mını Vığandəkəsiye. ¹⁷ Ki Çəy irodə bə vırə rosniye piyeydəşebu, əv bəzine ki, Çımı omute təlim Xıdokuy, yaan İştəku voteydəm. ¹⁸ İştəku votəkəs Boştə izzəti nəveydə, intasi Boəy Vığandəkəsi izzəti Nəvəkəs bərhəxe,

Bəyku behəxəti əbını. ¹⁹ Musa bəşmə Ğanun doşe, əmma şıməhono hiç kəs bə Ğanuni əməl kardeydəni. Boçi Mını kışte piyeydone?» ²⁰ Xəlği cəvob doşe: «Bətınədə cın heste. Ki piyeydəşe Tını bıkıştı?» ²¹ İsa votışe bəvon: «Az qıləy mecuzə kardime iyən şımə həmməy hədəyon mandışon. ²² Musa hamyəşe bəşmə sinnət kardey, əmma Musasən bənav jiyə dədəbobon imi kardəşone. Şımə Şanbə rujiyən odəmi sinnət kardeydon. ²³ Şımə Şanbə ruji odəm sinnət kardeydəşon ki, çe Musa Ğanun dənıqardı. Bəs boçi Az Şanbə ruji odəmi andomi qırd xəş kardeyro Bəmi ğəzəbin beydon? ²⁴ Bə zahiri qorə mihokimə məkən, de ədoləti mihokimə bıkən».

İsa Məsihebu?

²⁵ Bəvədə kali Yerusəlimijon votışone: «Im çəvon kışte piyə odəm ni bəqəm? ²⁶ Imha, Əv bərmələ qəp jəydə, əmma jıqıləy sıxan voteydənın Bəy. Bəlkəm rəhbəron həğiğətən umutışone ki, Məsih Əve? ²⁷ Əmma zıneydəmon Im odəm çikonco oməy, halbuki Məsih omeədə hiçki əzini Əv çikonco oməy». ²⁸ İsa məbədədə təlim omuteədə car kəşəşe: «Rostiyən, zıneydon Mını, zıneydon çikonco oməm? Az omənim ıstəku, intasi Mını Vığandəkəs bərhəxe. Şımə zıneydənişon Əy, ²⁹ Az isə Əy zıneydəm, çumçiko Az Çəyku oməm iyən Əy vığandışe Mı». ³⁰ Bımədə əvon piyəşone bıqətın İsa, intasi hiç kəs nıqınıye Bəy, çumçiko hələ Çəy vaxt rəsə nibe. ³¹ Xəlği dilədə vey odəmi isə imon vardışe Bəy: «Məsih omeədə im Odəmi kardəyonsə veyə əlomət nişo bəkardebu?» voteydəbin.

³² Fəriseyon məsəşone ki, xəlğ İsa barədə jıqo ğırbır kardeydə. Sər kahinon iyən fəriseyon vığandışone mihofizəkon ki, Əy bıqətın. ³³ İsa votışe: «Kamışe mıddətən Az deşmə bəbem, çəyo isə Mını Vığandəkəsi tonə bəşem. ³⁴ Şımə bənəveşon, pəydo nıbəkardeşon Mını iyən Bəçımı bıə vıre ome əzinişon». ³⁵ Bimi cəvobədə Yəhudiyon ıstə arədə votışone: «Im Odəm bə kovrə bəşe ki, Əy pəydo karde nıbəzınemon? Məqəm bəşe Yunanon dilədə pevilo bıə Yəhudiyon tonə, bəvon təlim obəmutebu? ³⁶ Əy çiç vote piyeydəşe de ın sıxani “Şımə bənəveşon Bomı pəydo nıbəkaşon iyən Bəçımı bıə vıre ome əzinişon”?»

³⁷ İdi oxonə təntənəynə rujədə İsa əşte de barzə sədo votışe: «Ki təşi qətə, bo Çımı tonə peşomı. ³⁸ Mığəddəsə Nıvıştəyonədə vote ğəzinə, Bəmi imon vardəkəsi dilətonə jimənə ovi ruyon ru bəben». ³⁹ İsa Mığəddəsə Rufi barədə votışe imoni. Hələ Mığəddəsə Ruf doə bıənibe bə imon vardəkəson, çumçiko İsa hələ izzət səş nibe.

⁴⁰ Cəmati arədə kali kəson ın sıxanon məsəədə votışone: «Həğiğətən omənin bıə peyğəmbər İme». ⁴¹ Co kəson isə votışone: «Im, Məsihe», əncəx kali kəsi votışe: «Çiç? Məsih Qalileyəo bome? ⁴² Oxo Mığəddəsə Nıvıştəyonədə votə beydə ki, Məsih Davudi nəsilo, Davudi jiyə di Betlehemə bome». ⁴³ De jıqoy, xəlği arədə İsa barədə rıxnə eqınıye. ⁴⁴ Kali kəsi piyəşe Əy bıqətı, əmma hiç kəs nıqınıye Bəy.

Yəhudi rəhbəron beimonəti

⁴⁵ Mihofizəkon oqardin sər kahinon iyən fəriseyon tonə. Əvon parsəyn: «Boçi nıvardone Əv?» ⁴⁶ Mihofizəkon cəvob doşone: «Hələ tosə esə hiç kəsi jıqo qəp jəşni». ⁴⁷ Fəriseyon votışone bəvon: «Nekniki şıməniən royku bekardeşə? ⁴⁸ Məqər qıləy rəhbəri, yaan qıləy fərisey imon vardışe Bəy? ⁴⁹ Tovrati nızne im xəlğ isə, bə lənət omə!» ⁵⁰ Çəvon dilədə i kəsi – çimi bənav İsa tonə omə Nikodimi votışe bəvon: ⁵¹ «Məqər çəmə Ğanun icozə doydə ki, sıftə bə odəmi quş nıdoə, çəy kardə çiy mıəyyən nıkardə hıkm bekəmon bəy?» ⁵² Əvon votışone bə Nikodimi: «Ğasbu tınən Qalileyəvıjış? Tədgığ bıkon, bəvindeşon ki, Qalileyəo peyğəmbər benibəşe». ⁵³ Çimi bəpeştə har kəs şe bəştə kə.

İsa iyən zinokorə jen

8 İsa isə şe bə Zeytun band. ² Maşkinəy rəbədə ijən oməy bə məbəd. Həmə xəlg qırdəbə Bəçəy sə, Əvən nişte iyən dəmande bəvon təlim omute. ³ Ruhani mıəllimon iyən fəriseyon vardişone əyo zino səpe qətə bıə qıləy jen. Bekardişone əv bə miyonə, ⁴ votışone bə İsa: «Mıəllim, ım jen zino kardeəsə qətə bıə. ⁵ Musa Ğanunədə bəmə əmr kardəşe ki, jıqo odəmon sığbəse bıkəmon. Bəs Tı çiç voteydəş?» ⁶ Əvon İsa dəvinə kardeyro ımı voteydebin, bo manə nəveydəbin ki, Əy bə tələ eğandin. Əmma İsa enəməy, Deştə anqıştə dəmande zəminisə bo nıvışte. ⁷ Çəyku tıkror parseədə, rost be votışe bəvon: «Şımənədə ki beqınoye sıftə əv sığ bığandı bə jeni». ⁸ Çəyo ijən enəməy, dəvom kardışe zəminisə bo nıvışte. ⁹ In sıxani məsəkəson qıləbəqılə tərq kardışone əvrə, sıftə sipirişon şin. İsa coyli mande de miyonədə bıə jeni. ¹⁰ İsa rost be votışe bəy: «Jen, əvon bə kovrə şin? Bəs hiç kəsi məhkum nıkardişe tı?» ¹¹ Jeni votışe: «Hiç kəsi, Əğə». Bəvədə İsa votışe: «Azən tını məhkum kardeydənim, bışi, həni qıno məkə».

Rostə şəhodət

¹² Çəyo İsa ijən votışe bə xəlgı: «Azim çe dınyo nur. Çımı dumo oməkəs hiç vaxti toykiədə ənəvni, bə jimoni nuri molik bəbe». ¹³ Fəriseyon votışone Bəy: «Tı İştə barədə şəhodət kardeydəş, İştı şəhodət etiboyn ni». ¹⁴ İsa cəvob doşe bəvon: «Az İştə barədə şoydəti bıkomən, Çımı şəhodət etiboynə, çumçiko Az zıneydəm çıkonco oməm bə kovrə şeydəm. Şımə isə zıneydənişon Çımı çıkonco ome bə kovrə şey. ¹⁵ Şımə de bəşəri ğaydon mıhokimə kardeydon, Az isə hiç kəsi mıhokimə kardeydənim. ¹⁶ Az mıhokimə bıkomən, Çımı doə hıkm həğiğiye, çumçiko Az coyli nim, Mını vığandə Pıə Demı ivirədə mıhokimə kardeydə. ¹⁷ Şımə Ğanunədən nıvıştə bıə ki, dı kəsi kardə şoydəti etiboynə. ¹⁸ Az İştə barədə şəhodət kardeydəm, Mını vığandə Pıən Çımı barədə şəhodət kardeydə». ¹⁹ Bəvədə parsəyn İsakı: «İştı Pıə koncoye?» İsa cəvob doşe: «Şımə, nə Mını, nəən Çımı Pıə zıneydon. Qirəm zınəyonbəy Mını, Çımı Pıən əzınışon». ²⁰ İsa votışe in sıxanon məbədədə, nəzır noə bıə vırədə təlim omuteədə. Hiç kəsi nıqətışe Əv, çumçiko Çəy vaxt hələ omənıbe.

²¹ Çəyo İsa ijən votışe bəvon: «Az şeydəm, şımə Bomı bənəveşon iyən ıştə qıno dilədə bəmardeşon. Şımə Bəçımı şə vırə ome nıbəzneşon». ²² Bəvədə Yəhudıyon votışone: «Bəqəm Əv İştəni bəkişte ki, “şımə Bəçımı şə vırə ome əzınışon” voteydə?» ²³ İsa votışe bəvon: «Şımə jıtonoyon, Az pentonoyom, şımə çı dınyokuyon, Az isə çı dınyoku nim. ²⁴ Bı səbəb Az votıme bəşmə: “İştə qınon dilədə bəmardeşon”. Qirəm bovə nıkon ki, Əv Azim, ıştə qınon dilədə bəmardeşon». ²⁵ Bəvədə parsəyn İsakı: «Tı kiş?» İsa votışe bəvon: «Sıftəku çiç voteydebin bəşmə, Əvim. ²⁶ Şımə barədə vey çiyon hestin bəvotem iyən mıhokimə bəkardem. İntasi Mını Vığandəkəs bərhəxe iyən Az Çəyku məsəyon bə dınyo voteydəm». ²⁷ Əvon sənırəsəyn ki, İsa bəvon Pıə barədə voteydə. ²⁸ Bəvədə İsa votışe: «Şımə Bəşəri Zoə bə pe rost kardə vaxti bəzıneşon ki, Əv Azim iyən İştəku hiç çiy kardeydənim, əncəx Pıə Bəmı çoknə omuteşəbo, jəqo qəp jəydəm. ²⁹ Mını Vığandəkəs Demıne. Əy coyli nahaştışe Mı, çumçiko Az hejo Bəçəy xoş oməyon kardeydəm». ³⁰ İsa in sıxanon voteədə vey odəmi imon vardişe Bəy.

İbrahimi əsl fərzəndon

³¹ Bəvədə İsa votışe Bəy bovə kardə Yəhudıyon: «Qirəm şımə Bəçımı sıxani bəfomand bıbon, həğiğətən, Çımı şoqirdonıyon. ³² Şımə həğiğəti bəzıneşon iyən həğiğət şıməni ozod bəkardə». ³³ Yəhudıyon cəvob doşone bə İsa: «Əmə İbrahimi nəsilomon, hiç vaxti bə hiç kəsi ğul bıənimon. Bəs Tı boçi “ozod bəbeşon” voteydəş?» ³⁴ İsa votışe bəvon: «Rosti, rosti voteydəm bəşmə: qıno kardə har kəs çe qıno ğule. ³⁵ Ğul hejo de xıyzoni nıbəbe, zoə isə hejo de xıyzoni bəbe. ³⁶ Jıqoən

Zoə şıməni ozod bıko, şımə həğiğətənən, ozod bəbeşon. ³⁷ Zıneydəm şımə İbrahimi nəsiloyon, əncəx demiyən jıqo dastpoçə bışon Boçımı kışte. Çumçıko Çımı sıxan bəşmə dıl dəşeydəni.

³⁸ Az İştə Pıə tonə vindəyon voteydəm, şımə isə ıştə pıəku məşəyon bə vırə rosneydon».

³⁹ Əvon ıştə cəvobədə votışone bə İsa: «Çəmə pıə İbrahime». İsa votışe bəvon: «Qirəm şımə İbrahimi fərzəndon bəbeyon, İbrahimi kardə əməlon əkeyon. ⁴⁰ Şımə esə boy Mını – Xıdoku məsə həğiğəti bəşmə votə Odəmi kışteyro dastpoçə bışon. İbrahimi jıqo nıkardışe. ⁴¹ Şımə ıştə pıəon əməlon kardeydəşon». Əvon votışone Bəy: «Əmə zinoku bə əməl omənimon, çəmə iqlə Pıə hestımone, Əvən Xıdoy». ⁴² İsa votışe bəvon: «Qirəm Xıdo şımə Pıə bəbəy, əpiyone Mını, oxo Az Xıdoo beşəm, oməm iyən esə iyom. Oxo Az İştəku omənim, Əy vığandışe Mını. ⁴³ Boçi Bəçımı votəyon sərəseydənişon? Çumçıko Çımı sıxani məse zıneydənişon. ⁴⁴ Şımə pıə iblise iyən piyeydone ıştə pıə orzuyon bə vırə bırosnən. Əv sıftəku odəm bıkiştbe iyən bə həğiğəti bəfomand nibe, oxo həğiğət ni bəyku. Du votey çəy xısusiyəte, çumçıko əv duyəvoje iyən çe duy pıəy. ⁴⁵ Az esə boy həğiğəti voteyro şımə Bəmi bovə kardeydənişon. ⁴⁶ Şımənədə ki sıbut bəkarde ki, Az qıləy qıno kardəme? Az həğiğəti voteydəm, boçi Bəmi bovə kardeydənişon? ⁴⁷ Xıdoo bıə şəxs bə Xıdo votəyon quş bədo. Şımə isə quş doydənişon, çumçıko şımə Xıdoo nişon».

Çe İsa izzət

⁴⁸ Yəhudiyon ıştə cəvobədə votışone Bəy: «Məqəm rost voteydənimon Tı Samariyəvişiş iyən cın heste Bətınədə?» ⁴⁹ İsa cəvob doşe: «Bəminədə cın ni, əmma Bəştə Pıə hurmət kardeydəm, şımə isə Mını hurməto eğandeydon. ⁵⁰ Az Boştə izzət nəveydənim, əmma şımə izzət doənin bıə iyən şıməni mihokimə bıkə Şəxs heste. ⁵¹ Rosti, rosti voteydəm bəşmə: ki Bəçımı sıxani rioyət bıko, hiç vaxti mardey nıbəvində». ⁵² Yəhudiyon votışone Bəy: «Esə zınəməne ki, Bətınədə cın heste. İbrahımən marde, peyğəmbəronən. Əmma Tı voteydəş: “Ki Bəçımı sıxani rioyət bıko, hiç vaxti əmərdini”». ⁵³ Bəqəm Tı çəmə pıə İbrahımisə barziş? Əvən marde, peyğəmbəronən. Oxo Tı İştəni ki hisob kardeydəş?» ⁵⁴ İsa cəvob doşe: «Qirəm Az Bəştə izzət doydəmbə, Çımı izzət hiçe. Əmma Mını izzətin bıkə Çımı Pıəy, şımə Bəy “çəmə Xıdo” voteydon. ⁵⁵ İntasi zıneydənişon Əy. Az isə zıneydəm Əy. Qirəm votəmbəy “zıneydənim Əy”, duyəvoj əbim şımə gəzinə. İntasi Az zıneydəm Əy iyən Bəçəy sıxani rioyət kardeydəm. ⁵⁶ Şımə pıə İbrahım umu kardəbe Çımı ruji vindeyro şobe iyən vındışe şoy-voy kardışe». ⁵⁷ Yəhudiyon isə votışone Bəy: «İştə hiç pencə sin ni, çoknə İbrahimi vındə bəzineş?» ⁵⁸ İsa votışe bəvon: «Rosti, rosti voteydəm bəşmə: İbrahım nıbə bənav Hest Bıəy Azim». ⁵⁹ Bəvədə əvon peqətişone sığ ki, sığbəse bıkən İsa, əncəx İsa niyo be iyən beşe məbədo.

Kuə odəmi şifo səy

9 İsa de roy şeyədə vındışe movardo ku bıə qıləy odəm. ² Şoqirdon parsəyn Çəyku: «Rabbi, ki qıno kardəşe ki, im odəm ku omə bə dınyo: ıştən, yaan çəy pıə-moə?» ³ İsa cəvob doşe: «Nə ıştən qıno kardəşe, nəən çəy pıə-moə. Əmma jıqo be ki Xıdo koon çəy jimonədə oşko bıbun. ⁴ Çanə ki ruje, Mını Vığandəkəsi koon kardəninimon. Rəyrə şəv omeydə, bəvədə hiçki ko karde əzini. ⁵ Çanə ki dınyoədəm, çe dınyo nur Azim». ⁶ In sıxanon vote bəpeştə Əy tu kardışe bə zəmin, umjən kardışe bə tuli, dəsuşe həmonə tul bə kuy çəşon. ⁷ Çəyo votışe bəy: «Bışi, dənişt Siloami hovuzədə». «Siloam» sıxani məno «vığandə bıə» votəye. Əvən şe dənişte iyən oqardeədə çəy çəşon vindeydəbin. ⁸ Çəy hamsiyon iyən navko əy bənə qıləy peyəcini zınəkəson voteydəbin: «Im həmonə odəm ni, navko əniştə peyəcini əkəy?» ⁹ Kali kəsi «əve» votışe, kali kəsi «xəyr, əmma bəy oxşeydə» votışe. İştən isə «əv azim» votışe. ¹⁰ Parsəydəbin çəyku: «Bəs ıştə çəşon çoknə obin?» ¹¹ Əy cəvob doşe: «İsa nomədə bıə Odəmi hozı kardışe tul, dəsuşe bəçımı çəşon iyən votışe bəmi “bışi bə Siloami hovuz, dənişt”, azən şim dəniştım, esət vindeydəm». ¹² Parsəyn çəyku: «Bəs ə Odəm koncoy?» Əy isə cəvob doşe: «Zıneydənim».

Çe fəriseyon təyğat

¹³ Navko ku biə həmonə odəmi bardışone fəriseyon tonə. ¹⁴ Çe İsa tul hozı kardə iyən çəy çəşon okardə ruj Şanbə rujbe. ¹⁵ Fəriseyonən parsəyn çəşoniş obə odəmiku, ıştı çəşon çoknə obin. Ə odəmiyən votışe bəvon: «Əy tul dəsüşe bəçımı çəşon, azən dənıştim, esə vindeydəm». ¹⁶ Bəvədə kali fəriseyon votışone: «Im Odəm Xıdoo oməni, çumçiko bə Şanbə ruji aid biə ğanuni rioyət kardeydəni». Co kəson isə votışone: «Qınokorə odəm çoknə jıqo əloməton nişo doy bəzine?» De jıqo, çəvon arədə rıxnə eqıniye. ¹⁷ Bəvədə ijən parsəyn kuə odəmiku: «Bəs tı Çəy barədə çiç voteydəş? Oxo Əy okardəşe ıştı çəşon». Kuə oadəmi votışe: «Əv peyğəmbərə».

¹⁸ Yəhudi rəhbəron ijənən bovə nıkardeşone ki, im odəm kube, esət vindeydə, bı səbəb sədo kardışone çəy pıə-moə. ¹⁹ Parsəyn çəy pıə-moəku: «Ime şımə movardo ku biə zoə? Bəs çoknə be ki, esə vindeydə?» ²⁰ Çəy pıə-moə votışe: «Zıneydəmon ki, im çəmə zoəy iyən movardo kube. ²¹ Əncəx zıneydənimon ki, esə çoknə vindeydə iyən ki okardəşe çəy çəşon. Çəy ıştənıku bıparsən. Bə həddi-biloğ rəsə, bıdə ıştə barədə ıştən qəp bijəni». ²² Çəy pıə-moə Yəhudi rəhbəronku tarseydəbe, əve jıqo votışone, çumçiko Yəhudi rəhbəron bə jıqo ğəror oməbin ki, harki İsa bənə Məsihi ğəbul bıko, ə şəxs sinaqoqo tojniyə bıbu. ²³ Əve çəy pıə-moə votışe ki, «bə həddi-biloğ rəsə, çəy ıştənıku bıparsən».

²⁴ Yəhudi rəhbəron navko ku biə odəmi dıminə kərə sədo kardışone, votışone: «Xıdo vədə ğəssəm bəhə ki, rosti voteydəş, əmə zıneydəmon im Odəmi qınokor bey». ²⁵ Əyən cəvob doşe: «Zıneydənim Əv qınokore, ya ne. İqlə çiy zıneydəm ki, kubim, əmma esə vindeydəm». ²⁶ Çəyku parsəyn: «Əy bəti çiç kardışe? Çoknə okardışe ıştı çəşon?» ²⁷ Əyən cəvob doşe bəvon: «Hejo esə votime bəşmə, əmma quş nıdoyone. Boçi ijən imi məse piyeydone? Ğasbu şımənən piyeydone Çəy şoqird bıbən?» ²⁸ Əvon səsıxan kardışone bəy votışone: «Çəy şoqird tınış, əmə çe Musa şoqirdonimon. ²⁹ Əmə zıneydəmon ki, Xıdo qəp jəşe de Musa, Im Odəmi isə çıkonco ome zıneydənimon». ³⁰ Ə odəmi votışe bəvon: «Çoçine ki, şımə zıneydənişon Çəy çıkonco ome, əmma Əy okardışe çımı çəşon. ³¹ Əmə zıneydəmon Xıdo bə qınokoron quş doydəni, əmma Xıdo quş doydə bə Xıdoku tarsəkəsi iyən Bəçəy irodə əməl kardəkəsi. ³² Əzəliku jıqoşə məsə bıəni ki, kiysə movardo ku biə odəmi çəşon okə. ³³ Şayət im Odəm Xıdoo omənəbəy, hiçi karde nəzını». ³⁴ Əvon oçığan bəy: «Səykubəpo qıno dılədə moəo bıəş. Esət tı bəmə dərs doydəş?» Bəvədə tojnişone əv.

Ruhani kuyəti

³⁵ İsa məsəşe ə odəmi tojniyə bey pəydo kardışe əv, votışe: «Tı imon vardeydəş bə Bəşəri Zoə?» ³⁶ Əv parsəy: «Əğə, Əv kiye ki, az Bəy imon biyəm?» ³⁷ İsa votışe bəy: «Əv Azim. Esət tı Əy vindeydəş iyən Əv detı qəp jəydə». ³⁸ Əyən votışe: «Ya Rəbb, imon vardeydəm» iyən səcdə kardışe bə İsa. ³⁹ İsa votışe: «Az bı dınyo oməm ki mihokimə bıkəm, bıdə nıvındəkəson bıvındın, vındəkəson isə ku bıbun».

⁴⁰ Çəy tonə biə kali fəriseyon məsəşone in sıxanon parsəyn Çəyku: «Bəqəm əmənen kumon?» ⁴¹ İsa votışe bəvon: «Qirəm ku bəbeşon, nəbiyone qıno. Əmma esət “vindeydəmon” voteyro qıno şımə səpe mandeydə».

Çokə qələvon

10 Rosti, rosti voteydəm bəşmə: bə pəsə qoçə pobəku ne, co vırayku dəşəkəs dızd iyən ğuldure. ² Əmma pobəku dəşəkəs çe pəson qələvone. ³ Hıvosəkə okardeydə pobə boəy iyən pəson quş doydən bəçəy sədo. Əvən deçəvon nomi sədo kardeydə pəson çəyoən bekardeydə bə benton. ⁴ İştə pəson həmməy bə benton bekarde bəpeştə ıştənən çəvon vədə bəşe iyən pəsonən

çəy dumo bəşen, çumçiko çəy sədo zineydən. ⁵ Əmma açinə odəmi dumo nibəşen, bəviten çəyku, çumçiko açinə odəmon sədo əzının». ⁶ İsa vardışe ın məsəl boəvon, əmma əvon sənirəsəyn bə İsa sıxanon.

⁷ İsa ijən votışe bəvon: «Rosti, rosti voteydəm bəşmə: Az kəybəm bo pəson. ⁸ Çımısə bənav oməkəson həmməy dızd iyən ğuldurbin, pəson quş nidoşone bəvon. ⁹ Kəybə Azim, ki dəşo Çımiku, xılos bəbe, dəbəşe-bebəşe iyən çimən pəydo bəkarde. ¹⁰ Dızd əncəx dızdiye, kışte iyən məhv kardeyro bome. Az isə oməym ki, jimon iyən bolə jimon bıdəm bəvon. ¹¹ Çokə qələvon Azim, çokə qələvon iştə jimoni doydə bo pəson. ¹² Çe pəson qələvon nibə mijdır isə vindeədə neçi omeydə, şobədo əvoni bəvite, çumçiko əv çe pəson soyb ni. Neçion bəqəte əvoni pərən-pərən ebəğande. ¹³ Mijdır bəvite, çumçiko mijdırə, ğəyğü nibəkəşe bo pəson. ¹⁴ Çokə qələvon Azim. Az zineydəm iştənkiyon, Çımı iştənkiyonən Mını zineydən, ¹⁵ çoknə ki, Pıə Mını zineydə iyən Az zineydəm Pıə. Az iştə jimoni bo pəson doydəm. ¹⁶ Çımı hestime co pəsonən ki, əvon bı qoçədə nin, əvoniyən vardəninim. Əvonən Çımı sədo bəməsən, de jıqoy, iqlə qələ, iqlə Qələvon bəben.

¹⁷ Bı səbəb Pıə piyeydəşe Mını, çumçiko Az iştə jimoni doydəm ki, ijənən əy bıstənim bə dumo. ¹⁸ Hiçki Çımı jimoni Çımiku səy əzını, əmma Az iştən əy doydəm. Hestime ixtiyor əy bo doy, ijənən bo səyro. İştə Pıəku səme ın əmr».

¹⁹ Bı sıxanon qorə ijən rıxnə eqınıye Yəhudiyon dılədə. ²⁰ Çəvon veyni votışone: «Cın heste Bəvədə, divinə bıə. Boçi Bəy quş doydən?» ²¹ Co kəson isə votışone: «İmon cını qətə odəmi sıxanon nin. Cın hiç kuə odəmi çəşon okarde bəzine?»

Çe Yəhudiyon de İsa həsbəhs

²² Bə vaxti Yerusəlimədə Məbədi Təğdisi id dəvoniyə beydəbe. Zımistonbe. ²³ İsa məbədi soədə bıə Suleymani əyvonədə nəveydəbe. ²⁴ Yəhudiyon bə qırd qətişone İsa, votışone Bəy: «Tosə keynə çəmə dili intizorədə obəqətes? Qirəm Tı Məsihiş, bərmalə bıvot bəmə». ²⁵ İsa cəvob doşe bəvon: «Votime bəşmə, əncəx bovə nıkardıone. Çımı Deştə Pıə nomi kardə koon Çımı barədə şəhodət kardeydən. ²⁶ Əmma şımə bovə kardeydənışon, şımə Çımı pəson nişon. ²⁷ Çımı pəson məseydən Çımı sədo, Azən əvoni zineydəm iyən omeydən Çımı dumo. ²⁸ Az bəvon zolə jimon doydəm. Əvon hiç vaxti həlok nibəben iyən hiç kəs səy nibəzine əvoni Çımı dasto. ²⁹ Əvoni Bəmi doə Çımı Pıə həmməysə yole. Hiçki səy nibəzine əvoni Çımı Pıə dasto. ³⁰ Az iyən Pıə imon».

³¹ Yəhudiyon ijən sığ peqətişone ki, Əy sığbəse bıkən. ³² İsa votışe bəvon: «Pıəku omə vey xəymandə ko nişo kardime bəşmə. Şımə bıçimon kon qıləyni qorə Mını sığbəse karde piyeydone?» ³³ Yəhudiyon cəvob doşone Bəy: «Tini bəştı kardə xəymandə koyro ne, inson be-be İştəni Xıdo vıradə noyro, kufı kardeyro sığbəse kardeydəmon». ³⁴ İsa votışe bəvon: «Şımə Tovratədə nıvıştə bıə ki, “Az votəme: «Şımə xıdooniyon»”. ³⁵ Xıdo İştə kəlomi vığandə bə odəmon “şımə xıdooniyon” voteydə. Mığəddəsə Nıvıştəy ləğv karde əbini. ³⁶ Pıə təğdis kardəşe Mını, vığandəşe bə dınyo. Bəs şımə boçi “Az Xıdo Zoəm” voteyro Bəmi “kufı kardeydəş” voteydon? ³⁷ Şayət İştə Pıə koon kardeydənimbo, Bəmi imon məvən. ³⁸ Əmma ın koon kardeydəmbo, Bəmi imon nıvonən, Bəçımı kardə koon imon biyən. Bəvədə səbərəseşon, bəzineşon ki, Pıə Bəminədəy, Azən Pıədəm». ³⁹ Əvon ijən İsa qəteyro dastpoçə bin, əmma Əv bəfirsiyəy çəvon dasto şe.

⁴⁰ İsa ijən şe ru İordani bə qılə japə, çe Yəhya sıftə vəftiz kardə vıray nezi, mande əyo. ⁴¹ Veyə odəm oməy İsa tonə, əvon iştə arədə voteydəbin: «Hərçənd Yəhya hiç qıləy əlomət nişo nıkoən, çı Odəmi barədə çəy votə sıxanon həmməy rost beşin». ⁴² Vey odəmi əyo bə İsa imon vardışe.

İsa mardə Lazari bəyji kardeydə

11 Lazar nomədə qıləy odəm noxəş qınıyəbe. Əv deştə hovon Məryəmi iyən Marfə Betanyə nomədə biə diədə jiyeydəbe. ² Im həmonə Məryəmbə ki, ətrinə ruyən dəbəsuyə bə Rəbbi lınqon iyən deştə muyon bəmoles. Noxəş qınıyə Lazarən çəy boəbe. ³ Əve çəy dıqlə hovə xəbə vıǵandışone bə İsa: «Ya Rəbb, İştı piyə odəm noxəşe». ⁴ İsa ımı məseədə votışe: «Çı noxəşi səkiştə marde ni, bo Xıdo izzətiyə iyən deçimi vositə bə Xıdo Zoə izzət doə bəbe».

⁵ İsa piyeydəşbe Marfə, çəy hovə iyən Lazar. ⁶ Demiyən jıqo məseədə Lazari noxəş qınıyē, həniyən dı ruj mande İştə biə vırədə. ⁷ Çəyo votışe Bəştə şoqirdon: «Boən ijən bışəmon bə Yəhudəy». ⁸ Şoqirdon votışone Bəy: «Rabbi, əyo biə Yəhudiyon nıbin məqəm, piyeydəşonbe Tını sıǵbəse bıkən, ijən əyo oqardeydəş?» ⁹ İsa cəvob doşe: «Bəqəm rujədə donzə saat ruşnə beydəni? Ki bəruj bınəvo, dənıbəqijye, çumçiko in dınyo ruşnə vindeydə. ¹⁰ İntasi ki şanqo bınəvo, dəbəqine çumçiko bəvədə nur ni». ¹¹ İsa in sıxanon bəpeştə votışe bəvon: «Çəmə dust Lazar hitə. Az şeydəm boəy pekarde». ¹² Bəvədə şoqirdon votışone Bəy: «Ya Rəbb, qirəm hitəbo, xəş bəbe». ¹³ İsa çəy marde barədə votəşbe, əmma əvon jıqo zınəşone ki, çəy hitəy barədə votəşe. ¹⁴ Bəvədə İsa bərmalə votışe bəvon: «Lazar mardə. ¹⁵ Azən bəşmə qorə, boşmə imon vardeyro şo beydəm ki, Az əyo bənım. Əmma boən bışəmon çəy tonə». ¹⁶ «İkiz» nomədə biə Tomasi votışe bə qılə şoqirdon: «Əmənən bışəmon ki, bımardəmon de İsa».

¹⁷ İsa oməy, zınəşe Lazar həni çə ruje ki, ğəbədəy. ¹⁸ Betanyə bə Yerusəlimi nezbe, çəvon arədə ponzə stadi məsofə hestbe. ¹⁹ Vey Yəhudiyon oməbin bəçəvon boə qorə dılvandı bıdən bə Marfə iyən Məryəmi. ²⁰ Marfə çə İsa ome məseədə, beşe Bəçəy pişvoz, Məryəm isə kədə mandəbe. ²¹ Marfə votışe bə İsa: «Ya Rəbb, qirəm Tı iyo bəbeş, çəmə boə nəmardi. ²² Əmma esətən zıneydəm ki, Tı Xıdoku jıçiy bıpiyo, Xıdo Bətı bədo». ²³ İsa votışe bəy: «İştı boə bəyji bəbe». ²⁴ Marfə votışe Bəy: «Zıneydəm ki, Bəyjibey vaxti, Hıkmı Rujədə əvən bəyji bəbe». ²⁵ İsa votışe bəy: «Bəyjibey iyən jimon doəkəs Azim. Bəmı imon vardəkəs bımardoən, bəjiyey, ²⁶ jiyəkəs iyən Bəmı imon vardəkəsən hiç vaxti əmardını. Bımı imon vardeydəş?» ²⁷ Marfə cəvob doşe Bəy: «Bəle, ya Rəbb, imon vardeydəm ki, bə dınyo omənin biə Xıdo Zoə Məsih Tınış».

²⁸ Marfə ımı vote bəpeştə şe niyoni sədo kardışe iştə hovə Məryəm iyən votışe: «Ustod iyoy, tını sədo kardeydə». ²⁹ Məryəm ımı məsencən rəyrə əşte şe İsa tonə. ³⁰ İsa hələ dəşənıbe bə di, çə Marfə Əy pişvoz kardə vırədə mandəbe. ³¹ De Məryəmi bə ico kədə biə iyən bəy dılvandı doə Yəhudiyon vindeədə ki, əv rəyrə əşte beşe bə benton, jıqo zınəşone ki, bo bəme şeydə ğəbi tonə. Bı səbəb əvonən şin çəy dumo. ³² Məryəm oməy bə İsa biə vırə, vindışe Əv iyən dəqınıyē Bəçəy po, votışe: «Ya Rəbb, şayət Tı iyo bəbeş çımı boə nəmardi». ³³ İsa vindeədə ki Məryəm iyən çəy tonə omə Yəhudiyon bəmeydən, nıǵılə ah kəşəşe iyən ğərəǵəydi qəte. ³⁴ İsa parsəy çəvonku: «Konco noəyone əv?» Votışone Bəy: «Ya Rəbb, boy diyəkə». ³⁵ İsa bəməy. ³⁶ Bəvədə Yəhudiyon votışone: «Buni çənə piyeydəşebən Əv!» ³⁷ İntasi çəvonədə kali kəsi votışe: «Kuy çəşon okardə Im Şəxs nəzni jıçiy karde ki, ım odəm nəmardi?»

³⁸ Bəvədə İsa bərk həyəconi dilədə ijən nez oməy bə ğəbi. Ğəb qıləy məǵarəbe iyən çəy qəvisə sıǵ penə bəbe. ³⁹ İsa votışe: «Sıǵı peqətən». Çə mardə hovə Marfə votışe Bəy: «Ya Rəbb, həni əy bu kardəşe, çumçiko çə ruje mardə». ⁴⁰ İsa votışe: «Oxo Az bətı nıvotime ki, imon biyoş, Xıdo izzəti bəvindəş?» ⁴¹ De jıqo peqətışone sıǵ. İsa edyəsəy bə osmoni, votışe: «Ha Pıə, şukur kardeydəm Bətı ki, Mını məseydəş. ⁴² Az zıneydəm ki, Tı hejo Mını məseydəş. İntasi ımı voteydəm ki, Çımı qırdo mandə xəlǵ bıvındı iyən əvon boə bıkən ki, Tı Mını vıǵənde». ⁴³ İsa in sıxanon vote bəpeştə vanqipuri zikkə jəşe: «Lazar, beşi bə benton!» ⁴⁴ Mardə beşe bə benton. Çəy dast-poçə pepuştə biə de kəfəni iyən dimış de sipiyə pəlu dəbastə bəbe. İsa votışe bəvon: «Okən əy iyən vadən bışu».

⁴⁵ Bəvədə Məryəmi tonə omə vey Yəhudiyon vindışone çe İsa kardəyon, imon vardışone Bəy.
⁴⁶ İntasi çəvonədə kali kəson şin çe fəriseyon tonə, qəp jəşone boəvon çe İsa kardəyon.

Fəriseyon eçin qətişone bo İsa kışte

⁴⁷ Bəvədə sər kahinon iyən fəriseyon qırdə kardışone Ali Şurə, votışone: «Çiç bıkəmon? Im Odəm vey mecuzon nişo kardeydə. ⁴⁸ Qıram Bəy mane nıbomon, həmməy imon bəvarden Bəy. Romavijonən bomen çəmə məbədi iyən milləti məhv bəkarden». ⁴⁹ Əyo bıəkəson qıləyni, həmonə sori sər kahin bıə Kayafa votışe bəvon: «Şımə zıneydənişon hiçiy. ⁵⁰ Məqər şımə sərəseydənişon ki, milləti həmməy məhv beysən, qıləy Odəmi bo xəlgi marde həniyən çoke?» ⁵¹ Əy İştəku nıvotışe ın sıxanon, intasi həmonə sori sər kahin beyro peyğəmbərəti kardışe, xəbə doşe ki, İsa bı milləti qorə bəmarde. ⁵² Əncəx bı milləti qorə ne, çe Xıdo bə har tərəf pevilo bıə fərzəndon bə ivirə qırdə kardeyro bəmarde. ⁵³ Jıqəən əvon çə rujiku eçin qətişone bo İsa kışte.

⁵⁴ Bı səbəb İsa həni oşko nəveydənişon Yəhudiyon dilədə. Şe çəvrəyku bə daşti nez bıə qıləy vırə, Efrayim nomədə bıə şəhr iyən Deştə şoqirdon mande əyo.

⁵⁵ Çe Yəhudiyon Pasxə id nez beydəbe. Vey odəmon məmləkəti har vırəyo Pasxə bənav pok beyro oməbin bə Yerusəlim. ⁵⁶ Əvon nəveydəbin bo İsa iyən mandəbin məbədədə, bə iyəndi voteydebin: «Çoknə fameydon? Əv hiç nıbome bə id?» ⁵⁷ Sər kahinon iyən fəriseyon əmr doəşonbe ki, «Çəy vırəy zınəkəs xəbə bıdə bəmə», əmə bıqətəmon Əy.

Məryəmi bə İsa ğıymətinə ruyən dəsuvey

12 Pasxəku şəş ruj bənav İsa oməy bə Betanyə. Çe İsa mardon dilədə bəyji kardə Lazarən əyobe. ² Ziyofət doşone əyo bə İsa şərəf. Marfə xıdmət kardeydəbe. Lazarən de İsa ivirədə bə surfə niştəkəson arədəbe. ³ Məryəmi isə peqətişe i litrə vey ğıymətinə xalisə nardə ruyən dəsuşe bə İsa lınqon, moləşe deştə muyon. Ruyəni ətrinə bu eqətişe kə. ⁴ İntasi çe İsa şoqirdonədə qıləyni, Yəhudə İskaryoti, kom qılə ki xəyonət bəkardə bə İsa, votışe Bəy: ⁵ «Boçi ın ətir həvatə nıbe bə sesa dinar iyən çəy pul doə nıbe bə kosibon?» ⁶ Əy bə kosibon ğəyd mandeyro nıvotışe ın sıxan, dızd beyro votışe, çumçiko bəyku bıə pulə ğotiyədə bıə pulonədə dızdeydəbe. ⁷ Bəvədə İsa votışe: «Bıdə ımı bıkə ki, Boçımı dəfni ruji oqəti. ⁸ Çumçiko kosibon hejo şımə tonon, Az isə hejo şımə tonə nıbəbem».

⁹ Yəhudiyonədə vey odəm zıneədə çe İsa əyo bey, əncəx bə İsa qorə ne, həmə mardon dilədə Çəy bəyji kardə Lazari vindeyro oməbin. ¹⁰ Bəvədə sər kahinon iştə arədə eçin qətişone ki, Lazariyən bıkiştın. ¹¹ Çumçiko bə Lazari qorə vey Yəhudi bə İsa imon vardeydəbe.

Çe İsa bə Yerusəlim daxil bey

¹² Maşkinə ruji bə id omə vey odəm məseədə İsa bə Yerusəlim ome, ¹³ əvon peqətişone xımoə xolon, beşin Boəy pişvoz karde. Əvon

«Hosanna!

Xəy-dıvoyn bıbu de Rəbbi nomi omə İsraili Xıdo!»

vote-vote zikkə jəydəbin. ¹⁴ İsa pəydo kardışe qıləy həkıtə peniştə bəy. Çoknə ki nıviştə bıə:

¹⁵ «Ha Sioni kinə, mətars

Imeha, ıştı Podşo

Peniştə bə qıləy həkıtə omeydə».

¹⁶ Çəy şoqirdon bəvədə sənirəsəyn bımon. İntasi İsa izzətin be bəpeştə bə yod vardışone Çəy barədə nıviştə bıəyon iyən xəlgi çoknə pişvoz kardəşe Əv. ¹⁷ Lazari ğəbo sədo kardeədə, əy mardon dilədə bəyji kardeədə de İsa ivirədə bıə odəmon şoydəti kardışone bımi. ¹⁸ Əve xəlğ beşe Bəçəy pişvoz ki, məsəşonbe İsa nişo kardəşe ın əlomət. ¹⁹ Fəriseyon isə votışone bə iyəndi:

«Vindeydon, çəmə dasto hiçiy omeydəni. Həmə xəlğ həni Çəy dumo şeydə».

İsa İştə bı nezoni mardey barədə voteyda

²⁰ İdədə bə Yerusəlim oməkəson dılədə kali Yunanonən hestbin. ²¹ Əvon oməyn çe Qalileyə Betsaydə şəhro bıə Filipi tonə, xahiş kardışone çəyku: «Əğə, əmə piyeydəmone bıvındəmon İsa». ²² Filip şe votışe bə Andrey, Andrey iyən Filip bə ivirə şin xəbə doşone bə İsa. ²³ İsa cəvobədə votışe: «Bəşəri Zoə izzətin bey vaxt oməy. ²⁴ Rosti, rosti voteydam bəşmə: qirəm qıləy qandımə qılə bə zəmin eqını nımaro, coyli bəmande, əmma bımaro, veyə məhsul bədo. ²⁵ İştə conı piyəkəs əy qin bəkarde, ıştə conı bı dınyoədə nıpiyəkəs isə bo zolə jimoni əy nığo bəkarde. ²⁶ Ki Bəmı xıdmət karde piyeydəşe, bıdə bo Çımı dumo. Az konco bıbom, Çımı xıdmətəvonən əyo bəbe. Ki Bəmı xıdmət bıko, Pıə hurmət bəkarde bəy.

²⁷ Esət gərəğəydi qətəşe Çımı dili! Çiç bıvotım? “Ha Pıə, Mını xılos bıkə çı saatiku” bıvotımbu? İntasi Az hejo bo ın saati oməym. ²⁸ Ha Pıə, izzətin bıkə İştə nomi!» Bəvədə osmono qıləy sədo oməy: «İzzətin kardımə İştə nomi, ijənən izzətin bəkardem!» ²⁹ Əyo pemandə xəlği i gısmi votışe ki, «osmoni qurrə kardışe», co qıləyon isə «qıləy mələki qəp jəşe Deəy» votışone. ³⁰ Bəvədə İsa votışe: «In sədo Bomı ne, boşmə oməy! ³¹ Imeha, esət hıkm doə bəbe bı dınyo iyən çəy hıkmədor bıə Şəyton bə kəno şodoə bəbe. ³² Keyne Az zəminiku bə pe rost kardə bıbom, həmə insonon cəzb bəkardem Bəştə». ³³ İsa ımı İştə çı curə mardey barədə voteydəbe. ³⁴ Xəlği cəvob doşe Bəy: «Tovrat omuteyde ki, Məsih zol bəmande. Bəs Tı boçi “Bəşəri Zoə bə pe rost kardənine” voteydeş? Kiye ım Bəşəri Zoə?» ³⁵ Bəvədə İsa votışe bəvon: «Kamişə mıddətən Nur şımə arədə bəbe. Bınəvən, çanə ki, hestione nur, bıdə toyki nıqəti şıməni. Çumçıko toykiədə nəvəkəs zıneydəni bə kovrə şeydə. ³⁶ Nur şıməku bıə vaxti bə Nuri imon biyənen ki, şımənən Nuri fərzəndon bıbən». İsa ın sıxanon vote bəpeştə şe niyo be çəvonku.

Xəlği inodkorəti

³⁷ Diyə məkə ki, İsa anə əlomət nişo kardəşe çəvon vədə, əvon ijən imon vardeydənin bin Bəy.

³⁸ İmon əve bin ki, Yeşayə peyğəmbəri votə ın sıxanon bə vırə bırasın.

«Ya Rəbb, ki bovə kardışe bəçəmə xəbə,
Rəbbi gıdrət bəki zahir be?»

³⁹ Əvon imon varde zıneydənin bin, bə səbəb ki, Yeşayə ijənən votəşe:

⁴⁰ «Xıdo ku kardışe çəvon çəşon
İyən bə sığ oqırdınışe çəvon dılən, səkiştədə
Nıvındın deştə çəşon,
Sənırasın deştə dılən
İyən Bəçımı tərəf nıqardın ki,
Az şifo bıdəm bəvon».

⁴¹ Yeşayə çe İsa ehtişomi vindeyro, Çəy barədə votəşe ın sıxanon. ⁴² Hətto rəhbəron veyni imon vardışone bə İsa, intasi bə fəriseyon qorə ımı oşko nıkardışone ki, sinaqoqo tojniyə nıbun.

⁴³ Çumçıko vey piyəşone insononku izzət səy, bəsə Xıdoku izzət səysən.

⁴⁴ İsa vanqıpurı votışe: «Bəmı imon vardəkəs Bəmı ne, Bəçımı Vığandəkəsi imon vardeyde.

⁴⁵ Mını vindəkəsən Mını Vığandəkəsi vindeyde. ⁴⁶ Az Nurim, bə dınyo oməym ki, Bəmı imon vardə har kəs toykiədə nımandı. ⁴⁷ Ki Çımı sıxanon bıməso, bəvon rıoyət nıko, Az mıhokimə nıbəkardem əy, çumçıko Az dınyo mıhokimə kardeyro ne, əy xılos kardeyro oməym. ⁴⁸ Mını rədd kardəkəsi, Çımı sıxanon gəbul nıkardəkəsi mıhokimə bıkə heste: ım Çımı votə sıxane ki, Xıdo Hıkmı Rujədə mıhokimə bəkarde əy. ⁴⁹ Çumçıko Az İştəku nıvotıme, Mını Vığandə Pıə

əmr kardışe Bəmi ki, çiç bivotım, çiç qəp bijənım. ⁵⁰ Az zıneydəm ki, Çəy əmr bə zolə jimon bardeydə. Milxəs, P1ə çiç votışe Bəmi, Azən votime əvoni bəşmə».

İsa İştə şoqirdon lınqon şışteydə

13 Pasxə idi ərəfəbe. İsa zıneydəbe Çəy çı dınyoku co bey, P1ə tonə şey vaxt həni omə. Əy dınyoədə Bəştə məxsus bəkəson piyəşbe, detosə oxoyən piyəşe iyən əmələdə nişo kardışe. ² Şanqonə harde vaxti iblisi həni noəşbe bə Simon İskaryoti zoə Yəhudə dil bə İsa xəyonət karde fikir. ³ İsa zıneydəbe P1ə Bəçəy ixtiyor doəşe har çiy, Əv Xıdoə beşə omə iyən obəqarde bə Xıdo. ⁴ Bəvədə Əv əşte surfəku, evatışe İştə səpenə olət noşe bə kəno, peqətişe qıləy dastmol dəbastışe Bəştə peşti. ⁵ Çəyo dəmande bə ləqən ov ekarde, İştə şoqirdon lınqon şışte iyən de Bəştə peşti dəbastə dastmoli mole. ⁶ İsa nez omeədə bə Simon Peteri, Əy votışe bə İsa: «Ya Rəbb, T1 çımı lınqon bəşışteş?» ⁷ İsa cəvobədə votışe bəy: «T1 esət sərəseydəniş Az çiç kardeydəm, əmma peşo səbərəseş». ⁸ Peteri votışe Bəy: «T1 əslo nıbəşışteş çımı lınqon!» İsa cəvob doşe bəy: «Qirəm nışıştom, Çımı tonə ıştı vırə nıbəbe». ⁹ Simon Peteri votışe Bəy: «Ya Rəbb, bəvədə əncəx çımı lınqon ne, çımı dastonən iyən səyən bışışt». ¹⁰ İsa votışe bəy: «Bo dəniştə odəmi əncəx lınqon şışte vəse, çumçiko əv səykubəpo təmize. Şımə təmizişon, əmma həmməy ne». ¹¹ Əv zıneydəbe, ki xəyonət bəkardə Bəy, əve «həmməy təmiz nişon» votışe.

¹² İsa çəvon lınqon şışte bəpeştə tankardışe İştə olət iyən nişte bə surfə, votışe bəvon: «Şımə sərəseyon Az çiç kardime boşmə? ¹³ Şımə Bəmi “Ustod” iyən “Rəbb” mırocət kardeydən, rost voteydən, çumçiko Az hejo Əvim. ¹⁴ Esət ki, Az Rəbb iyən Ustod be-be şıştımə şımə lınqon, şımənən şıştənişon iyəndı lınqon. ¹⁵ Az bəşmə nımunə nişo kardime ki, şımənən Çımı bəşmə kardəyon bə iyəndı kardənişon. ¹⁶ Rosti, rosti voteydəm bəşmə: ğul baş ni ıştə əğsə, daynən çəy vığandəkəsisə. ¹⁷ Şayət şımə imoni bıznon, əməl bıkon, baxtəvərişon.

¹⁸ Az şımə həmməy barədə voteydənim, İştə səçın kardəkəson zıneydəm. Əmma bıdə ın Nıviştəy bə vırə bırası “Çımı nuni hardəkəs Bəçımı əleyhi beşe”. ¹⁹ Esə Bəmi xəyonət nıbə bənav Az bəşmə voteydəm ki, imon beədə şımə bovə bıkən: Əv Azim. ²⁰ Rosti, rosti voteydəm bəşmə: Çımı vığandəkəsi ğəbul kardəkəs Mını ğəbul kardeydə, Mını ğəbul kardəkəsən Mını Vığandəkəsi ğəbul kardeydə».

İsa oşko kardışe xəyonətkor

²¹ İsa ın sıxanon vote bəpeştə bərk bə təloş dəşe iyən jıqo şəhodət kardışe: «Rosti, rosti voteydəm bəşmə: şımənədə i kəs xəyonət bəkardə Bəmi». ²² Şoqirdon nıznəşone Əv çiki barədə qəp jəydə, saysiməbin, edyəsəyn bə iyəndı. ²³ Çəy şoqirdonədə qıləyni – çe İsa ən azizə şoqirdi ıştə sə nez kardəşbe bə İsa. ²⁴ Simon Peteri işorə kardışe bə həmonə şoqirdi ki, Çəyku bıparsı çiki barədə ımı voteydə. ²⁵ Əv enəməy çe İsa sinəsə parsəşe Çəyku: «Ya Rəbb, əv kiye?» ²⁶ İsa cəvob doşe: «Az ın nunətikə bə piyolə ejənım bəki bıdom, bızın əve». Əy ejəşe tikə doşe bə Simon İskaryoti zoə Yəhudə. ²⁷ Yəhudə nunətikə səy bəpeştə Şəyton dəşe bəçəy dilə. Bəvədə İsa votışe bəy: «Çiç kardənişbu, rəyrə bıkə!» ²⁸ Sufredə nıştəkəson hiç qıləyni bə sə dənişin İsa boçi votışe ımı. ²⁹ Puləgoti Yəhudəku beyro, kali kəson qımon kardışone ki, İsa voteydə bəy «bo idi lozim bıə çiyon bıhır bəmə», yaanki «jıçiy bıdə bə kosibon». ³⁰ Yəhudə çoko səşe nunətikə, əlbəhol beşe bə benton. Şanqobe həni.

Bıpiyənen iyəndı

³¹ Əv beşe bəpeştə İsa votışe: «Esə Bəşəri Zoə izzətin be iyən Xıdoən izzətin be Bəvədə. ³² Esə ki Xıdo izzətin be Bəvədə, Xıdoən Əy izzətin bəkardə İştənədə, rəyrə izzətin bəkardə. ³³ Ha Çımı fərzəndon! Kamişe mıddətən deşmə bəbem. Şımə bənəveyon Bəmi. Çoknə ki votime bə

Yəhudiyon “Şimə Bəçımı şə vırə ome nıbəzineşon” esət bəşmənen imi voteydəm. ³⁴ Bəşmə qıləy tojə əmr doydəm: bıpiyənen iyəndı, Az şiməni piyəy ğəzinə şimənen bıpiyənen iyəndı. ³⁵ Qirəm şimə arədə mehıbbət bıbo, həmə odəmon bəzinen ki, şimə Çımı şoqirdoniyon».

İsa navo voteydə Peteri həşə barədə

³⁶ Simon Peter parsəy İsaku: «Ya Rəbb, bə kovrə şeydəş?» İsa cəvob doşe: «Tı Bəçımı şə vırə esət Çımı dumo ome əzınış, əmma peşo bomeş Çımı dumo». ³⁷ Peteri votışe Bəy: «Ya Rəbb, boçi esət İştı dumo ome əzınım? İştə conı bədom Botı». ³⁸ İsa votışe bəy: «İştə conı bədoş Bomı? Rosti, rosti voteydəm bətı: suk hande bənav tı Mını se kərə bə həşə bəjeş.

İsa bə Xıdo şə roye

14 Bıdə şimə dilon bə təloş dənışun. Bə Xıdo imon biyən, Bəminən imon biyən. ² Çımı Pıə kədə veyə məskən heste. Qirəm nəbəy, bəşmə əvotim ki, Az boşmə vırə hozı kardeyro şeydəm? ³ Şeydəm boşmə vırə hozı karde bəpeştə ijən bomem şiməni iştə tonə bəbardem ki, şimənen Çımı bıə vırədə bıbən. ⁴ Şimə Çımı şə vırəy roy zıneydəşon».

⁵ Tomasi votışe bə İsa: «Ya Rəbb, İştı bə kovrə şey zıneydənimon, roy çoknə bəzınemon?» ⁶ İsa votışe bəy: «Ro, həğigət iyən jimon Azim. Çımı vositə nıbə hiç kəs çe Pıə tonə ome nıbəzine. ⁷ Şayət Mını zınəyonbəy, Çımı Pıən əznıyon. Esətiku şimə zınəone Əv, vindəone Əv». ⁸ Filipi votışe Bəy: «Ya Rəbb, nişo bıkə Pıə bəmə, ım boəmə vəse». ⁹ İsa votışe bəy: «Xəyli vaxte ki, Az deşmənim, Mını nızne bəqəm, Filip? Mını vindəkəsi, vindəşe Pıən. Bəs tı boçi “nişo bıkə Pıə bəmə” voteydəş? ¹⁰ Bəqəm tı bovə kardeydənış Az Pıədəm, Pıən Bəminədəy? Bəşmə votə sıxanon İştəku voteydənim, Bəminədə bıə Pıə İştə koon kardeydə. ¹¹ Bovə bıkən Bəmı: Az Pıədəm, Pıən Bəminədə. Bəmı bovə kardeydəniyonbu, lamələy bə koon qorə bovə bıkən. ¹² Rosti, rosti voteydəm bəşmə: Bəmı imon vardə şəxs iştənən Çımı kardə koon bəkarde, hətto çımənsə ziyodəy bəkarde. Çumçiko Az Pıə tonə şeydəm ¹³ iyən Deçımı nomi harçi bıpiyone, əy bəkardem ki, Pıə izzətin bıbu Zoədə. ¹⁴ Qirəm Deçımı nomi Çımıku harçi bıpiyone, Az bəkardem.

Mığəddəsə Rufi barədə vəd

¹⁵ Qirəm piyeydone Mını, Bəçımı əmron rioyət bəkardeyon. ¹⁶ Azən Pıəku əjo bəkardem iyən Əv boşmə co qıləy Vəsodətəvon bəvığənde ki, hejo deşmə bıbu. ¹⁷ Əv həğigəti Rufe. Dınyo ğəbul karde əzını Əy, çumçiko nə vindeydə, nəən zıneydə Əy. Şimə isə Əy zıneydon, çumçiko deşmə mandeydə iyən şimə dilətonədə bəbe. ¹⁸ Az şiməni yətim nıbəhaştəm, bomem şimə tonə. ¹⁹ Kamişe mıddəti bəpeştə dınyo həni Mını nıbəvinde, əmma şimə bəvindeyon Mını. Az jiyeyro şimənen bəjiyəşon. ²⁰ Həmonə ruji bəzineşon ki, Az Pıədəm, şimə Bəminədəşon iyən Az şimənədəm. ²¹ Ki Çımı əmron zıneydə, əvoni bə vırə rosneydə, Mını piyəkəs əve. Hərki piyeydəşe Mını, Çımı Pıən bəpiyəşe əv. Azən bəpiyeme əv iyən İştəni bəy zahir bəkardem».

²² İskaryot ne, ə qılə Yəhudə votışe Bəy: «Ya Rəbb, çoknə bəbe ki, İştəni bə dınyo ne, bəmə zahir bəkardəş?» ²³ İsa cəvob doşe bəy: «Ki bıpiyoşe Mını, Bəçımı sıxanı rioyət bəkardə, Çımı Pıən bəpiyəşe əv iyən Əmə bomemon çəy tonə, deəy səbəso bəbemon. ²⁴ Mını nıpiyəkəs isə Bəçımı sıxanon rioyət əkəni. Şimə məsə sıxan Çımı ne, Mını vığəndə Pıə sıxane.

²⁵ Az hələ ki şimə tonom, ın sıxanon votəme bəşmə. ²⁶ İntasi Vəsodətəvon, çe Pıə Deçımı nomi vığəndə Mığəddəsə Ruf har çiy obəmute bəşmə iyən Çımı votə həmə sıxanon bəşmə yod bəvarde. ²⁷ Az sulh noydəm şimə arədə şeydəm, İştə sulhi bəşmə doydəm. Az doydənim əy dınyo bəşmə doy ğəzinə. Bıdə şimə dil bə təloş dənışu iyən mətarsən. ²⁸ Məsəone Çımı bəşmə votəyon “esə şeydəm, peşo ijən bomem şimə tonə”. Qirəm piyəyonbəy Mını, Bəçımı çe Pıə tonə şey şo əbiyon, çumçiko Pıə başe Çımısə. ²⁹ Esə imi navo votime bəşmə ki, ım beyədə bovə bıkən

bımı. ³⁰ Həni vey qəp nıbəjem deşmə, çumçiko bı dınyo əğəti bı kə omeydə iyən çəy Çımı səpe hıkmronəti nişe. ³¹ Əmma dınyo zınənine ki, Az piyeydəme Pıə iyən Pıə Bəmı çıç əmr kardışebo, bəy əməl kardeydəm. Esət isə bəştən bışəmon çıvrəo.

Rəz iyən xıçon

15 Az həğiğiyyə Rəzim, Çımı Pıə Boğbone. ² Bəminədə bıə bəhrə nıdoə har xıçə Çımı Pıə bırneydə. Bəhrə doə har xıçə isə opoteydə təmiz kardeydə ki, həniyən veyə bəhrə bıdə. ³ Çımı bəşmə votə sıxani hı cubətədə şımə həni təmiziyon. ⁴ Bəminədə bımandən, Azən şımənədə bımandım. Xıçə rəzədə nımando, ıstəku bəhrə varde nıbəzine, jəqoən, şımənən Bəminədə nımandon, bəhrə varde əzınışon. ⁵ Az Rəzim, şımə isə xıçəyon. Ki Bəminədə bımando, Azən bəvədə bımandom, veyə bəhrə bəvarde, çumçiko Bəmı hiçi karde əzınışon. ⁶ Ki Bəminədə nımando, bənə xıçə bə kəno şodoə bəbe, hışk bəbe. Jıqo xıçon qırdə kardeydən, şodoydən bə otəş, suteydən. ⁷ Qirəm Bəminədə bımandon iyən Çımı sıxanon şımənədə bımando, çıç orzu bıkon, bıpiyənen, doə bəbe bəşmə. ⁸ Deşmə veyə bəhrə vardey iyən Çımı şoqirdon bey, Çımı Pıə izzətin beydə. ⁹ Pıə Mını piyəy gəzinə Azən piyəme şıməni. Çımı mehıbbətədə bımandən. ¹⁰ Şayət Bəçımı əmron rioyət bıkon, Çımı mehıbbətədə bəmandeyon, çoknə ki, Az Bəştə Pıə əmron rioyət kardeydəm, Çəy mehıbbətədə mandeydəm.

¹¹ Az imoni bəşmə votime ki, Çımı şoyvo şımənədə bıbu iyən şımə şoyvo mıkəmməl bıbu. ¹² Çımı əmr jıqoye: Az şıməni piyəy gəzinə, şımənən bıpiyənen iyəndı. ¹³ Hiç kəsi mehıbbət baş ni ıstə duston roədə ıstə jımoni fıdo kardə odəmi mehıbbətisə. ¹⁴ Şayət Çımı bəşmə hamyə əmron icro bıkon, şımə Çımı dustonişon. ¹⁵ Həni bəşmə gıl voteydənim, çumçiko gıl zıneydəni ıstə əğə kardəyon. Az bəşmə dust voteydəm, çumçiko ıstə Pıəku məsə həmə sıxanon votime bəşmə. ¹⁶ Şımə Mını səçın nı kardıone, Az şıməni səçın kardıme, təyin kardıme ki, bışən bəhrə bıyən iyən şımə bəhrə hejo bımandı. Jıqoən Deçımı nomi çıç bıpiyəne Pıəku, Əv bəşmə bədo. ¹⁷ De jıqo, əmr kardeydəm bəşmə: bıpiyənen iyəndı.

Çe dınyo nıfrət

¹⁸ Qirəm dınyo bəşmə nıfrət bıko, bızınən ki, şıməsə bənav Bəmı nıfrət kardəşe. ¹⁹ Qirəm bə dınyo aid bəbeşon, dınyo əpiyəşe ıstəno bıə şıməhon. Əmma şımə bə dınyo aid nişon, Az şıməni dınyoyo səçın kardıme, əve dınyo bəşmə nıfrət kardeydə. ²⁰ Bə yod bıyən Çımı bəşmə votə sıxani: “Gıl baş ni ıstə əğəsə”. Qirəm Mını rımuş kardışonebu, şıməniyən rımuş bəkarden. Bəçımı sıxani rioyət kardışonebu, bəşmə sıxaniyən rioyət bəkarden. ²¹ İntasi imoni həmməy Bəçımı nomi qorə bəşmə bəkarden, çumçiko Mını Vığandəkəsi zıneydənin. ²² Qirəm omənəbəym, votəmnəbəy bəvon, nəbişone qıno, əmma esə boştə qınonro manə nişone. ²³ Bəmı nıfrət kardəkəs Bəçımı Pıən nıfrət kardeydə. ²⁴ Qirəm, gərəyz Mı hiç kəsi karde nıznə koon çəvon arədə kardəmnəbəy, nəbişone qıno. Əmma esə vındışone Çımı kardəyon, nıfrət kardışone həm Bəmı, həmə Bəçımı Pıə. ²⁵ İntasi im əve be ki, çəvon Tovratədə nıvıştə bıə “Bəmı nohəx nıfrət kardışone” sıxan bə vıvə bırası.

²⁶ Çımı boşmə Pıəku vığandə Vəsodətəvon – Pıəku beşə həğiğəti Ruf omeədə Çımı barədə şəhodət bəkardə. ²⁷ Şımənən şəhodət bəkardəşon, çumçiko sıftəku Demı bə ıvırayon.

Dınyo nıznəşe nə Pıə, nəən Mını

16 Az imoni bəşmə votime ki, şımə ıstə royku bəməşən. ² Şıməni sınaqoqo bətojnən. Hətto ə vaxt omeydə ki, şıməni kıştə har kəs qımon bəkardə ki, bə Xıdo xıdmət kardeydə. ³ Əvon imoni bəkarden, çumçiko zıneydənin nə Pıə, nəən Mını. ⁴ Esə imoni bəşmə votime ki,

çəy vaxt omeədə bə yod biyən ki, Az votəmbe bəşmə. Siftəku imoni bəşmə nivotime, çumçiko deşmə bə ivirəbim.

Mığəddəsə Rufi fəoliyət

⁵ Esət həni şeydəm Mini Viğandəkəsi tonə iyən hiç kəs parseydəni Çımıku: “Tı bə kovrə şeydəş?” ⁶ Əmma Az imoni bəşmə voteyro şımə dilon de ğəhri pur bin. ⁷ Jıqəən, Az həğiğəti voteydəm bəşmə: Çımı şey bəşmə xəyriye. Qirəm Az nışom, Vəsodətəvon nıbome şımə tonə, əmma bışom Əy bəviğandem boşmə. ⁸ Əv omeədə qıno, salehəti iyən mihokimə barədə dınyo ifşo bəkarde: ⁹ qıno barədə, çumçiko Bəmı imon vardeydənin, ¹⁰ salehəti barədə, çumçiko Az şeydəm Pıə tonə iyən həni Mini nıbəvindeşon, ¹¹ mihokimə barədə, çumçiko bı dınyo əğəti kardəkəs məhkum kardə bıə.

¹² Hələ Çımı bəşmə votəninə vey sıxan hestime, əmma şımə esət əvoni ğəbul karde nıbəzineşon. ¹³ İntasi Əv – həğiğəti Ruf omeədə səbəro bəkarde şıməni bə har həğiğəti. Oxo İştəku hiçiy nıbəvotə, çiç bıməso, əy bəvotə iyən oməvədə bıəyon bəvotə bəşmə. ¹⁴ Əv Mini izzətin bəkarde, çumçiko Çımı sıxanon pebəqəte bəşmə bərosne. ¹⁵ Pıə çiçiş hestebu, Çımıne. Bı səbəb votime: “Mığəddəsə Ruf Çımı sıxanon pebəqəte bəşmə bərosne”.

Şımə kədər bə şoyvo obəqarde

¹⁶ Kamişə mıddəti bəpeştə Mini nıbəvindeşon, çəyo ijənən kamişə mıddəti bəpeştə Mini bəvindeşon». ¹⁷ Bəvədə çe İsa kali şoqirdon votışone bə iyəndı: «“Kamişə mıddəti bəpeştə Mini nıbəvindeşon, çəyo ijənən kamişə mıddəti bəpeştə Mini bəvindeşon” iyən “çumçiko Az çe Pıə tonə şeydəm” sıxanon məno çiçə?» ¹⁸ İştə arədə parseydəbin: «Çəy votə “ın kamişə mıddət” çiçə? Bəçəy votəyon sərəseydənimon». ¹⁹ İsa faməşe ki, əvon piyeydəşone bıparsın Çəyku, votışe: «“Kamişə mıddəti bəpeştə Mini nıbəvindeşon, çəyo ijənən kamişə mıddəti bəpeştə Mini bəvindeşon” Çımı sıxani barədə iyəndıku parseydon? ²⁰ Rosti, rosti voteydəm bəşmə: şımə bəbəmeyon nolə bəkəşeyon, dınyo isə şoy-şoy bəkarde, şımə kədər bəbəşon, əmma şımə kədər bə şoyvo obəqarde. ²¹ Jen zandə vaxti kədər bəbə, çumçiko çəy vaxt rəsə. Əmma əğili zandə bəpeştə bə dınyo qıləy inson vardeyro şoy-voy bəkarde, ıştə kəşə doji yodo bebəkarde. ²² Jıqəən, şımənən esət kədərinişon. İntasi Az ijən bəvindem şıməni, bəvədə şo bəbə şımə dil iyən hiç kəs şımə şoy-şoy şıməku səy əzını. ²³ Həmonə ruji Çımıku hiçiy nıbəparseşon. Rosti, rosti voteydəm bəşmə: Deçımı nomi Pıəku çiç bıpiyone, Əv bədo bəşmə. ²⁴ Tosə esə Deçımı nomi hiçiy nıpiyone. Bıpiyənən, bəsteşon. Bıdə şımə şoy-şoy kamil bıbu.

²⁵ Az de eyhomon votime imoni bəşmə. Esət ə vaxt omeydə ki, həni de eyhomon nıbəvotem, əmma Pıə barədə oşko qəp bəjem boşmə. ²⁶ Ə ruji şımə Deçımı nomi bəpiyone. Az voteydənim əjo bəkardem Pıəku şımə barədə jıçiy. ²⁷ Oxo Pıə İştən şıməni piyeydəşe, çumçiko şımə piyəone Mini iyən bovə kardıyone ki, Az Xıdo beşəm oməm. ²⁸ Az Pıə beşəm oməm bə dınyo, iyən dınyo tərq kardeydəm, Pıə tonə şeydəm».

²⁹ Çəy şoqirdon votışone: «İmha, esət oşko voteydəş, hiç qıləy eyhom jəydəniş. ³⁰ Esət sərəseydəmon ki, Tı har çiy zıneydəş, İştə ehtiyoci ni ki bıparsı çiçiyəsə. Bıçımı qorə əmə bovə kardeydəmon ki, Tı Xıdo beşəş oməş». ³¹ İsa votışe bəvon: «Esə bovə kardeydəşon? ³² İmha, omeydə ə vaxt iyən həni oməy ki, şımə har qıləyni pevilo bəbəşon, bəşəşon bəştə kə, coyli bahaştəşon Mini. Əmma Az coyli nim, çumçiko Pıə Demine. ³³ Əvə votime imoni bəşmə ki, Bəminədə sulh pəydo bıkən. Dınyoədə əzyəton bəbə, əmma ciqəmand bıbən! Az ğalib oməym bə dınyo».

İsa İştə barədə divo kardeydə

17 İsa imoni vote bəpeştə edyəsəy bə osmoni votışe: «Ha Pıə, vaxt oməy, İştə Zoə izzətin bıkə ki, Zoən Tını izzətin bıkə. ² Tı həmə bəşəri səpe hıkmronəti doy Bəy ki, Əv zolə jimon bıdə İştı Bəy doə bə şəxson həmməy. ³ Zolə jimonən ime ki, bızının Tını – iqlə həğiğiye Xıdo iyən İştı vığandə İsa Məsihi. ⁴ Az bə vırə rosnime İştı Bəmı asbardə ko, deəy izzətin kardıme Tını dınyoədə. ⁵ Ha Pıə, esət Tı izzətin bıkə Mını İştə tonə, ə izzət ki dınyo ofəyə nıbə bənav Az Detı ivrədə beədə hestimbe.

İsa bo şoqirdon divo kardeydə

⁶ Az oşko kardıme İştı nomi dınyoyo Bəmı doə bə odəmon. Əvon İştıbin, Tı doy Bəmı iyən əvon Bəştı sıxani rioyət kardışone. ⁷ Esətən əvon zıneydən ki, Bəmı doə bıə həmə çiyon İştıku omeydən. ⁸ Çumçıko Az votıme bəvon İştı kəlom, əvonən gəbul kardışone. Həğiğətən zınəşone ki, Az İştıku beşəm oməm iyən bovə kardışone ki, Tı Mını vığandə. ⁹ Az boəvon əjo kardeydəm. Bo dınyo ne, İştı Bəmı doə bo şəxsonro əjo kardeydəm, çumçıko əvon İştının. ¹⁰ Çımı bıə har çiy İştıne, İştı bıəyonən Çımının iyən Az deçəvon vositə izzətin bim. ¹¹ Az həni dınyoədə nim, əvon isə dınyoədən iyən Az İştı tonə omeydəm. Ha Mıgəddəsə Pıə, əvoni Bəmı doə Deştə nomi nıgə bıkə ki, əvonən bənə Əmə i bıbun. ¹² Az deyəvon beədə əvoni Bəmı doə Deştı nomi nıgə kardeydəbim. Əvoni nıgə kardıme iyən çəvon hiç qıləyni həlok nıbə, gərəyz bə həloki loyiğ bıə odəmi ki, bıdə in Mıgəddəsə Nıvıştəy bə vırə bırəsı. ¹³ Esət omeydəm İştı tonə. Dınyoədə bıə vaxtı in sıxanon voteydəm ki, əvon Bəçımı mıkəmmələ şoyvo xanboz bıbun. ¹⁴ Az votıme bəvon İştı sıxan. Dınyo esə boy nıfrət kardışe bəvon, çumçıko Az bə dınyo aid nıbey gəzinə əvonən bə dınyo aid nin. ¹⁵ Əvoni dınyoyo peqəte ne, şər bıəyku nıgə kardey əjo kardeydəm İştıku. ¹⁶ Az bı dınyo aid nıbey gəzinə əvonən bı dınyo aid nin. ¹⁷ De həğiğəti təğdis bıkə əvoni. İştı sıxan həğiğəte. ¹⁸ Tı Mını bə dınyo vığandə gəzinə, Azən vığandıme əvoni bə dınyo. ¹⁹ Az İştəni boəvon təğdis kardeydəm ki, əvonən de həğiğəti təğdis bıbun.

İsa divo kardeydə İştə dumo şəkəson həmməyro

²⁰ Əncəx boəvon ne, deçəvon sıxani Bəmı imon vardə kəsonroən əjo kardeydəm ki, ²¹ həmməy i bıbun. Ha pıə, Tı Bəminədə, Azən Bətinədə bey gəzinə əvonən Bəmənədə bıbun ki, dınyo bovə bıkə Tı Mını vığandə. ²² İştı Bəmı doə izzəti Azən bəvon dome ki, Əmə i bey gəzinə əvonən i bıbun. ²³ Az bəvonədə, Tınən Bəminədə bey gəzinə həmməyəvo i bıbun ki, dınyo bızını Tı Mını vığandə iyən Tı piyeydə əvoni çoknə ki Mını piyeydə. ²⁴ Ha Pıə, piyeydəme ki, İştı Bəmı doə şəxsonən Demı bə ico Çımı bıə vırədə bıbun iyən bıvındın Çımı izzəti. Dınyo ofəyə nıbə bənav Tı Mını piyeyro doy Bəmı in izzət. ²⁵ Ha ədolətinə Pıə, dınyo Tını nıznəşe, Az isə Tını zınəme, imonən zınəşone ki, Tı Mını vığandə. ²⁶ Az İştı nomi bəyon kardıme bəvon ijən bəyon bəkardem ki, İştı Bəmı bıə mehıbbət bəvonədə bıbu iyən Az bəvonədə bıbum».

İsa qətə beydə

18 İsa imoni vote bəpeştə Deştə şoqirdon bə ivrə beşin de Kedron ləpəki ovaştin bə tərəf. Əyo qıləy boğ hestbe. İsa iyən Çəy şoqirdon dəşin əyo. ² Bəy xəyonət kardə Yəhudən ıvrəy zıneydəbe, çumçıko İsa Deştə şoqirdon rə-rə əyo qırdə beydəbe. ³ De jıqo, Yəhudə peqətişe i hənq sərbəz çe sər kahinon iyən fəriseyon vığandə kali mıhofizəkon, çəvon dastonədə çoon, vəşəposon, iyən avjoron oməyn əyo. ⁴ İsa zıneydəbe çiç bome bəçəy sə, əve beşe bənav iyən parsəy çəvonku: «Bo ki nəveydon?» ⁵ Əvon cəvob doşone Bəy: «Bo Nazaretijə İsa». İsa «Əv Azim» votışe bəvon. Bəy xəyonət kardə Yəhudən deyəvonbe. ⁶ İsa bəvon «Əv Azim» voteədə

əvon okıriyəyn bə dumo eçikəyn bə zəmin. ⁷ Bəvədə İsa ijən parsəy çəvonku: «Bo ki nəveydon?» Əvonən «bo Nazaretijə İsa» votışone. ⁸ İsa cəvob doşe: «Votime bəşmə ki, Əv Azim. Qirəm Bomı nəveydon, Çımı tonu bəkəson vadən bədə bışun». ⁹ İsa əve jıqo kardışe ki, Çəy votə sıxan bə vırə bərəsi «İştı Bəmi doə odəmonədə hiç qıləyni qin nıkardıme». ¹⁰ Simon Peteriku şımşı hestbe. Bekırnişe əv jəşe bırnişe sər kahini ğuli rostə quş. Ə ğuli nom Məlikbe. ¹¹ Bəvədə İsa votışe bə Peteri: «Bınə şımşı bə ğəmənə! Çe Pıə Bəmi doə əzobi piyolə penoşımım?»

¹² De jıqo, sərhəzo de hənqi iyən Yəhudi rəhbəron mihofizəkon qətişone İsa, dəbastışone Çəy daston. ¹³ Sıftə bardışone Əv Hanani tonu, çumçıkə Hanan həmonə sori sər kahin bıə Kayafa həsuyəbe. ¹⁴ Im həmonə Kayafabe ki, bə Yəhudi rəhbəron jıqo məsləhat doəşbe «qıləy Odəmi bo xəlği mardey çoke».

Peteri iminə həşə

¹⁵ Simon Peter iyən co qıləy şoqird şeydəbin çe İsa dumo. Sər kahin ə qılə şoqirdi zıneyro əv de İsa bə ico dəşe bə sər kahini so. ¹⁶ Peter isə pemandəbe bentonədə kəybə tonu. Bəvədə sər kahini zınə im şoqird beşe bə benton, qəp jəşe de kəybəvonə kinə iyən dənəşe Peter bə dıləton. ¹⁷ Bı arədə kəybəvonə kinə parsəy Peteriku: «Nekniki tınən çı Odəmi şoqirdonədəş?» Əy isə «xəyr, nim» votışe. ¹⁸ Sard beyro ğulon iyən mihofizəkon kiyandu sənəoşonbe əyo, mandəbin çəy qırdo iştəni tospıneydəbin. Peterən mandəbe çəvon tonu iştəni tospıneydəbe.

Sər kahini təyğat

¹⁹ Bəvədə sər kahin İsaku Çəy şoqirdon iyən təlimi barədə parsəy. ²⁰ İsa cəvob doşe bəy: «Az oşko votəme bə dınyo, çe Yəhudiyon həmməy qırda bıə sinaqoqonədə iyən məbədədə hejo təlim omuteydəbim, hiçiy niyoni votəmni. ²¹ Boçi parseydəş Çımıku? Bıpars Çımı votəyon məsə odəmonku. Oxo əvon zıneydən çiç votəme». ²² İsa ın sıxanon voteədə əyo pemandə mihofizəkon qıləyni «Jıqo cəvob doydəş bə sər kahini?» votışe, Bəy silli jəşe. ²³ İsa cəvob doşe Bəy: «Qirəm nohəx votimebu, sıbut bıkə çəy nohəx bey. Qirəm rosti votimebu, bəvədə boçi jəydəş Mını?» ²⁴ Hanani vığandışe Əv daston dəbastə holədə sər kahin Kayafa tonu.

Peteri dımınə iyən seminə həşə

²⁵ Simon Peter pemandəbe bentono iştəni tospıneydəbe. Parsəyn çəyku: «Nekniki tınən Çəy şoqirdonədəş?» Əy bə həşə jəşe «xəyr, nim» cəvob doşe. ²⁶ Sər kahini ğulon qıləyni, Peteri jə quşi bırniyə odəmi avlodbe. Həmonə ğul parsəy Peteriku: «Az tını Deəy boğədə ivirədə nıvındıme məqəm?» ²⁷ Peteri ijən bə həşə jəşe. Hejo bəvədə suki handışe.

İsa vali Pilati təyğatədə

²⁸ Çəyo Yəhudi rəhbəron bekardeşone İsa çe Kayafa tonu bardışone bə vali səray. Ruj obeydəbe. Əmma əvon iştən dəşeydənıbin bə vali səray ki, mırdol nıbun iyən Pasxə xorəki harde bızınım. ²⁹ Əve Pilat beşe bə benton, çəvon tonu votışe: «Im Odəmi de çiçi ittıhom kardeydon?» ³⁰ Əvon cəvob doşone bə Pilati: «Qirəm ım Odəm cinoyətkor nəbəy, əmə Əy bəti təslim nəkeymon». ³¹ Pilati votışe bəvon: «Peqətən şımə bəştə Ğanuni mıvofığ Əy mihokimə bıkən». Yəhudi rəhbəron votışone bə Pilati: «Çəmə ixtiyor rəseydəni bo odəm kışte hıkm bekəmon». ³² Im əve be ki, İsa iştə çoknə marde barədə işorə doə sıxan bə vırə bərəsi.

³³ Pilat ijən dəşe bə vali səray, sədo kardışe İsa, votışe Bəy: «Çe Yəhudiyon Podşo Tınış?» ³⁴ İsa cəvob doşe: «Tı ımı iştəku voteydəş, yaan co kəson Çımı barədə qəp jəşone botı?» ³⁵ Pilati votışe: «Bəqəm Az Yəhudim? İştı milləti iyən sər kahinon Tını təslim kardışone Bəmi. Bıvot, çiçi kardə?» ³⁶ İsa cəvob doşe: «Çımı Podşoəti bı dınyo aid niy. Qirəm Çımı podşoəti bı dınyo

aid bəbəy, Çımı xıdmətəvonon canq əkəyn Mini bə Yəhudi rəhbəron nahaştin təslim karde, əmma esət Çımı Podşoəti bı dınyo aid niy». ³⁷ Pilati votışe bəy: «De jıqo, Tı Podşoş?» İsa cəvob doşe: «Tı voteydəş ki, Az Podşom. Az həğiğəti barədə şəhodət kardeyro moəo bim iyən bə dınyo oməym. Bə həğiğət aid bıə har kəs Çımı sədo bəməse». ³⁸ Pilati votışe Bəy: «Həğiğət çiçe?»

İmi vote bəpeştə ijən beşe şe çe Yəhudiyon tonon votışe bəvon: «Az Bəyku hiç qıləy taxsır vindeydənim. ³⁹ Oxo şıməku qıləy adəte ki, Pasxə vaxti az boşmə qıləy odəmi ozod kardeydəm. Esə piyeydone, Yəhudiyon Podşo boşmə ozod bıkəm?» ⁴⁰ Əvon ijən zikkə jəşone, jıqo cəvob doşone: «Im odəmi ne, Barabba ozod bıkə!» Barabba isə ğuldurbe.

İsa bə marde məhkum kardə beydə

19 Bəvədə Pilati əmr kardışe de ğırmoci bijənın İsa. ² Sərbozonən teğono qıləy toc boftışone, noşone Bəçəy sə iyən tınd sıə xələt şodoşone Çəy amonsə. ³ Əvon oməyn çe İsa tonon «Çe Yəhudiyon Podşo səğ bibu!» voteydəbin iyən silli jəydəbin Bəy. ⁴ Pilat ijən beşe bə benton, votışe bə Yəhudiyon: «Imha, Əy vardeydəm bə benton şımə tonon ki, şımə bızənən ki, az Bəyku qıləy taxsır nıvındıme». ⁵ Bəvədə İsa sədə teğə toc, tanədə tınd sıə xələt beşe bə benton. Pilati votışe bəvon: «Imeha, ım Odəm!» ⁶ Sər kahinon iyən xıdmətəvonon Əy vindeədə zikkə jəşone: «Bə çomex bıkəş, Bə çomex bıkəş!». Pilati votışe bəvon: «Peqətən ıştən Əy bə çomex bıkəşən, çumçiko az Bəyku qıləy taxsır vindeydənim». ⁷ Yəhudiyon cəvob doşone bəy: «Çəmə Ğanun heste, bəçəmə Ğanuni qorə Əv mardənine, çumçiko İştəni Xıdo Zoə hisob kardeydə».

⁸ Pilat ın sıxani məseədə həniyən vey tarsəy. ⁹ İjən dəşe bə vali səray parsəy İsaku: «Tı çikonco oməş?» Əmma İsa cəvob nıdoşe bəy. ¹⁰ Pilati votışe Bəy: «Bəmi cəvob doydənış? Zıneydəniş ki, Çımı hestime səlohiyəti Tıni bo ozod kardey, yaan bə çomex kəşey?» ¹¹ İsa cəvob doşe bəy: «Qirəm bəti osmono doə nəbəy, İştə Çımı səpe hiç qılə səlohiyəti nəbi. Bı səbəb Mini bəti təslim kardəkəsi qıno həniyən yole». ¹² Çımı bəpeştə Pilat dastpoçə be Bəçəy ozod kardeyro, əmma Yəhudiyon zikkə jəşone votışone: «Şayət tı ım Odəmi ozod bıkoş, ğeysəri dust niş. Ki ıştəni podşo elon kardeydəbu, bə ğeysəri vəynə beşeydə». ¹³ Pilat ın sıxani məseədə bardışe İsa bə benton iyən nışte Sığə epoədə bıə hıkmı kursisə, bı vıray ibrani zıvonədə Qabbata voteydəbin. ¹⁴ Bo Pasxə Hozıəti rujbe. Təxminən saat donzəbe. Pilati votışe bə Yəhudiyon «İme şımə Podşo!» ¹⁵ Əmma əvon «Ne, rədd bibu, rədd bibu! Bə çomex bıkəş Əy!» zikkə jəy-jəy voteydəbin. Pilat parsəy çəvonku: «Şımə Podşo bə çomex bıkəşım?» Sər kahinon cəvob doşone: «Çəmə nimone ğərayz ğeysəri co podşo!» ¹⁶ Bəvədə Pilati bə çomex kəşeyro təslim kardışe İsa bəvon. Sərbozon peqətişone İsa bardışone.

İsa bə çomex kəşe bey

¹⁷ İsa İştən kırnişe İştə çomex bardışe bə «Kəllə ğəfə» nomədə bıə vıre, ibrani zıvonədə bəvrəy Qolqotə voteydəbin. ¹⁸ Bə çomex kəşəşone Əv iyən co dı kəsən əyo: qıləyni çe İsa rostədə, qıləyni çəpədə, İsan miyonədəbe. ¹⁹ Pilati doşe nıvışte qıləy lovhə, ehaştışone çomexi səpe. Jıqo nıvıştə bıəbe əyo: «Çe Yəhudiyon Podşo Nazaretijə İsa». ²⁰ Yəhudiyon veyni handışone ın lovhə, oxo İsa bə çomex kəşə bıə vıre şəhri nezibe iyən lovhə ibrani, latın iyən yunanə zıvononədə nıvıştə bıəbe. ²¹ İmi vində Yəhudi sər kahinon votışone bə Pilati: «“Çe Yəhudiyon Podşo” ne, “İm Odəmi votışe ki, Az Yəhudiyon Podşom” bınıvıştə». ²² Pilati cəvob doşe: «Çiç nıvıştımebu, nıvıştıme».

²³ Sərbozon İsa bə çomex kəşəədə peqətişone Çəy olət, çə poə kardışone ki, bə har sərbozi i poə bırası. Betikiş iyən səykubəpo boftə bıə şəy isə peqətişone iyən ²⁴ votışone bə iyəndı:

«Imi mədirnəmon, pışk şodəmon, bunəmon çiki beydə». Sərbozon jıqo kardışone. Im əve be ki, Mığəddəsə Nıvıştəyədə bıə ım sıxan bə vırə bırası:

«Paybaxş kardışone ıştə arədə Çımı oləton,
Pışk şodoşone Boçımı libosi».

²⁵ Çe İsa çomexi tonon pəmandəbin Çəy moə, Çəy moə hovə, Klopə jen Məryəm iyən Məcdəlījə Məryəm. ²⁶ İsa vındeədə İştə moə iyən çəy tonon pəmandə İştə azizqıromiyə şoqirdi, votışe bəştə moə: «Moə, ım ıştı zoəy!» ²⁷ Çəyo isə votışe bə şoqirdi: «Im ıştı moəy!» Çə vaxtiku bəpeştə ə şoqirdi bardışe əv bəştə kə.

Çe İsa marde

²⁸ Çımı bəpeştə İsa zınəşe həni harçi təmom be, «Təşi qətim!» votışe ki, bıdə Mığəddəsə Nıvıştəy qırd bə vırə bırası. ²⁹ Əyo qıləy ğab noə bıəbe de tırşə şərovi purbe. Ejəşone bəy qıləy sunqər, pevonışone bə dırozə çuy, nez vardişone bə İsa qəvi. ³⁰ İsa çəşəşe tırşə şərov. Çəyo «təmom be» votışe, enovnişe İştə sə, asbardışe İştə Ruf.

³¹ Hozıəti ruj bey səbəbo Yəhudi rəhbəron əjo kardışone Pilatiku bə çomex kəşə bıəkəson şıvəkon bəriştın iyən peqətın çəvon cəsədon. Əvon piyeydəşonnıbe Şanbə ruji cəsədon çomexədə bımandın, oxo həmonə Şanbə ruji idi əsosə rujbe. ³² Bəvədə sərbozon oməyn sıftə arıştışone de İsa bə çomex kəşə bıə qıləy odəmi, çəyo ə qılə odəmi lınqon. ³³ Çe İsa tonon omeədə vındışone Əv həni mardə, narıştışone Çəy lınqon. ³⁴ İntasi sərbozon qıləyni de nızə hıl kardışe Çəy kəm, dərhol çəyo xun iyən ov eməy. ³⁵ İmi vındə odəm ıştən şəhodət kardeydə iyən çəy şəhodət roste, əv zıneydə həğiğəti voteydə ki, şımə imon biyən. ³⁶ İmon əve bin ki, Mığəddəsə Nıvıştəyonədə bıə «Çəy qıləy astən nıbarşıye» sıxan bə vırə bırası. ³⁷ İjən Mığəddəsə Nıvıştəy co vırədə «Diyə bəkarden Andomi hıl kardə bıə bə Şəxsi» votə beydə.

Çe İsa dəfn karde

³⁸ Çımı bəpeştə Arimateyəvijə Yusifi Pilatiku əjo kardışe ki, çe İsa cəsədi bıdə bəy. Yusif çe İsa şoqirdbe, intasi Yəhudi rəhbəronku tarseydəbe, əve ımı niyoni oqəteydəbe. Pilati bəy icozə doşe, əvən oməy peqətişe çe İsa cəsəd. ³⁹ Nikodimi, kom qılə ki keynəsə şanqo oməbe İsa tonon, vardişe sa litrə ğədərədə umjənə mirra iyən əzvoy. ⁴⁰ Əvon peqətişone çe İsa cəsəd bə Yəhudiyon dəfni mıvofığ, de ətiron ivirədə bə kəfəni pepuştışone. ⁴¹ Çe İsa bə çomex kəşə bıə vırədə qıləy boğ hestbe, bı boğədə qıləy məğarə ğəb hestbe ki, hələ hiç kəs noə bıənıbe əyo. ⁴² Ğəb neziyədəbe, əve noşone çe İsa cəsəd əyo, çumçiko Yəhudiyon Şanbə dameydəbe.

Çe İsa bəyji bey

20 Haftə işanbə ruji rəbədə, hələ toykiədə Məcdəlījə Məryəm oməy məğarədə bıə ğəbi tonon. Əy vındışe ki, ğəbi qəvisə bıə sığ peqətə bıə. ² Bəvədə əv vite şe Simon Peteri iyən çe İsa azizqıromiyə şoqirdi tonon, votışe bəvon: «Rəbb bardə bıə ğəbo iyən zıneydənimon bə kovrə noəşone Əv». ³ Peter iyən ə qılə şoqird şın ğəbi tonon. ⁴ Dı kəsən bə ivirə viteydəbin, əmma ə qılə şoqird Peterisə həniyən cald vite sıftə rəsəy bə ğəbi. ⁵ Enəməy diyə kardışe bə ğəbi dılə, vındışe kətonə bezon eqıniyən əyo, əmma əv dənişe bə dılə. ⁶ Bəvədə Simon Peterən çəy dumo oməy, əv dəşe bə məğarə dılədə bıə ğəb. Əy peqətişe eqıniyə kətonə bezon ⁷ iyən bə İsa sə dəbastə pəlu. Pəlu kətonə bezon tonon nıbe, to kardə bıə, co qıləy vırədə noə bıəbe. ⁸ Bəvədə sıftə məğarə tonon omə ə qılə şoqirdən dəşe bə dılə vındışe imoni, bovə kardışe. ⁹ Çumçiko əvon hələ sərəseydənin bə Mığəddəsə Nıvıştəy ki, İsa bəyji bıənıne çe mardon dılədə. ¹⁰ De jıqo şoqirdon oqardin bə dumo.

İsa çiyəy bə Məcdəlījə Məryəmi

¹¹ Məryəm isə pəmandəbe məğarə bentonədə, bəmeydəbe. Bəme-bəme enəməy diyə kardışe bə məğarə dilətoni. ¹² Vindışe əyo sipiyə olət tankardə dıqlə mələk: qıləyni çe İsa cəsədi noə vırey sədə, ə qıləyni poədə niştəbe. ¹³ Əvon parsəyn Məryəmi: «Jen, boçi bəmeydəş?» Məryəmi votışe bəvon: «Bardəşone çımı Rəbb, zıneydənim konco noəşone». ¹⁴ İmi vote bəpeştə əv odyəsəy bə dumo vindışe İsa pəmandə əyo, əmma əy nıznəşe İsa. ¹⁵ İsa parsəy çəyku: «Jen, tı boçi bəmeydəş? Boki nəveydəş?» Məryəmi jıqo qımon kardışe, əv boğbone, votışe: «Əğə, qirəm Əv tı bardebu, bıvot konco noə, az peqətım». ¹⁶ İsa votışe bəy: «Məryəm!» Əv odyəsəy votışe bə İsa «Rəbbuni!» İbrani zıvonədə «Rəbbuni» sıxani mənə «Ustod» votəye. ¹⁷ İsa votışe bəy: «Məqın Bəmi, çumçiko Az hələ Pıə tonə rost bıənim. Əmma bışi Çımı boon tonə, bıvot bəvon: Az rost beydəm İştə Pıə – Şımə Pıə, İştə Xıdo – Şımə Xıdo tonə». ¹⁸ Məcdəlījə Məryəm oməy çe şoqirdon tonə, votışe bəvon: «Vındəme Rəbb!» Çəyo votışe bəvon çe İsa votəyonən.

İsa çiyəy Bəştə şoqirdon

¹⁹ Həmonə ruji şanqovəsəy, yəni haftə işanbə ruji şoqirdon mandə vırey kəybon bastə bıəbin, çumçiko əvon Yəhudi rəhbəronku tarseydəbin. İsa dəşe bə dilə, mande miyonədə, votışe bəvon: «Bəşmə səlom bıbu!» ²⁰ Çəyo nişo kardışe bəvon İştə daston iyən kəm. Şoqirdonən Rəbbi vindeədə şo bin. ²¹ İsa ijən votışe: «Bəşmə səlom bıbu! Pıə Mını vığənde gəzinə Azən şıməni vığəndeydəm». ²² İmi vote bəpeştə pu kardışe çəvon səpe, votışe: «Ğəbul bıkən Mıgəddəsə Rufi!» ²³ Şımə çiki qınon bıbaxşon, baxşə beydəm, çiki qınon nıbaxşon, baxşə beydənin».

İsa çiyəy bə Tomasi

²⁴ İntasi İsa omeədə Donzə şoqirdi qıləyni, ləğəbış «İkiz» bıə Tomas deyəvon nıbe. ²⁵ Ə qılə şoqirdon bə Tomasi voteədə ki, «əmə vindımone Rəbb» əy votışe bəvon: «Qirəm Çəy dastonədə mexi okardə rizon, deştə anqıştə penixəviyim bə mexəvıron, ıştə dasti nınom Çəy kəmisə, əslo bovə əkənim». ²⁶ Həşt ruji bəpeştə çe İsa şoqirdon ijən otağədə qırdə bıə vaxti Tomasən deyəvonbe. Kəybon bastə bıəbin. İsa dəşe bə dilə, mande miyonədə votışe: «Bəşmə səlom bıbu!» ²⁷ Çımı bəpeştə votışe bə Tomasi: «Bıdə ıştə anqıştə, diyə bıkə Bəçımı daston, bıdə ıştə dastiyən, bıne Çımı kəmisə. Şək məvə, bovə bıkə!» ²⁸ Tomasi votışe Bəy «Çımı Rəbb iyən çımı Xıdo!» ²⁹ İsa votışe bəy: «Tı Mını vindeyro, imonı varde? Çı baxtəvərin Mını nıvındə imon vardəkəson!»

³⁰ İsa İştə şoqirdon çəşi vədə həniyən co əloməton nişo kardışe ki, bı kitobədə nıvıştə bıənin. ³¹ Əmma imon əve nıvıştə bıən ki, şımə imon bıyən ki, İsa Məsihe iyən Xıdo Zoəy, Deçəy nomi bə jimoni molik bıənin.

İsa qoli kənoədə

21 Çımon bəpeştə İsa ijən çiyəy bəştə şoqirdon Tiberiyə qoli kənoədə. Im jıqo be: ² Simon Peter, ləğəbış «İkiz» bıə Tomas, çe Qalileyə Qana diyə bıə Natanael, Zavdayi zoon iyən Çəy dıqlə şoqird ivirədəbin. ³ Simon Peteri votışe bəvon: «Az bo moy qəte şeydəm». Əmandəyonən votışone bəy: «Əmənen deti omeydəmon». Əvon şın penıştin bə kulos, əmma həmonə şəvi nıznəşone hiçi qəte. ⁴ Həşi pemeədə İsa pəmandəbe japədə, əmma şoqirdon nıznəşone Əv İsay. ⁵ İsa votışe bəvon: «Duston, jıçiy qətəyone bo harde?» Əvon cəvob doşone Bəy: «Xəyr». ⁶ İsa ijən votışe: «Səli bə kulosi rostə tərəf şodən, əyo pəydo bəkardeyon». Əvonən şodoşone səli iyən anədə moy qətışone ki, səli okırniye zıneydənin. ⁷ Bəvədə çe İsa azizqıromiyə şoqirdi votışe bə Peteri: «Im Rəbbe». Simon Peter məsencən Çəy Rəbb bey, dəpuştışe bəştə ıştə tano evatə səpenə olət, şodoşe ıştəni bə qol. ⁸ Əmandə şoqirdon isə moyə səli okırniye-okırniye de kulosi oməyn,

çumçiko japəku diyəro nıbin, təğribən dısa qulac məsofədəbin. ⁹ Əvon bə hıſki beşeədə vindişone əyo otəş sənə bıə, moy noə bıə otəşisə iyən çəy tonəən nun. ¹⁰ İsa votışe bəvon: «Biyən ıſtə esə qətə moyonədən». ¹¹ Simon Peter dəşe bə kulos okırnişe purə səl bə hıſki. Sadı pencə seqlə yolə moy hestbe bəvədə. Diyə məkə ki moy lap vey be, səl nıdırıye. ¹² İsa votışe bəvon: «Boən, nəfo bəhən». Şoqirdon hiç qıləyni ciqə nıkardışe bıparsı Çəyku: «Tı kiſ?», çumçiko zıneydəbin Əv Rəbbe. ¹³ İsa nez be peqətışe nun, doşe bəvon, həmçinin doşe moyən. ¹⁴ Im həni seminə kərə be ki, İsa mardon dılədə bəyji be bəpeştə çiyeydəbe bəştə şoqirdon.

Tı piyeydə Mı?

¹⁵ Nəfo harde bəpeştə İsa votışe bə Simon Peteri: «Ha Yəhya zoə Simon, tı çəvonsə vey piyeydə Mı?» Peteri votışe Bəy: «Bəle, ya Rəbb, Tı zıneydəş, az piyeydəme Tı». İsa votışe bəy: «Perosın Çımı pəsəvon». ¹⁶ Dıminə kərə ijən votışe bə Peteri: «Ha Yəhya zoə Simon, tı vey piyeydə Mı?» Əyən votışe bə İsa: «Bəle, ya Rəbb, Tı zıneydəş, az piyedəme Tı». İsa votışe bəy: «Bıçovın Çımı pəson». ¹⁷ Seminə kərə votışe bə Peteri: «Ha Yəhya zoə Simon, tı piyeydə Mı?» Peter kədərın be məseədə çe İsa bəy seminə kərə «Tı piyeydə Mı?» parsi doyro iyən votışe Bəy: «Ya Rəbb, Tı zıneydəş harçi, zıneydəş az piyeydəme Tı». İsa votışe bəy: «Perosın Çımı pəson. ¹⁸ Rosti, rosti voteydəm bəti: cıvon bıə vaxti ıſtən dəbastıſ ıſtə kıſtı bəştə piyə vırə əſiſ, əmma pi beədə ıſtə daston dıroz bəkardeş, co kəs dəbəbaste tını bəſtı nıpiyə vırə bəbarde». ¹⁹ İsa de ın sıxanon işorə doşe ki, Peter çoknə bəmarde, deştə marde izzətin bəkarde Xıdo. İmi vote bəpeştə votışe bəy: «Boy çımı dumo».

²⁰ Peter odyəsəy bə dumo vindişe çe İsa azizqiromiyə şoqird omeydə çəvon dumo. Im həmonə şoqirdbe ki, şanqonə hardeədə ıſtə səy nez kardəşbe bə İsa «Ya Rəbb, Bəti xəyonət kardə odəm kiye?» votəşbe. ²¹ Peteri vindişe ım şoqird, votışe bə İsa: «Ya Rəbb, bəs əv çoknə bəbe?» ²² İsa votışe bəy: «Qirəm Az piyeydəmebu tosə Çımı ome çəy mande, çımədə bəti çı? Tı boy çımı dumo». ²³ Bı səbəb həmonə şoqirdi nımardey barədə sıxan pevılo be imoniyon icmoədə. Əmma İsa votəşnıbe çəy nımardey, əncəx votəşbe: «Qirəm Az piyeydəmebu tosə Çımı ome çəy mandey, çımədə bəti çı?».

Oxonə sıxan

²⁴ Bı hodison həmməy şoyd bıə imoni nıvıſtəkəs həmonə şoqirdə iyən əmə zıneydəmon ki, çəy şəhodət etıboyne.

²⁵ Çe İsa kardə vey co çiyonən hestin. Qirəm əvoni həmə qıləbəqılə nıvıſtəşonbəy, çımı zınəy, anə kitobon vırə nəbi dınyoədə.

BƏ YƏHYA NOZİL BİƏ

VƏHY

VƏSƏ

«Vəhy Kitobi» bə İsa Məsihi imon vardeyro imoniyon rımuז kardə vaxtonədə nıvıştə bıə. Qımon kardə beydə ki, in kitob ya imperator Neroni podşoəti (peş miladi 54-68) oxonə soron, yaan imperator Domisiani podşoəti (peş miladi 81-96) vaxtədə nıvıştə bıə. Mıəllifi məğsəd əve ki, bə rımuז kardə bıə iyən əzyət kəşə imoniyon dılvandı bıə. In peyğəmbərəti kitobi vey hissə oməvədə bıəninə hodison iyən çiyemonono iborəte.

Bı kitobi izohi dair curbəcürə rəyon bıbonən, əsosə movzu oşkoye: Xıdo de İsa Məsihi vositə mılxəs, ıştə deşmenon iyən Şəytoni qırd məğlub bəkarde. Xıdo deşmeni səpe gələbə bəje iyən Bəştə bəfomandə fərzəndon nuyə osmoni iyən nuyə xəy-dıvon mıkofot bədo.

Kitobi məzmun:

1:1-3 Vəsə

1:4-3:22 Oşkoə çiyemon iyən bə haft qılə imoniyə icmo nıvıştə bıə nomə

4:1-8:1 Haft qılə mihi jə bıə tumar

8:2-11:19 Haft qılə şeypur

12:1-13:18 Əjdəho iyən dıqlə həyvon

14:1-15:8 Curbəcürə çiyemonon

16:1-21 Çe Xıdo gəzəb iyən haft qılə tos

17:1-18 Bəxloğə jen

18:1-24 Babili dərijiye

19:1-21 Osmononədə həmd-səno

20:1-15 Həzosorə Podşoəti

21:1-22:5 Tojə osmon, tojə zəmin, tojə Yerusəlim

22:6-21 İsa omeydə

Məsihi vəhy

1 Im İsa Məsihi vəhye. Xıdo in vəhyi Bəy doşe ki, bıə Bəştə xıdmətəvonon oşko bıə bı nezon çıçon bəben. Əy Deştə mələki vositə vıgandışe im, Bəştə xıdmətəvon Yəhya bəyon kardışe. ² Yəhya ıştə vindəyon həmməy barədə şoydəti kardeydə, im çe Xıdo kəlome iyən İsa Məsihi şoydətiye. ³ Baxtəvərin ə odəmon ki, in peyğəmbərəti sıxanon handeydən, məseydən iyən bımon əməl kardeydən, oxo vaxt həni nez bıə!

⁴ Az Yəhya Asiyə viloyətədə bıə bə haft qılə imoniyə icmo səlom vıgandeydəm! Hestə, Hest Bıə iyən Omənin Bıəyku iyən Çəy taxti navədə bıə haft qılə rufiku iyən ⁵ İsa Məsihiku lutf iyən sulh bıbu bəşmə! Əv həğiğiye şoyde, çe mardon arədə iminə bəyji bıəkəse, çe dınyo podşoon əğəye. İsa piyəşe əməni iyən Deştə xuni vositə çəmə qınonku ozod kardışe. ⁶ Əy çəməno qıləy Podşoəti soxtışe Boştə Xıdo iyən Pıə, Bəy xıdmət kardeyro əməni kahin təyin kardışe. Zolə izzət iyən gıdrət bıbu Bəy! Amin.

⁷ Iməha, Əv avon səpe omeydə!

Har kəs deştə çəşi bəvinde Əy,

Həmçinin çomexədə Çəy andomi hıl kardəkəsonən.

Dınyoədə bıə həmmə xəlğon

Fəğon bəkan Çəy navədə.

Bəle, jıqo bəbe. Amin.

⁸Rəbbə Xıdo voteydə: «Azim Alfa iyən Omeqa! Kulli-İxtiyor ki, Heste, Hestbe iyən Omənine!»

Bə haft qılə imoniyə icmo mırocıət

⁹Çe İsa dəvoməkə az Yəhya, şımə imoniyə boə, Xıdo Podşoəti roədə deşmə ivirədə əzyət kəşəkəs, bə Xıdo kəloni iyən bə İsa şoydəti kardeyro Patmos nomədə bıə cəzirədəbim. ¹⁰Rəbbi rujədə bə Rufi təsiri ji eqnim. Məsəme ıştə bə peşo bənə şeypurə sədo qıləy barzə sədo ¹¹jıqo votəyon: «Bıvıvışt ıştə vindəyon bə qıləy tumar iyən bıvıgand ımı bə haft qılə icmo: bə Efes, İzmir, Perqamə, Tiadır, Sardə, Filadelfiyə iyən Laodikeyə».

¹²Bəvədə odyəsəym ki, bıvındım demı qəp jəkəs kiye. Odyəseyədə vindıme haft qılə gızılə şamdon. ¹³Şamdonon arədə dırozə libos tankardə, Bəştə sinə gızılə kıştı jə bənə Bəşəri Zoə şəxsi hestbe. ¹⁴Çəy sə iyən muyon bənə sipiyə paşmə iyən voabe, Çəy çəşon bənə yəlovinə otəşibin. ¹⁵Çəy lınqon bənə kurədə sof kardə bıə şəvəxinə bırıncı, Çəy sədo bənə qurə ovon sədobe. ¹⁶Əy İştə rostə dastədə haft qılə astovə qətəşbe, Çəy qəvo dıqəvinə tijə şımşı beşeydəbe. Çəy dim bənə tındə şəvəx jə həşibe.

¹⁷Az Əy vindeədə bənə mardə dəqınim Bəçəy po. Əy noşə İştə rostə dast çımı səpe, votışe: «Mətar! İminəni iyən Oxonəni, ¹⁸Bəyjobəkəs Azim. Az mardəbim, fəğət həni zol bəyjim. Mardi iyən mardon məskəni haçeron Bəmıkun. ¹⁹De jıqoy, bıvıvışt ıştə vindəyon, esət iyən çımı bəpeştə çiç bəbe. ²⁰Çımı rostə dastədə ıştı vində haft qılə astovə iyən haft qılə gızılə şamdoni sır jıqoye: haft qılə astovə çe haft qılə imoniyə icmo mələkonin, haft qılə şamdon isə haft qılə imoniyə icmoye.

Efesədə bıə imoniyə icmo

2 Bıvıvışt bə Efesədə bıə imoniyə icmo mələki:

Haft qılə astovə İştə rostə dastədə Qətəkəs, haft qılə gızılə şamdoni arədə Şəkəs jıqo voteydə: ²Az zıneydəm ıştı əməlon, zəhməti iyən səbri. Xəbə hestime ki, bə şərə odəmon petoveydəniş. Tı osə karde həvari nıbe-nıbe ıştəni həvari hisob kardə ə odəmon iyən mıəyyən karde çəvon duyəvojəti. ³Tı səbrı karde, Çımı nomi roədə petovəyş iyən sıst nıbiş.

⁴Əmma qıləy çiyədə ıştıku norozim: ıştə sıftənə mehıbbətiku dastı kəşə. ⁵Əvə bə yod biyə ki, kon barzətıədə eqınıyəş, tobə bıkə iyən ıştə sıftə kardə koon bıkə. Qirəm tobə nıkoş, bomem ıştı tonə, ıştı şamdoni çəy vırəyku pebəqətem. ⁶Əmma ım çoke ki, tı Nikoləvonon əməlon rədd kardeydəş. Azən rədd kardeydənım çəvon əməlon.

⁷Çiki hestışe quş, bıdə bıməsı ki, Ruf bə imoniyə icmon çiç voteydə. Az bə gəlib oməkəsi ixtiyor bədom ki, çe Xıdo behıştədə bıə jimoni doy bəhrəo bəhə.

İzmirdə bıə imoniyə icmo

⁸Bıvıvışt bə İzmirədə bıə imoniyə icmo mələki:

İminəni iyən Oxonəni bıəy, marde bəpeştə sənibəton bəyji bıə Şəxs jıqo voteydə: ⁹Az zıneydəm ıştı əzyəti iyən beçizəti, əmma tı ərbobış! Xəbə hestime bəştə Yəhudi votəkəson çoknə tını təhğir kardeydən, əmma əvon Yəhudi nin, Şəytoni yığnəğın. ¹⁰Bəştı sə oməninə əzobiku hiç mətar. İmha, iblis şıməhono kali kəsi bə zindon dəbəğande ki, dəvinəo beşən. Şımə da ruj əzyət bəkəşeyon. Bəfomand bıbi detosə marde, bəvədə Az bəti jimoni taci bədom.

¹¹Çiki hestışe quş, bıdə bıməsı ki, Ruf bə imoniyə icmon çiç voteydə. Gəlib oməkəs dımınə marde əvindını.

Perqamadə biə imoniyə icmo

¹² Bııvışt bə Perqamadə biə imoniyə icmo mələki:

Dıqəvinə tijə şımşı Soyb jıqo voteydə: ¹³ Az zıneydəm ki, tı Şəytoni taxt biə vırədə jiyə vəzyətədən Bəmi bəfomand biş. Həttə bə rujonədən Tı Bəmi biə imono nıqardış, keynə ki, Çımı bəfoynə şoyd Antipa Şəytoni jiyə şəhrədə kıştə be.

¹⁴ Əmma qıləy çiyədə ıstıku norozim: Şımə arədə Balami təlimi dumo şəkəson hestin. Əy omutışe bə Balaqi ki, İsrailijon dəqijni, əvon bə biton edaştə biə ğırbonon qujdi bəhən iyən beəxloğəti bıkən. ¹⁵ Həmçinin Nikoləvonə təlimi dumoşəkəson şımə arədə hestin. ¹⁶ Bıçımıro tobə bıkə! Qırəm tobə nıkoş Az bı nezon bomem ıstı tonə iyən deştə qəvo beşə şımşı deyəvon canq bəkam.

¹⁷ Çiki hestışe quş, bıdə bıməsı ki, Ruf bə imoniyə icmon çič voteydə. Az bə ğalib oməkəsi hardeyro niyoni oqətə biə manna bədom. Bəy qıləy sipiyə sığən bədom ki, çəy səpe tojə nom nıvıştə biə. Hiçki in nomi zıneydəni, ğərəyz sıği səkəsi.

Tiatirədə biə imoniyə icmo

¹⁸ Bııvışt bə Tiatirədə biə imoniyə icmo mələki:

Çəy çəşon bənə yəlovinə otəşi, Çəy lınqon bənə kurədə sof kardə biə şəvəxinə bırınci biə Xıdo Zoə jıqo voteydə: ¹⁹ Az zıneydəm ıstı koy, mehıbbəti, imoni, xıdməti iyən səbri. Zıneydəm ıstı oxoyinə koon iminə koonsə həniyən veyin.

²⁰ Əmma qıləy çiyədə ıstıku norozim: tı bəştə peyğəmbər votə İzavel nomədə biə jeni imkon doydəş, əv Bəçımı xıdmətəvonon omutu ki, beəxloğəti bıkən iyən bə biton edaştə ğırbonon qujdi bəhən. ²¹ Az bəy mihlət dome ki, ıstə beəxloğətiku tobə bıkə, əmma əy ıstə beəxloğətiku tobə karde piyeydəşni. ²² Əve Az əy bə noxəşi lef-sənqo dəsqir bəkardem. Deəy beəxloğəti kardəkəson tobə nıkon, əvoniyən bə yolə əzyəton dəbəğandem. ²³ Çəy dumo şəkəson bə bəlo dəbəğandem, bəkıştem. Həmmə imoniyə icmonən bəzınen ki, insoni dılı iyən fikiron osəəkə Azim iyən bə har kəsi çəy əməlon əvəzi bədom.

²⁴ Əmma Az bəşmə, Tiatirədə biə bə əmandəyon voteydəm, komqılön ki, in təlimi ğəbul kardeydənin iyən jıqo nom doə biə “Şəytoni nığılə siron” zıneydənin: Az şımə səpe co qıləy şələ noydənim, ²⁵ detobə Çımı ome bəştəku biəy bəfomand bıbən.

²⁶ Az İştə Pıəku çič səme Bəy bədom, bə ğalib oməkəsi iyən Bəçımı hamyə koon rioyət kardəkəsi toşə oxoy xəlğon səpe hakimiyət bədom.

²⁷ “Əv de osonə ləvo bəvon əğəti bəka –

Bənə qılıyə ğabi əvoni barışte”.

²⁸ Bəy rujobə astovə bədom. ²⁹ Çiki hestışe quş, bıdə bıməsı ki, Ruf bə imoniyə icmon çič voteydə.

Sardisədə biə imoniyə icmo

3 Bııvışt bə Sardisədə biə imoniyə icmo mələki:

Bə Xıdo haft qılə rufi iyən haft astovə Molik Bıəy jıqo voteydə: ıstı əməlonku xəbə hestime. Tı bəyji hisob kardə beydəş, əmma tı mardəş. ² Oğə bıbi iyən bətiku marde holədə çič heste əy ğoyım bıkə. Çumçıko Az vindime ıstı əməlon çımı Xıdo vədə mıkəmməl nin. ³ Bı səbəb bə yod biyə tı çiči səy iyən çiči məsəy. Bımon rioyət bıkə iyən tobə bıkə. Şayət oğə nıboş, dızdi ğəzinə iberdəmədə bomem iyən əzınış kon saatədə ıstı səpe bomem.

⁴ Əmma Sardisədə, şımə dilədə bəştə oləton ləkə nıjənə kali kəson hestin. Əvon Demı bə ico sipiyə olətədə bənəven, çumçıko bımi loyiğın. ⁵ Ğalib omə har kəs sipiyə olət tanbəkardə. Az çəy nomi jimoni kitobo əslo benibəkardem, İştə Pıə iyən Çəy mələkon vədə əy ğəbul bəkardem.

⁶ Çiki hestışe quş, bıdə bıməsı ki, Ruf bə imoniyə icmon çiç voteydə.

Filadelfiyədə bıə imoniyə icmo

⁷ Bııvışt bə Filadelfiyədə bıə imoniyə icmo mələki:

Mığəddəs iyən Həğiği Bıəy, bə Davudi haçəri Soyb Bıəkəs jıqo voteydə: Çəy okardəy hiçki jəy əzini iyən Çəy jəy hiçki okarde əzini. ⁸ Az zıneydəm ıştı əməlon. Imha, Az botı jıqo qıləy kəybə okardəme ki, hiçki əy jəy nıbəzine. İştı ğıvvə kam be-be Bəçımı sıxani rioyətı karde iyən Çımı Nömiku imtino nıkarde. ⁹ Imeha, məcbur bəkam Şəytoni yığnəğədə bıə, Yəhudi nıbe-nıbe bəştə Yəhudi votə duyəvojon bıdə bon bəştı po dəqının iyən bızının ki, Az tını piyəme. ¹⁰ Tov varde-varde Bəçımı sıxani rioyətı karde. Əve Azən tını dəvinə vaxtiku niğə bəkam, ə vaxt dınyoədə jiyəkəson dəvinə kardeyro bə həmməy sə bome. ¹¹ Az rəyrə omeydəm. Çiçi heste, ğoym dəçik çəyku ki, hiç kəs ıştı taci penıqətı.

¹² Ğalib oməkəsi İştə Xıdo məbədi sun bəkardem ki, hiç tərğ nıbəkarde ə vıray. Çə suni səpe İştə Xıdo nomi, Bəştə Xıdo məxsus bıə şəhri, yəni osmono, Çımı Xıdo tonə evardə bıə tojə Yerusəlimi nomi iyən İştə tojə nomi bənıvıştəm. ¹³ Çiki hestışe quş, bıdə bıməsı ki, Ruf bə imoniyə icmon çiç voteydə.

Laodikeyədə bıə imoniyə icmo

¹⁴ Bııvışt bə Laodikeyədə bıə imoniyə icmo mələki:

Həğiği bıəy, bəfomand iyən etiboynə Şoyd, çə Xıdo ofəyə kardəyon Səvon jıqo voteydə: ¹⁵ İştı əməlonku xəbə hestime. Tı nə sardın, nəən tatiş. Keşkə ya sardın, yaan tat bəbeş! ¹⁶ Əmma tı nə tat, nəən sardınış, ilğiş, Az tını ıştə qəvo obəqordınem. ¹⁷ Tı voteydəş: «Ərbobim, bə hiç çiy ehtiyoci nime, həni ərbob bım». Əmma zıneydəniş ki, bədbəxt, zəlil, beçiz, ku iyən quculiş. ¹⁸ Bəti məslohat doydəm ki, ərbob beyro otəşədə xalis kardə bıə ğızıl bıhır Çımıku, həmçinin sipiyə olət bıhır, tankard, ıştə quculiyə andomi aybi edə iyən çəşə məlhəm bıhır, bəştə çəşon dəsu y ki, bıvindi. ¹⁹ Az kim piyeydə, əy mızəmmət iyən tərbiyə kardeydəm. Əve bə ğıryət boy iyən tobə bıkə. ²⁰ Imha, Az kəybə peştədə mandəm, əy kuyeydəm, qirəm kiysə Çımı sədo bıməsə, kəybə oko, çəy tonə bomem iyən Az deəy, əvən Demı ivirədə şanqonə bahardemon.

²¹ Bə ğalib oməkəsi Demı bə ivirə Çımı taxtədə bo nişte imkon bədom, çoknə ki Az ğalib oməm iyən Deştə Pıə bə ivirə Çəy taxtədə niştəm. ²² Çiki hestışe quş, bıdə bıməsı ki, Ruf bə imoniyə icmon çiç voteydə».

Osmonədə bıə taxt

4 Çımı bəpeştə vindime ki, bə osmon obə qıləy kəybə heste. Sıftə demı qəp jə qıləy sədo məsəme, bənə şeypuri barzə sədo votışe: «Rost bıbi iyo. Çımı bəpeşt bıəninə hodison bəti nişə bəkardem». ² Hejo bı dəmədə de Rufi təsiri vindime. Imeha, qıləy taxt heste iyən Şəxsi niştə taxtədə. ³ Niştəkəsə nur beşeydəbe bənə yaşəmi iyən sıə əqiqə sıği viriskə jəydəbe. Taxti qırdo bənə zumrudi haftranqə hestbe. ⁴ Taxti har tərəfədə həniyən vıstı çoqlə taxt hestbe. Bı taxtonədə sipiyə olətbətan, çəvon sədə ğızılə toc bıə vıstı çoqlə sipiriş niştəbe. ⁵ Taxto avəçəkə, barzə sədo iyən osmonə qurrə omeydəbe. Taxti navədə haft qılə ğongə suteydəbe. İmon çə Xıdo haft qılə Rufin. ⁶ Taxti navədə bənə billuri şişə dıyo hestbe.

Taxti qırdo çoqlə bəyjiyə məxloğ hestbe, çəvon har çə tərəfədə, vədə iyən dumoədə çəşon hestbin. ⁷ İminə məxloğ bə əslani, dıminə məxloğ bə poynə, seminə məxloği dim bə insoni dimi oxşəş doydəbe, çəminəni bənə pərə ğəcıbe. ⁸ In çoqlə məxloği har qıləyniədə şəş qılə pər hestbe, məxloğon har tərəf de çəşi edə bıəbe. In məxloğon şəv-ruj ənəmandə voteydəbin:

Mığəddəse, mığəddəse, mığəddəse!

Kulli-İxtiyor Rəbbə Xıdo

Əv ki Hestbe, Heste iyən Omənine.

⁹ In bəyjiyə məxloğon har səfə bə taxtədə Niştəkəsi, zol Jiyəkəsi izzət iyən şərəf doydəbin, şukur kardeydəbin. ¹⁰ Həmonə vaxtədə vistı çoqlə sipiriş taxtədə Niştəkəsi navədə zəvbədim qıneydəbin, bə zol Hest Bıəy səcdə kardeydəbin iyən ıştə tocon taxti navədə noydəbin voteydəbin:

¹¹ «Ha çəmə Rəbb iyən Xıdo!

Tı loyiğış bə izzəti, şərəfi iyən ğudrəti.

Çumçiko Tı ofəyəy har çiy,

Har çiy Deştı irodə ofəyəy iyən mıvcude».

Mihi jə bıə tumari okarde

5 Az vindıme taxtədə Niştəkəsi rostə dastədə tumari ğəzinə qıləy kitob hestbe, çəy har dı tərəf nıvıştə bıəbe iyən de haft qılə mihi bəy mihi jə bıəbe. ² Həmçinin vindıme ki, qıləy ğudrətinə mələk de barzə sədo car kəşeydə: «Tumari mihiyon bo sındıniye iyən əy bo okarde ki loyiğə?» ³ Əmma nə osmonədə, nə zəminisə, nəən zəmini jiyədə i kəsi nıznəşe in tumari okarde iyən bəçəy dılətoni diyə karde. ⁴ Az dəmandim sute-sute bo bəme, çumçiko bo tumari okarde iyən bəçəy dılətoni diyə kardeyro loyiğ i kəs pəydo nıbe. ⁵ Bəvədə sipirişonədə qıləy votışe bəmı: «Məbəm! Imeha, Yəhudə ğəbiləo bıə Əslan, Davudi oroğ-toroğ ğalib oməy, tumari haft qılə mihi sındıniye iyən əy okarde ixtiyor Bəy doə bıə».

⁶ Vindıme ki, taxti miyonədə, çoqlə bəyjiyə məxloğ iyən sipirişon arədə Pəsəvə mandə, jıqo bızın Əv ğırbon doə bıəbe. Çəy haft qılə şox iyən haft qılə çəş hestışbe ki, imon bə zəmini dimi həmməy vığandə bıə çe Xıdo haft qılə rufonin. ⁷ Pəsəvə nez oməy iyən peqətişə taxtədə Niştəkəsi rostə dastədə bıə tumar. ⁸ Əv tumari peqəteədə çoqlə bəyjiyə məxloğ iyən vistı çoqlə sipiriş Pəsəvə navədə zəvbədim eqının. Har qıləyni dastədə arfə hestbe iyən əvon de buxuri pur kardə bıə ğızılə toson qətəşonbe ki, imon çe Xıdo xəlği kardə dıvonin. ⁹ Əvon qıləy tojə mahne hande-hande voteydəbin:

«Tı loyiğış bo tumari peqəte iyən

Boçəy mihiyon sındıniye.

Oxo Tı ğırbon doə biş

Deştə xuni vositə

Hıriyəy bo Xıdo

Har ğəbiləo, zıvono, xəlği iyən milləto bıə odəmon!

¹⁰ Tı əvonı bəçəmə Xıdo xıdmət kardeyro

Bə podşoəti iyən kahinəti rosniye,

Əvon zəminisə hikmronəti bəkarden».

¹¹ Çəyo taxti, bəyjiyə məxloğon iyən sipirişon qırdo vey mələk vindıme, çəvon sədon məsəme. Əvon həzo-həzo, da həzo-həzobin. ¹² Əvon de barzə sədo voteydəbin:

«Ğırbon doə bıə Pəsəvə loyiğə

Ğudrəti, tənxo, hikməti, ğıvvə,

Şərəfi, izzəti iyən həmd-səno səyro!»

¹³ Həmçinin az məsəme osmonədə, zəminisə, zəmini jiyədə, dıyoədə bıə həmə məxloğon iyən əyo bıə həmə ofəyemonon jıqo votəyon:

Bə taxtədə Niştəkəsi iyən bə Pəsəvə

«Zoləti həmd-səno, şərəf, izzət iyən ğudrət bıbu!»

¹⁴ Çoqlə bəyjiyə məxloğon «Amin!» voteydəbe. Bəvədə sipirişon zəvbədim eqının iyən səcdə kardışone.

Şəş qılə mihî sındiniye

6 Az vindime ki, Pəsəvə sındinişe haft qılə mihî iminəni. Bəvədə məsəmə çoqlə bəyjiyə məxloği qıləyni bənə osmoni qurrə sədo votişe: «Boy!»² Vindime ki, qıləy sipiyə asp iyən çəy səpe niştə aspo dastədə ti-kəmon heste. Bəy qıləy çambə doəbe iyən əv bənə ğalib oməkəsi dəro qıniye ki, ğələbə bijəni.

³ Keyne ki Pəsəvə dımınə mihî sındinişe az məsəmə dımınə bəyjiyə məxloği votişe: «Boy!»
⁴ Bəvədə co qıləy asp beşe bə məydon, əv sıə otəşi ranqədəbe. Çəy səpe niştə bə aspo icozə doəbe zəminisə sulhi arəo peqəti. Bə aspo qıləy dijdə şımşı doəbe ki, bədə insonon iyəndı ğır bıkən.

⁵ Keyne ki Pəsəvə seminə mihî sındinişe az məsəmə seminə bəyjiyə məxloği votişe: «Boy!» Vindime ki, qıləy siyo asp iyən çəy səpe niştə aspo dastədə tavzı heste. ⁶ Az məsəmə çoqlə bəyjiyə məxloği arədə qıləy sədo jıqo voteydə: «İ zəvox qandımə ordə, həmçinin se zəvox cəvə ordə bə i dinare, əmma bə zeytunə ruyəni iyən çəxiri zərər məjən».

⁷ Keyne ki Pəsəvə çominə mihî sındinişe az məsəmə çominə bəyjiyə məxloği votişe: «Boy!»
⁸ Az vindime qıləy ranqəvunə asp. Çəy səpe niştə aspo nom Mardeybe. Mardon məskənən deəy şeydəbe. Bəvon zəmini dimi çoadə iy səpe səlohiyə doəbe ki, de şımşı vəşyəni, bəlo iyən zəminisə biə əşivə həyvnonon vositə insonon ğır bıkən.

⁹ Keyne ki Pəsəvə pencminə mihî sındinişe az vindime ğırbonqo jıtono bə Xıdo kəlomi iyən bəçəvon kardə şoydətiyonro kıştə biə conon. ¹⁰ Əvon de barzə sədo fəryod kardeydebin: «Ha mığəddəs iyən bərhəx biə Pərvərdiqor tosə keyne mihokimə nıbəkaş iyən zəminisə jiyəkəsonku çəmə xuni xısusı nıbəsteş?»
¹¹ Bəvədə bə har qıləyni sipiyə libos doəbe iyən votəbe ki, kamişi vaxtən çəş bıkən, bədə bənə bəvon xıdmət kardə iyən kıştənin biə imoniyon siyohi təmom bıbu.

¹² Çəyo az vindime Pəsəvə şəşminə mihî sındinişe. İberdəmədə qıləy bərkə buməlarzə qıniye, həşi bənə muyninə cılı siyo be, ovşumi ranq bə xun oqarde. ¹³ Osmonədə biə astovon bənə vavazi ekardə kolə inci bə zəmin eməyn. ¹⁴ Osmon bənə tumari qulil be şe. Bandon iyən cəziron həmməy ıştə mandə vırayo ni kardə bin. ¹⁵ Bəvədə zəmini dimi podşoon, nomdorə odəmon, sərkərdon,ərbobon, hıkmədon, har qılə ğul iyən ozodə inson məğaronədə iyən bandonədə biə halon arədə niyo bin. ¹⁶ Əvon votışone bə bandon iyən halon: «Bırıjiyə çəmə səpe iyən əməni niyo bıkən taxtədə Niştəkəsiku iyən Pəsəvə ğəzəbiku, ¹⁷ çumçiko Çəvon ğəzəbi yolə ruj oməy rəsəy. Ki çəy vədə mande bəzine?»

Mihî jə biə şəxson

7 Çımi bəpeştə az vindime zəmini dimi çəo kincədə mandə çoqlə mələk. Əvon zəminisə çəo səmtədə vavazi qətəşonbe ki, nə bə zəmini, nə bə dıyo, nəən bə qıləy doy vo nıqını. ² Vindime həşipemə tərəfədə rost biə qıləy co mələk ki, Hest Bıə Xıdo mihî bəykube. Bə zəmini iyən dıyo zərər rosniye ixtiyor doə biə həmon mələki de barzə sədo vanq kardışe çoqlə mələk: ³ «Bə zəmini, bə dıyo iyən bə doon tosə bə vaxti zərər məjənən ki, əmə bəçəmə Xıdo xıdmətəvonon təvili mihî bijənəmon». ⁴ Mihî jə biə şəxson hisobi məsəmə. İsrailijon həmmə ğəbilono bə 144 000 kəsi mihî jə bıbe:

⁵ Yəhudə ğəbiləo 12 000 mihî jə bıəkəs,

Ruveni ğəbiləo 12 000 kəs,

Qadi ğəbiləo 12 000 kəs,

⁶ Aşeri ğəbiləo 12 000 kəs,

Naftali ğəbiləo 12 000 kəs,

Menaşşe ğəbiləo 12 000 kəs,

⁷ Simoni ğəbiləo 12 000 kəs,

Levi ğəbiləo 12 000 kəs,
İssakari ğəbiləo 12 000 kəs,
⁸ Zevuluni ğəbiləo 12 000 kəs,
Yusif i ğəbiləo 12 000 kəs,
Benyamini ğəbiləo bə 12 000 kəsi mihi jə biə.

Sipiye libos tankardə yolə izdihom

⁹ Çimi bəpeştə az vindime ki, har milləto, har ğəbiləo, har xəlğə, har zıvono biə, hiç kəsi aşmarde nıznə qıləy yolə izdihom taxti iyən Pəsəvə navədə mandə. Əvon sipiyə libos tankardəşonbe, ıştə dastonədə xımoə şıvon qətəşonbe. ¹⁰ De barzə sədo nido kardeydəbin:

«Xılosi doy taxtədə niştə çəmə Xıdo iyən Pəsəvə ixtiyorədəy!»

¹¹ Həmə mələkonən, sipirişon iyən çoqlə bəyjiyə məxloğon taxti qırdo mandəbin. Əvon taxti navədə zəvbədim eqıneydəbin, bə Xıdo səcdə kardeydəbin,

¹² voteydəbin: «Amin! Zoləti həmd-səno, izzət,

Hıkmət, şukur, şərəf,

Ğudrət iyən ğıvvət bıbu Bəçəmə Xıdo! Amin!»

¹³ Çəyo sipirişon qıləyni parsəy çımıku: «Sipiye libos tankardə ım şəxson kin iyən çıkonco omən?» ¹⁴ Az votime bəy: «Əğə, ımi tı bəzıneş». Əy votışe bəmi: «İmon yolə məşəğğətonku beşə oməkəsonin. Əvon de Pəsəvə xuni ıştə liboson şıştəşone, sipi kardəşone. ¹⁵ Bı səbəb

Əvon çe Xıdo taxti navədən,

Şəv-ruj Çəy məbədədə Bəy xıdmət kardeydən.

Taxtədə Niştəkəsən

Çəvon səpe məskən ebəğande.

¹⁶ Əvon həni hiç vaxti nə vəşi,

Nəən təşi əmandınin,

Həşi iyən zıl-zılə qam

Əvoni əjəni.

¹⁷ Çumçıko taxti miyonədə biə Pəsəvə

Boəvon Qələvon bəbe,

Əvoni bə jimoni ovi səvonon bəbarde,

Xıdo çəvon həmə çəşə arson bəmoledə».

Haftminə mihi iyən ğızılə buxurdon

8 Keyne ki Pəsəvə sındınışe haftminə mihi osmonədə təxminən nimsaat aşışi be. ² Bəvədə az vindime haft qılə mələk mandə Xıdo navədə. Bəvon haft qılə şeypur doəbe.

³ Co qıləy mələkən oməy iyən mande ğırbonqo navədə. Çəy dastədə ğızılə buxurdon hestbe iyən bəy xəyləki buxur doəbe ki, əv de həmə Xıdo xəlği kardə dıvon bə ico taxti navədə biə ğızılə ğırbonqo səpe təğdim bıke. ⁴ Buxuri duyəvul de Xıdo xəlği kardə dıvon bə ico mələki dasto bə Xıdo və rost be. ⁵ Mələki peqətışe buxurdon, pur kardışe əv de ğırbonqoədə biə otəşi iyən şodoşe bə zəmin. Bəvədə osmonə qurrə, barzə sədo, avəçəkə iyən buməlarzə qıniye.

Şəş qılə şeypuri sədo

⁶ Haft qılə mələk bo haft qılə şeypuri jəy hozı be.

⁷ İminə mələki jəşe ıştə şeypur. Bəvədə xun umjənə tağars iyən otəş ekardə be bə zəmin. Zəmini sədə i ğısm, doon sədə i ğısm, iyən həmə havzə aləfon sutə bin.

⁸ Dıminə mələki jəşe ıstə şeypur. Bəvədə otəşinə dijdə bandi ğəzinə jıçıy sute-sute bə dıyo dilə şodoə be. Çe dıyo seədə i ğısm bə xun oqarde. ⁹ Dıyoədə bıə bəyjiyə məxloğon seədə i ğısm marde. Qəmiyon seədə i ğısm məhv be.

¹⁰ Seminə mələki jəşe ıstə şeypur. Bəvədə bənə vəşəposi sutə qıləy yolə astovə osmono eqniye ruyon seədə i ğısmi iyən ovə səvonon səpe. ¹¹ Bə həmonə astovə «Telə kijəpəni» votə beydə. Çe ovon seədə i ğısm bənə kijəpəni tel be. Vey odəmon ovonku mardin, çumçiko ovon tel bıəbin.

¹² Çominə mələki jəşe ıstə şeypur. Bəvədə həşi, ovşum iyən astovon seədə i ğısm məhv kardə be, bı səbəb çəvon seədə i ğısm siyo be. Ruji, həmçininin şəvi seədə i ğısm beruşnə mande.

¹³ Bəvədə az vindıme osmoni miyonədə qıləy pərə ğəci iyən məsəme çəy de barzə sədo jıqo votəyon: «Vay, vay, vay bə zəminisə jiyəkəson holi bəbe, keynə ki əmandə seqlə mələk ıstə şeypuri bəje!»

9 Pencminə mələki jəşe ıstə şeypur. Bəvədə az vindıme qıləy astovə osmono bə zəmin eqniye. Bə bınnıbə nıǵılı şə çoli haçər doəbe bə astovə. ² Əy okardışe bınnıbə nıǵılı çol, dijdə kurə duyəvuli ğəzinə çolo duyəvul beşe. Çolo beşe çı diyəvuliku həşi iyən həvo siyo be. ³ Duyəvuli diləo çəkürkon beşin eməyn bə zəmin iyən zəminisə bıə qanqəlon zuy ğədərədə bəvon zu doəbe. ⁴ Bəvon votə be ki, zəminisə bə aləfon, bə havzon, bə hiç qıləy doy zərər nijənin, əncəx təvilisə Xıdo mihi nıbə bə odəmon zərər bijənin. ⁵ Bəvon icozə doəbe ki, insonon nıkiştın, əmma bəvon penc manq əzob bıdən. Çoknə qanqəl bəje insoni çəvon doə əzobən jəqo bəbe. ⁶ Bə rujonədə insonon bo marde bənəven, əmma pəydo nıbəkan. Boştə marde orzu bəkan, əmma marde çəvonku bəvite.

⁷ Çəkürkon bənə canq beşe aspi çiyeydəbin. Çəvon sədə ğızılə taci ğəzinə çiçsə hestbe, çəvon dim bənə insoni dimibe. ⁸ Çəvon sədə mu hestbe bənə jenon səy, çəvon dandonon bənə əslani dandononbin. ⁹ Çəvon çənəx bənə osinə canqə zirehibe. Çəvon pəron sədo bənə hıcum dəşə aspə ərəbon sədobe. ¹⁰ Çəvon bənə qanqəli dum iyən ğınə hestişonbe. Çəvon dumədə jıqo zu hestbe ki, bə insonon penc manq zərər doy əznin. ¹¹ Bınnıbə nıǵılı mələk bəvon podşoəti kardeydəbe, çəy nom Məhvəkəbe, ım ibrani zıvonədə «Avaddon», yunani zıvonədə «Apollione».

¹² İminə bəlo dəvarde şe. Imeha, çəy bəpeştə həniyən dıqlə bəlo omeydə.

¹³ Şəşminə mələki jəşe ıstə şeypur. Bəvədə az məsəme Xıdo navədə ğızılə ğırbonqoədə bıə çoqlə şoxo omə qıləy sədo. ¹⁴ In sədo bə dastədəş şeypur bıə bə şəşminə mələki voteydəbe: «Yolə Fəratə ruy kənoədə dəbastə bıə çoqlə mələki vadə». ¹⁵ Bo həmonə saati, ruji, manqi iyən sori hozı kardə bıə çoqlə mələk vadoə be ki, insonon seədə i ğısmi bıkiştın. ¹⁶ Aspə ləşğər dısa milyonbe, az məsəme çəvon hisob. ¹⁷ Az vindemonədə jıqo vindıme, aspon iyən çəvon səpe niştə odəmon: çəvon otəşi ranqədə, tınd kavu iyən bınci ranqədə zireh hestbe. Aspon sə bənə əslani səybe iyən çəvon qəvo otəş, duyəvul iyən qoqurd beşeydəbe. ¹⁸ Çı se bələku, yəni çəvon qəvo beşe otəş, duyəvul iyən qoqurdiku insonon seədə i ğısm həlok be. ¹⁹ Aspon zu çəvon qəvədə iyən dumədəbe. Çəvon dum bənə moribe, çəvon sə hestbe, demi zərər jəydəbin.

²⁰ Çı bəlonku səğ mandə odəmon deştə daston soxtə çiyonku nıqardin, tobə nıkardışone. Bə cınon iyən ğızılə, nıǵə, bıncə, sıǵə, taxtə bıton səcdə kardeyku dast nıkəşəşone. In bıton bo vinde, məse, poye ğadir nin. ²¹ Həmçininin əvon ıstə ğəttolətiku, sehrbozətiku, beəxloğətiku, dızdiətiku tobə nıkardışone.

Mələk iyən qədə tumar

10 Az vindıme osmono epərə co qıləy ğudrətine mələk. Əv de avə dəqətə bıəbe iyən çəy səysə haftranqə hestbe. Çəy dim bənə həşi, lınqon bənə otəşə sunibe. ² Çəy dastədə qıləy qədə oja tumar hestbe. Əy noşe ıstə rostə linq dıyosə, çəpə linq zəminisə. ³ Əy bənə əslani de barzə sədo nıdo kardışe. Əv nıdo kardeədə haft qılə osmonə qurrə deştə sədo votışone. ⁴ Haft qılə

osmonə qurrə qəp jeədə az bo nıvışte hozı beydəbim ki, osmono omə qıləy sədo bəmi votışe: «Bə haft qılə osmonə qurrə votəyon mihi bijən, mənıvışt!»⁵ Bəvədə diyosə iyən zəminisə mandə çımı vində mələki rost kardəşe ıştə rostə dast bə osmon, ⁶ osmon iyən əyo bıəyon, zəmin iyən əyo bıəyon, diyo iyən əyo bıəyon ofəyə kardə bə zol Hest Bıə Xıdo nomi ğəssəm hardışe votışe: «Həni vaxt əbini, ⁷ əmma haftminə mələki şeypur jə rujon Xıdo sırımə niyət qırd bə vırə bərəse, çoknə ki, bəştə xıdmətəvon bıə peyğəmbəron bəyon kardəşe».

⁸ Çımı osmono məsə sədo ijən demı qəp jəşe, jıqo votışe: «Bışı diyosə iyən zəminisə mandə mələki dastədə qədə oje tumari peqət». ⁹ Az şim mələki tonə, bəy votıme ki, qədə tumari bəmi bıdə. Əy votışe bəmi: «Əy peqət bəhə! Əv ıştı mədədə tel, qəvədə isə bənə anqivini şin bəbe». ¹⁰ Az peqətıme in tumar mələki dasto hardıme. Əv çımı qəvədə bənə anqivini şinbe, əmma əy harde bəpeştə çımı mədədə tel be. ¹¹ Bəmi jıqo votə be: «Tı ijənən bo vey xəlgi, milləti, zıvoni, podşo peyğəmbərəti kardəniniş».

Dıqlə şoyd

11 Bəmi bənə ləvo qıləy dəlo doəbe iyən votə be: «Bəşt Xıdo məbədi iyən ğırbonqo bıpam, əyo səcdə kardəkəson başmard! ² Əmma məbədi betonə soy bə nəzər məstən, əvirəy məpam, çumçiko əvirə bə co milləton doəbe iyən əvon mığəddəsə şəhri çılı dı manq bahasten. ³ Az ıştə dıqlə şoydi bəviğandem ki, həmonə 1260 ruji mıddətədə cıl tankardın, peyğəmbərəti bıkən».

⁴ Əvon zəmini soyb bıə Rəbbi navədə mandə dıqlə zeytunə do iyən dıqlə şamdonin. ⁵ Qirəm kiysə bıpiyişe bəvon zərər bijəni, çəvon qəvo otəş bebəşe deşmenon bəsute. Bəvon zərər jə har kəs jıqo kıştə bıənine. ⁶ Çəvon ixtiyor rəseydə ki osmoni bıbastın, peyğəmbərəti kardə rujonədə voş nıvo. Həmçinin çəvon ixtiyor rəseydə ovon bə xun oqordının iyən ıştə piyə ğəderədə har curə bəlo ekən bə zəmin.

⁷ Əvon şoydətıyon sə kardeədə, bəvədə bınnıbə niğiliyonədə beşə əşivoə həyvon deyəvon canq bəkardə iyən əvoni məğlub bəka bəkişte. ⁸ Çəvon cəsədon yolə şəhri əsosə kuçədə oğandə bəben, əyo ki, çəvon Rəbb bə çomex kəşə be. Bə həmonə şəhri rəmzi mənəədə Sodom iyən Misir votə beydə. ⁹ Mıxtəlifə xəlğon, ğəbilon, zıvonon iyən millətono bıə odəmon se rujnim bəçəvon cəsədon diyə bəkan iyən ahaştının əvon bə ğəb noə bıbun. ¹⁰ Zəminisə jiyəkəson bəçəvon mardeyro şoyvo bəkan iyən id bəkan, bə iyəndı baxşon bəviğanden. Çumçiko im dıqlə peyğəmbəri bə zəminisə jiyəkəson əzyət doəşe. ¹¹ İntasi həmonə se rujnim orəxeədə Xıdoku omə jimoni nəfəs bəçəvon dılə dəşe, əvon bə səpo əştin. Bəvədə əvoni vindəkəson bərk tarsəyn. ¹² Ə dıqlə peyğəmbəri məsəşe osmono omə barzə sədo iyən bəvon jıqo votə be: «Rost bıbən iyol!» iyən əvon ıştə deşmenon çəşi vədə avə dılədə rost kardə bin bə osmon. ¹³ Əlbəsaat qıləy yolə buməlarzə quniye iyən şəhri dadə i ğısm viron be. Buməlarzədə haft həzo kəs həlok be, əmandəyon isə bə tars dəşin iyən həmd-səno kardışone bə osmonədə bıə Xıdo.

¹⁴ Dıminə bəlo dəvarde şe. Imeha, seminə bəlo rəyrə omeydə.

Haftminə şeypur

¹⁵ Haftminə mələki jəşe ıştə şeypur. Osmonədə jıqo votə barzə sədon məsəbin:

«Dınyo səpe podşoəti
Bəçəmə Rəbbi iyən Bəçəy Məsihi rəsəy,
Əv zol podşoəti bəkardə!»

¹⁶ Bəvədə ıştə taxtonədə niştə vıstı çoqlə sipiriş Xıdo navədə zəvbədim eqının bə Xıdo səcdə karde-karde ¹⁷ votışone:

«Şukur bıbu Bəti, Kulli-İxtiyor Rəbbə Xıdo,

Kom ki Heste iyən Hestbe,
 Çumçiko Tı deştə yolə ğudrəti
 Niştış ıştə Podşoəti taxtədə.
¹⁸ Co milləton ğəzəbin bin,
 İştı ğəzəbi vaxtən rəse.
 Bo mardon mihokimə karde,
 İştı xıdmətəvon bıə
 Peyğəmbəron, Xıdo xəlği,
 Bəştı nomi ehtırom kardəkəson,
 Bə rukon iyən yolon mıkofot doy,
 Dınyo məhv kardəkəson
 Məhv karde vaxt rəse».

¹⁹ Xıdo osmonı məbəd obəy iyən Çəy Əhdi Sundox əyo çiyey. Bəvədə avəçəkə, barzə sədo, osmonə qurrə, buməlarzə iyən zumandə tağars be.

Jen iyən əjdəho

12 Osmonədə qıləy yolə əlomət zahir be: qıləy jen çiyəy, əy tankardəşbe həşi bəştə tan, ovşum çəy lınqon jiyədəbe iyən çəy sədə donzə astovə bıə toc hestbe. ² Jen əğılbəbolobe. Doj kəşe-kəşe zikkə jəydəbe, çumçiko zandeydəbe. ³ Osmonədə qıləy co əlomət zahir be: otəşi ranqədə qıləy əşivoə əjdəho çiyəy, çəy haft qılə sə, da qılə şox, səon səpe haft qılə qədə toc hestbe. ⁴ Çəy dumi dəritişe osmonı astovon seədə i ğısm, şodoşe bə zəmin. Əjdəho bo zande hozı bıə jeni vədə mande ki, jen zandencə çəy əğılı ebə. ⁵ Jeni zandışe qıləy zoə əğıl. Əv de ostonə ləvo bə həmə milləton əğəti bəka. Im əğıl peqətə be bə Xıdo iyən Bəçəy taxt. ⁶ Jen isə bə daşt vite. Əyo Xıdo tərəfo boəy hozı kardə bıə vırə hestbe ki, əv 1260 ruji mıddətədə perosniyə bıbu.

⁷ Osmonədə canq be. Mikail iyən çəy mələkon canq kardışone de əjdəho. Əjdəho iyən çəy mələkon canq kardışone deyəvon, ⁸ əmma əjdəho zu nıvışkiye. Əvon osmonədə qın kardışone ıştə vırə. ⁹ Ə yolə əjdəho – iblis yaan Şəyton voteydən bəy, həmə dınyo bə dast dəğandə ə ğədımə mor şodoə be bə zəmin, mələkonən deyə bə ico şodoə bin.

¹⁰ Az məsəmə osmonədə qıləy barzə sədo jıqo votəyon:

«Esət oməy çəmə Xıdo xılos,
 ğıvvə iyən Podşoəti,
 Çəy Məsihi hıkmronəti.
 Çumçiko çəmə imoniyon
 Şəv-ruj Xıdo navədə
 Qınobəqi kardə ittıhoməkə bə zəmin şodoə be.

¹¹ Əvon de Pəsəvə xuni iyən
 Deştə kardə şoydətiyon vositə
 Ğalib oməyn bəy.
 Hətto de marde dimbədım omeədən
 İştə conı ğəmi nıqətin.

¹² Bı səbəb ha osmonon iyən
 Əyo səbəso bıəkəson, id bıkən!
 Vay bə zəmini iyən dıyo holi!
 Çumçiko iblis de yolə ğəzəbi evoy şımə tonə,
 Zıneydə ki, çəy vaxt kam mandə».

¹³ Əjdəho vindeədə ki, əv şodoə be bə zəmin, eqniye çe zoə zandə jeni dumoysə. ¹⁴ Əmma bə jeni yolə ğəcı dıqlə pər doəbe ki, bıpəri bə daşt – bəştə vırə, mori dast rəsə vırəyku nığo kardə bıbu iyən əyo i sor, dı sor iyən niməsor perosniyə bıbu. ¹⁵ Mor ıştə qəvo bənə ruy ov peşandişe jeni dumoysə ki, ovəyz bıbə əy. ¹⁶ İntasi zəmini koməq kardışe bə jeni: zəmini okardışe ıştə qəv iyən peşoməşe əjdəho qəvo beşə ru. ¹⁷ Bəvədə əjdəho ğəzəbnok be bə jeni, şe çəy nəsilə bıə bə Xıdo əmron rioyət kardə iyən bə İsa şəhodəti bəfomand bıə de əmandəyon bo canq karde. ¹⁸ Əjdəho diyokənoədə ğumisə mande.

Dıyoo beşə əşivoə həyvon

13 Az vindıme dıyoo beşə qıləy əşivoə həyvon. Çəy da qılə şox iyən haft qılə sə hestışbe. Çəy şoxon səpe da qılə qədə toc hestbe, səon səpe bə Xıdo kufır kardə nomon nıvıştə bıən. ² Çımı vində əşivoə həyvon bə vəşəqi oxşərbe. Çəy lınqon bənə hırsi lınqon, çəy qəv bənə əslani qəvibe. Əjdəho bəy ıştə zu, taxt iyən yolə hakimiyət doşe. ³ Əşivoə həyvoni səon qıləyni yarəjə bıəbe, marde holədəbe, əmma çəy ın yarə çok be. Həmə dınyo de heyrəti çə əşivoə həyvoni dumo şe. ⁴ İnsonon bə əjdəho səcdə kardışone, çumçıko əy bə əşivoə həyvoni hakimiyət doəşbe. Həmçinin bə əşivoə həyvoni səcdə kardışone iyən votışone: «Ki to be bəzıne bı əşivoə həyvoni iyən ki deəy canq karde bəzıne?»

⁵ Bə əşivoə həyvoni ğıloşəti kardey iyən kufır voteyro ixtiyor doəbe. Həmə bəy ıştə hakimiyəti çılı dı manq icro kardeyro səlohiyət doəbe. ⁶ Əy okardışe ıştə qəv ki, kufır bıkə bə Xıdo, Bəçəy nomi, həmçinin bəçəy məskəni, yəni osmonədə səbəso bıəyon həmməy kufır bıkə. ⁷ Bəy icozə doəbe ki, de Xıdo xəlği canq bıkə, bəvon ğalib bo. Həmçinin bəy həmə ğəbilon, xəlğon, zıvonon iyən milləton səpe hakimiyət doəbe. ⁸ Zəminisə jiyəkəson həmməy bəy səcdə bəkan. Əmma bə ğırbon doə bıə Pəsəvəy Jimoni Kitobədə dınyo ofəyə beyku jıqoşə nom nıvıştə bıəkəson səcdə nıkardeşone.

⁹ Çiki hestışe quş, bıdə bıməsi.

¹⁰ Ki əsir bıənine,

Bə əsirəti şeydə,

Ki de şımşı kıştə bıənine,

De şımşı kıştə beydə.

Bəpe Xıdo xəlği imon bıbuşe iyən petove bızını.

Zəmino beşə əşivoə həyvon

¹¹ Az vindıme zəmino beşə co qıləy əşivoə həyvon. Çəy pəsəvə şoxi ğəzınə dıqlə şox hestışbe, əmma əv bənə əjdəho qəp jəydəbe. ¹² İminə əşivoə həyvoni həmə səlohiyət bəy doə bıəbe ki, deçəy nomi idorə bıkə. Əv dınyoədə iyən əyo jiyəkəson məcbur kardəbe ki, bə mardə holədə yarəku çok bıə əşivoə həyvoni səcdə bıkən. ¹³ Əv yolə əloməton nişo kardeydəbe, hətto insonon navədə osmono bə zəmin otəş ekardeydəbe. ¹⁴ İminə əşivoə həyvoni bəy doə de ın əloməton dınyoədə jiyəkəson bə dast dəğandeydəbe ki, de şımşı yarəjə kardə bıə, əmma səlomət mandə həmonə əşivoə həyvoni heykəli bısoxtın. ¹⁵ Bəy imkon doə bıəbe bə həmonə əşivoə həyvoni heykəli nəfəs bıdə. In heykəl qəp bıjəni iyən bəy səcdə nıkardəkəson kışteyro əmr bıkə. ¹⁶ Əv məcbur kardeydəbe ki, bə həmməy rostə dasti yaan təvili, bə yoləon iyən rukon, ərbobon iyən kosibon, ozodon iyən ğulon dəmgə bıjənin. ¹⁷ Jıqoən bəki ın dəmgə jə bıəni, yəni həmonə əşivoə həyvoni nom yaan çəy nomi ifodə kardə rəğəm, bə həmonə odəmi icozə ədənin çışsə bıhırı iyən bəhvati. ¹⁸ Bımədə mudrik be lozime. Çiki hestışe ağıl, bıdə bı əşivoə həyvoni məxsus bıə rəğəmi hisob bıkə, çumçıko ım insoni rəğəme. Çəy rəğəm 666-e.

Pəsəvə iyən 144 000 şəxs

14 Az vindıme ki, Pəsəvə Sion bandədə mandə. Deəy ivirədə 144 000 şəxs hestbe. Çəvon təvilisə Pəsəvə nom iyən Çəy Pıə nom nıvıştə bıə. ² Az osmono bənə qurə ovon sədo iyən bərkə osmonə qurrə qıləy sədo məsəme. Çımı məsə sədo bənə arfon sədobe, jıqo bızın arfə jəydəbin. ³ Əvon taxti, çoqlə bəyjiyə məxloği iyən sipirişon navədə qıləy tojə mahne handeydəbin. Hiçki omute nıznəşe ın mahne, ğərəyz dınyo əsirətiku hıriyə ozod kardə bıə 144 000 şəxsi. ⁴ Im odəmon ənəbustə merdonin, çumçiko de jenon əloğəku ıstəni mirdol kardəşonni, pokin. Pəsəvə bə kovrə bışo, əvonən çəy dumoysə şeydən. Əvon insonon dilədə hıriyə bin ki, bə Xıdo iyən bə Pəsəvə bənə iminəvəçə məxsus bıbun. ⁵ Çəvon qəvo hiç vaxti duyəvoje qəp beşəni iyən beaybin.

Xəbə vardə seqlə mələk

⁶ Az vindıme osmoni miyonədə pərə co mələk. Əy pevılo kardeyro zolə Şoyə Xəbə vardəşbe bo zəminisə jiyəkəson, har milləti, har ğəbilə, har zıvoni iyən har xəlği. ⁷ Mələk de barzə sədo voteydəbe: «Bıtarşən Xıdoku, Bəy izzət bıdən! Çəy mıhokimə karde vaxt oməy. Səcdə bıkən bə osmoni, zəmini, dıyo iyən ovə səvonon Ofəyevonə Xıdo!»

⁸ Dıminə mələkən çəy dumoysə omeədə voteydəbe: «Viron be, dijdə Babil şəhri viron be! Əy doəşbe peşome beəxloğəti tındə çəxır bə həmə milləton».

⁹ Çımon dumoysə seminə mələkən omeydəbe, de barzə sədo voteydəbe: «Ki bə əşivoə həyvoni iyən bəçəy heykəli səcdə bıko iyən bəştə təvili yaan dasti dəmğo ğəbul bıko, ¹⁰ əv çe Xıdo ğəzəbi tosədə hozı kardə bıə ğıyzi tındə çəxırı peşomənine. Bı jıləvonon mığəddəsə mələkon iyən Pəsəvə navədə de otəşi iyən qoqurdi əzob doə bəbe. ¹¹ Bəvon doə bıə əzobi duyəvul zol rost bəbe. Bə əşivoə həyvoni iyən bəçəy heykəli səcdə kardəkəson, çəy nomi dəmğo ğəbul kardəkəson şəv-ruj rohati pəydo əkənin».

¹² Bə Xıdo əmron rioyət kardəkəson iyən bə İsa bəfomand bıəkəson bəpe petovın.

¹³ Bəvədə məsəme osmono jıqo votə sədo: «Bınıvışt: çımı bəpeştə bə Rəbi məxsus bıə mardəkəson çı baxtəvərin!» Xıdo Ruf voteydə: «Bəle, əvon ıstə kardə qonə koonku rohati pəydo bəkan, çumçiko çəvon əməlon səkiştə çəvon dumoysə şeydə».

Zəminisə məhsuli dıven

¹⁴ Az vindıme ki, qıləy sipiyə avə heste iyən bənə Bəşəri Zoə Şəxsi nıştə avə səpe. Çəy sədo ğızılə toc iyən çəy dastədə tijə çin heste. ¹⁵ Co qıləy mələk beşe məbədo, de barzə sədo votışe bə avəsə Nıştəkəsi: «İştə çini dənə bə ko iyən bıdıv. Oxo zəminisə kaştəyon rəsən, dıveni vaxt omə». ¹⁶ Avəsə Nıştəkəsi evardışe İştə çin bə zəmin iyən zəmini məhsul dıvə be.

¹⁷ Co qıləy mələk osmonədə bıə məbədo beşe. Çəy dastədən tijə çin hestbe. ¹⁸ Co qıləy mələkən beşe osmonədə bıə ğırbonqoo. Çəy otəşi səpe hakimiyət hestışbe, əy de barzə sədo nıdo kardışe bə dastədə tijə çin bıə mələki: «İştə tijə çini dənə bə ko iyən zəminisə anqıə rəzo huşon bıdıv, çumçiko anqıon rəsəyn». ¹⁹ Mələki evardışe ıstə çin bə zəmini dim iyən zəminisə bıə anqıə rəzi huşon dıvəşe iyən şodoşe bə Xıdo ğəzəbi yolə anqıəhast. ²⁰ Anqı şəhro kənoədə bıə anqıəhastədə hastə be. Anqıəhasto xun beşe iyən tosə aspi cılavı rost be, 1600 stadi ğədər məsofədə ru be.

Haft qılə mələki vardə haft bəlo

15 Az vindıme osmonədə qıləy yolə iyən heyrətınə əlomət – haft qılə mələki haft bəlo vardəşonbe. İmon oxonə bəlonin, çumçiko Xıdo ğəzəb deyimon təmom beydəbe.

² Az vindime bənə otəş umjənə şişə dıyo. Bə əşivoə həyvoni, bəçəy heykəli iyən bəçəy nomi ifodə kardə rəğəmi ğalib oməkəson mandəbin şişə dıyo səpe. İştə dastonədə Xıdo doə arfon qətəşonbe. ³ Əvon handeydəbin Xıdo xıdmətəvon Musa mahne iyən Pəsəvə mahne:

«Ha Kulli-İxtiyor Rəbbə Xıdo,
İştı koon yolin iyən heyrətinin.
Ha milləton Podşo.
İştı roon ədolətinin iyən bərhəxin.

⁴ Ya Rəbb, ki İştıku ətarsını,
Ki Bəştı nomi izzət ədəni?
Çumçıko əncəx Tınış mığəddəs.
Həmə milləton bomen,
Səcdə bəkan İştı navədə,
Çumçıko İştı ədolətinə hıkmən bə oşko beşin».

⁵ Çimi bəpeştə vindime osmonədə biə məbəd, yəni Şəhodəti Çodı obe. ⁶ Çəyo haft qılə mələk beşe, əvon haft qılə bəlo vardəşonbe. Əvon təmizə iyən viriskə jə kətonə libos tankardəşonbe, bəştə sinə ğızılə kıştı dəbastəşonbe. ⁷ Bəvədə çoqlə bəyjiyə məxloğon qıləyni doşe bə haft qılə mələki çe zol Hest Bıə Xıdo de ğəzəbi pur biə haft qılə ğızılə tos. ⁸ Xıdo izzətiku iyən ğudrətiku məbəd de duyəvuli pur be. Tosə haft qılə mələki vardə haft bəlo təmom be, hiçki bə məbəd dəşe nızne.

Xıdo ğəzəbi haft qılə tos

16 Az məsəmə məbədə qıləy barzə sədo. Əy votışe bə haft qılə mələki: «Bışən, çe Xıdo ğəzəbi haft qılə tosi peş bıkən bə zəmin!»

² İminə mələk şe, peş kardışe ıştə tos bə hışki. Bəki əşivoə həyvoni dəmğə jə bıəbe, bəçəy heykəli səcdə kardeydəbe çəvon andomədə doj doə çırk kardə anqılən beşin.

³ Dıminə mələki peş kardışe ıştə tos bə dıyo iyən dıyo bə xun oqarde, bənə mardə odəmi pındə xuni be. Dıyoədə biə bəyjiyon həmməy məhv bin.

⁴ Seminə mələki peş kardışe ıştə tos bə ruyon iyən ovə səvonon, əvonən bə xun oqardin.

⁵ Bəvədə az məsəmə ovon mələki jıqo votəyon:

«Ha Hestə, Hest Bıə İlahi,
Tı ədolətiniş ki, jıqo hıkmı bekarde.

⁶ Oxo əvon ekardışone çe Xıdo xəlği iyən peyğəmbəron xun.
Tınən peşomeyro xun doy bəvon.
Əvon bimi loyiğın».

⁷ Az məsəmə ğırbonqoo omə qıləy sədo:

«Bəle, ha Kulli-İxtiyor Rəbbə Xıdo,
İştı hıkmən bərhəxin iyən ədolətinin».

⁸ Çominə mələki peş kardışe ıştə tos bə həşi iyən bə həşi icozə doəbe ki, odəmon de otəşi bısutı.

⁹ Zılzılə qami sutışe odəmon iyən əvon bə ın bəlon vığandə Xıdo nomi kufr kardışone. Əmma tobə nıkardışone, izzət nıdoşone Bəy.

¹⁰ Pencminə mələki peş kardışe ıştə tos bə əşivoə həyvoni taxt iyən toyki eqətışe çəy podşoəti. Odəmon əzobiku bə ğıç qətışone ıştə zıvonon. ¹¹ İştə əzobon iyən yaron səbəbo bə osmononədə biə Xıdo kufr kardışone. Əmma tobə nıkardışone ıştə əməlonku.

¹² Şəşminə mələki peş kardışe ıştə tos bə yolə Fəratə ru iyən çəy ov bə hışk qınıye ki, bo həşipeməo omə podşoon ro obıbu. ¹³ Vindime ki, çe əjdəho qəvo, əşivoə həyvoni qəvo iyən duyəvojə peyğəmbəri qəvo bə vəzəxi oxşər seqlə mırdolə ruf beşe. ¹⁴ İmon əloməton nişo kardə

cini rufonin iyən əvon dınyo podşoon həmməy tonə şin ki, əvon Kulli-İxtiyorə Xıdo Hıkmı Rujədə bə canq qırdə bıbun. ¹⁵ Rəbb voteydə: «İmeha, Az berdəmədə dızdi ğəzinə omeydəm, çı baxtəvərə oğə mandəkəs iyən ıştə oləton tanədə oqətəkəs, əv hiç vaxti qucili əmandını iyən hiçki çəy aybi əvindını!» ¹⁶ In rufon qırdə kardışone podşoon ıbranicə bə Armaqedon nomədə bıə vıərə.

¹⁷ Haftminə mələki peş kardışe ıştə tos bə həvo iyən məbədədə bıə taxto «Təmom be!» votə qıləy barzə sədo oməy. ¹⁸ Bəvədə avəçəkə, barzə sədo, osmoni qurrə iyən qıləy yolə buməlarzə qınıye. Buməlarzə jıqo bərk be ki, insoni zəminisə jiyə dovriku jıqoşə çımisə yoli qınıyə nıbe. ¹⁹ Dıjdə şəhr bə se vıərə co be iyən milləton şəhr vıron mande. Xıdo tərəfo dıjdə Babil bə yod dənoə be ki, çə Xıdo şiddətinə ğəzəbi şərovi purə piyolə bəy doə bıbu. ²⁰ Həmə cəziron ni bin iyən bandon nıçıyen. ²¹ Osmono dıjdə tağars voəy odəmon səpe, har qıləyni qonə sıği to əbi. Tağarsə bəlo anə vey şiddətin be ki, bı səbəb insonon bə Xıdo kufır kardışone.

Beəxloğə jen

17 Dastədə haft qılə tos bıə haft qılə mələki qıləyni oməy demı qəp jəşe iyən votışe: «Boy, veyə ovon səpe nıştə yolə beəxloğə jeni barədə beşəninə hikmi bəti nişə bıkəm. ² Dınyo podşoon deəy beəxloğəti kardışone iyən zəminisə jiyəkəson çəy beəxloğəti çəxıradə siconi peşoməşone». ³ Əy de Rufi vositə bardışe mını bə daşt. Az vindime ki, əyo qıləy jen sıə ranqisə bıə əşivoə həyvoni səpe nıştə. Çəy səpe həmməyəvo kufərə nomon nıviştə bıən. Çəy haft qılə sə, da qılə şox hestışbe. ⁴ Jeni vənəşə iyən tınd sıə ranqədə xələt tankardəşe. İştəni de ğızılı, mırvari iyən ğıymətinə ləl-cəvohiri dərostəşe. Çəy dastədə ğızılə piyolə hestbe, ın piyolə deçəy beəxloğətion oləyzə iyən mırdolə çiyon purbe. ⁵ Çəy təvilisə isə ın sırinə nom nıviştə bıəbe: «Dınyo beəxloğə jenon iyən oləyzə çiyon moə bıə dıjdə Babil». ⁶ Az vindime ki, jen çə Xıdo xəlği iyən bo İsa şoydəti kardəkəson xuni peşomeyku sərxoş bıə.

İmi vindeədə hədəyon beyku bəştə ome nıznem. ⁷ Bəvədə mələki votışe bəmı: «Boçi hədəyon biş? Az jeni iyən jeni çəy səpe nıştə haft sə iyən da şoxış bıə əşivoə həyvoni sıri botı obəkam. ⁸ İştı vində əşivoə həyvoni hestbe, esət ni. Çəyo əv ijən bınmıbə nığılıyono bebəşe iyən bo həlok bey bəşe. Zəminisə jiyə iyən dınyo ofəyə beyku jıqoşə bə Jimoni Kitob çəvon nomon nıviştə nıbə odəmon əşivoə həyvoni vindeədə hədəyon bəmanden. Çumçiko əv hestbe, esət ni, əv ijən bome.

⁹ Bımədə mudrikəti iyən ağıl lozime. Haft qılə sə, haft qılə bande. Jen bandon səpe nıştə. Həmçinin ımon haft qılə podşoonin. ¹⁰ Çəvonədə penc qılə mardə, qıləyni mandə, ə qıləyni isə hələ oməni iyən omeədə kam mıddət mandəninə. ¹¹ Hest Bıə, esət ni bıə əşivoə həyvoni həştminəni podşoye. Əvən bənə bə haft qılə podşoye iyən bo həlok bey şeydə. ¹² İştı vində da qılə şox hələ podşoəti nıkardə da qılə podşoye. Əvon de əşivoə həyvoni bə ico hakimiyəti i saat bə dast bəsten. ¹³ Çəvon iqlə niyə heste, ıştə ğudrəti iyən hakimiyəti bə əşivoə həyvoni təhvil bədon. ¹⁴ Əvon de Pəsəvə mıhoribə bəkan, əmma Pəsəvə bəvon ğalib bome. Çumçiko Əv çə əğon Əğəy, çə podşoon Podşoy. Əy kiş sədo kardə, kiş vıjnyə, ki Bəy bəfomande əvon Deəy bə ivıərə bəben».

¹⁵ Mələki votışe bəmı: «İştı vində ın ovon, kom ki beəxloğə jen nıştə çəy səpe, əvon xəlğon, izdihomon, milləton iyən zıvononin. ¹⁶ İştı vində əşivoə həyvoni iyən da qılə şox isə bə beəxloğə jeni nıfrət bəkərdə, əy vıron bəka, qucili obəqəte, çəy qujdi baharde iyən otəşədə bəsute. ¹⁷ Çumçiko Xıdo ımı bəçəvon dilon noşə ki, çə Xıdo niyəti bə vıərə bırosnın, tosə Çəy sıxanon təmom be de iyəndı həmfikir bıbun, ıştə podşoətiyon bə əşivoə həyvoni təhvil bıdən. ¹⁸ İştı vində jen dınyoədə bıə podşoon səpe podşoəti kardə dıjdə şəhre».

Babil şəhri dərijiye

18 Çımı bəpeştə vindime osmono epərə co qıləy mələk. Çəy yolə hakimiyət hestbe. Zəmin deçəy ehtişomi ruşin be. ² Əy de barzə sədo nido kardışe:

«Dərijiye! Dıjdə Babil dərijiye!

Əvirə cınon məskən be,

Har curə mirdolə rufi mənzil,

Har curə mirdolə pərəndə lonə,

Har curə mirdolə iyən oləyzə əşivoə həyvoni daldə be.

³ Çumçiko milləton həmməy

çə jeni beəxloğəti tındə çəxırədə peşoməşone.

Dınyo həmə podşoon

Beəxloğəti kardışone deəy.

Tociron deçəy hərisəti gəzənc kardə tənxoərbob bin».

⁴ Az məsəme osmono omə, jıqo votə qıləy sədo: «Ha Çımı xəlğ, beşən Babilo ki,

Şimənən bəçəy qınon xanboz məbən,

Bəçəy sə omə bəlon duço məbən.

⁵ Çumçiko çəy qınon tayə bin bə osmoni rəsəyn,

Xıdo bə yod dənoşe çəy nohəxə koon.

⁶ Əy çiç kardəşbe,

Şimənən çəy əvəzi jəqo bıkənən bəy.

Çəy əməlon dığati bıdən bəy.

Çəy pur kardə çəxırı piyolə

Dığat pur bıkən bıdən bəy.

⁷ Çanə izzət doəşbe bəştə

Iştəni bə hərisəti təslim kardəşbe,

Anə əzob iyən gəhər bıdən bəy.

Çumçiko iştə dılədə voteydə:

“Az taxtədə niştə qıləy mələkim,

Vevə mandənim, əslo yas nıbəqətem”.

⁸ Əve qıləy ruj bəbe

Bəçəy sə bəlon bomen,

Marde, bəmə-şivən iyən vəşyəni.

Otəşədə sutə bəbe.

Çumçiko əy mihokimə kardə Rəbbə Xıdo gıdrətine».

⁹ Deəy beəxloğəti kardə iyən hərisəti dılədə jiyə dınyo podşoon çəy otəşo beşə duyəvuli vindeədə boəy bəbəmen iyən kirdi bəjen. ¹⁰ Çəy kəşə əzobi tarsiku diyəroədə bəmanden iyən bəvoten:

«Vay, vay bəştı holi, dıjdə şəhr,

Ğoymə şəhr Babil!

Çumçiko i saati dılədə iştə cəzo səy».

¹¹ Dınyo tocironən boəy bəmeydən, yas qəteydən, çumçiko həni hiç kəs çəvon molon səydəni – ¹² gızıl, nığə, gıymətinə ləl-cəvohiroton iyən mırvorıyon; nozıkə kəton, avşum, tınd sıə iyən ranqrisinə parçon; har curə xoşbuyə doy; fili astəo, ən gıymətinə doyo, bırıncə, osıno iyən mərməro bıə har curə conəvə; ¹³ dorçin, hil, buxur, xoşbuyə ruyən iyən kundur; çəxır, zeytunə

ruyən, namə ordə iyən qandım; mol-mələ, pəson, aspon iyən ərəbon; insoni andomon iyən conon səkəsən həni ni. ¹⁴ Əvon voteydən:

«Çəy dili piyə mivon çəy dasto beşe,
Ni be ıstı həmə cəh-cəlolinə molon.
Əvon hiç vaxti əbinin».

¹⁵ Əyo de ın molon ərbob biə tociron ın şəhri kəşə əzobi tarsiku diyəroədə bəmanden, bəbəmen iyən kirdi jəy-jəy bəvoten:

¹⁶ «Vay, vay bəştı holi,
Nozıkə kəton, tınd sıə iyən
Ranqrisinə parçono olət tankardə,
Ğızıl, ğıymətinə sığon iyən de mırvoriyon
Dərostə biə şəhr!

¹⁷ Imha, i saati dilədə
Anə tənxo viron be».

Həmə qəmi rəison, ro kardəkəson, diyovonon iyən diyəədə ticorət kardəkəson həmməy diyəro bəmanden, ¹⁸ diyə bəkan bəçəy otəşo beşe duyəvuli, fəryod bəkarden: «Kon şəhr to be bəzine bı dijdə şəhri?» ¹⁹ Əvon xok ekardən bəştə sə, fəryod karde-karde bəmeydən, kirdi jəydən iyən voteydən:

«Vay, vay bəştı holi,
Diyəədə qəmi soybon həmməy
De çəvrəy vey ğıymətinə molon
Ərbob biə dijdə şəhr!
Çumçıko i saati dilədə viron biş».

²⁰ Ha osmonon,
Xıdo xəlg, həvariyon iyən peyğəmbəron,
Şo bıbən bəçəy holi!
Çəy bəşmə sə vardəyon
Xıdo bəçəy ıştən sə bəvarde.

²¹ Qıləy ğırvəynə mələki peqətışe osyo sıği to qıləy sığ, şodoşe bə diyə iyən votışe:

«Dijdə şəhr Babilən
De jıqo şiddəti dəbərijiye,
Həni hiç vaxti nıbəçiye.

²² Arfə jəkəson, mahne handəkəson,
Tutək iyən şeypur jəkəson sədo
Həni nıbome ıştıno.
De har curə sənəti mışğol biə sənətkor
Həni benıbəşe ıştıno.

Osyə sədo
Həni nıbome ıştıno.

²³ Çoy ruşnə
Həni nıbəçiye bətinədə.
Tojəbəqi iyən vəyu sədo
Həni nıbome ıştıno.
Çumçıko ıstı tociron
Dınyəədə yavə nom bekindəşonbe,

Həmə milləton
 İştı sehrbozətiku dəqijyəbin.
²⁴ Çe peyğəmbəron, Xıdo xəlği iyən
 Zəminisə qiy jəbəkəson həmməy xun
 Bı şəhrədə ekardə be!»

Osmonədə həmd-səno

19 Çımi bəpeştə osmonədə yolə izdihomi sədo ğəzinə qıləy barzə sədo məsəme. Əvon voteydəbin:

«Halleluya!
 Xılos, izzət iyən ğudrət
 Bəçəmə Xıdo məxsuse!
² Çumçıko Çəy hıkmən
 Bərhəxin iyən ədolətinin:
 Əy mıhokimə kardışe,
 Deştə beəxloğəti dınyo royku bekarədə
 Yolə beəxloğə jen,
 İştə xıdmətəvonon xuni xısusı çəyku səşe».

³ Əvon ijən votışone:

«Halleluya!
 Beəxloğə jeno beşe duyəvul zol rost beydə».

⁴ Bəvədə çordə qılə sipiriş iyən çoqlə bəyjiyə məxloğ zəvbədim qımin, səcdə kardışone bə taxtədə nıştə Xıdo, votışone:

«Amin! Halleluya!»

⁵ Taxto qıləy sədo oməy:

«Həmd-səno bıken bəçəmə Xıdo,
 Ha Çəy həmə xıdmətəvonon,
 Xıdo ehtiromi oqətəkəson,
 Yolon iyən rukon!»

⁶ Az məsəme bənə dıjdə izdihomi, qurə ovon iyən zumandə avəqurrə sədo ğəzinə qıləy sədo. In sədo voteydəbe:

«Halleluya!
 Çəmə Kulli-İxtiyor Rəbbə Xıdo
 Dəmande podşoəti karde!

⁷ Boən şo bıbəmon, şoyvo bıkəmon,
 Bəy izzət bıdəmon!

Çumçıko çe Pəsəvə vəyəy.
 Çəy vəyu ıştəni hozı kardəşe.

⁸ Bəy bo tankarde

Təmizə, viriskə jə, tənıke kətonə libos doəbe».

Tənıke kəton Xıdo xəlği salehə əməlon rəmze.

⁹ Bəvədə mələki votışe bəmi: «Bınıvişt: Çı baxtəvərin bə Pəsəvə vəyə dəvət bıəkəson!»
 İjənən votışe bəmi: «İmon çe Xıdo həğiğiyyə sıxanonin». ¹⁰ Az bəçəy po dəqınim ki, səcdə bıkəm. Əmma əy votışe bəmi: «Ne, ımi məkə! Azən bənə tı iyən İsa barədə şoydəti kardə bənə ıştı imoniyyə boon çe Xıdo xıdmətəvonim. Bə Xıdo səcdə bıke. Oxo İsa şoydəti – peyğəmbərəti rufi ıştəne».

Sipiyə aspisə biə Aspo

¹¹ Az vindime ki, imha, osmon obe iyən əyo qıləy sipiyə asp heste. Çəy peştisə niştə bə Aspo Bəfomand iyən Bərhəx nom doə biə, Əv de ədoləti hıkm bekardeydə iyən canq kardeydə. ¹² Çəy çəşon bənə otəşinə yəlovin. Çəy sədə veyə toc heste iyən Çəy səpe qıləy nom nıvıştə biə, ğərəyz Çəy İştəni hiçki zıneydəni. ¹³ Çəy tanədə bə xun dəşə qıləy libos hestbe. Çəy nom Xıdo Kəlome. ¹⁴ Osmonədə biə ləşğəron sipiyə, təmizə iyən tənıkə kəton tankardəşonbe. Əvon bə sipiyə aspon peniştəbin, Deəy şeydəbin. ¹⁵ Çəy qəvo bo milləton kışteyro qıləy tijə şımşı beşeydə. Əv de ostənə ləvo bəvon əğəti bəka. Kulli-İxtiyor Xıdo şiddətine ğəzəbi çəxırı hozı kardə anqıəhasti Əv İştən bahaste. ¹⁶ Çəy libosi iyən roni səpe in nom nıvıştə biə: «Podşoon Podşoye iyən əğon Əğəye».

¹⁷ Az vindime həşiadə mandə qıləy mələk. Əy de barzə sədo osmoni miyonədə bə pərə pərəndon həmməy nido kardışe: «Bəənən bə Xıdo yolə ziyofət. Bə ivirə qırdə bıbən ¹⁸ bo podşoon, sərəkədon, pəhlivonon qujdi, aspon iyən bəvon peniştə odəmon qujdi, ozodon iyən ğulon qujdi, yolon iyən rukon həmməy qujdi hardeyro».

¹⁹ Az vindime ki, əşivoə həyvön, dınyo podşoon iyən çəvon ləşğəron de aspi səpe niştə Aspo iyən Deçəy ləşğəri bə canq qırdə bıən. ²⁰ Əşivoə həyvön iyən deəy bə ivirə duyəvoje peyğəmbər qətə be. Ə peyğəmbəri de əşivoə həyvoni nomi əloməton nişo kardəşbe, odəmon bə dast dəğandəşbe ki, əşivoə həyvoni dəmgə ğəbul bıkən iyən bəçəy heykəli səcdə bıkən. Əvon har dıqləyni bəyji-bəyji şodoə be de qoqurdi sutə bə otəşinə qol. ²¹ Çəvon ləşğər esə boy aspi səpe niştə de Aspo qəvo beşə şımşı kıştə bin. Pərəndon həmməy deçəvon qujdi si bin.

Həzosornə Podşoəti

20 Çəyo az vindime qıləy mələk osmono epərəy. Çəy dastədə çe bınnıbə nığılıyon haçər iyən yolə zincir hestbe. ² Əy bo i həzo sor mıddəti bə zincir jəşe həmonə əjdəho – iblis yaan Şəyton votə biə ə ğədımə mor. ³ Şodoşe əv bə bınnıbə nığılı iyən bastışe əvirə, bəçəy dəşəco mihi jəşe ki, detosə həzo sor təmom be həni xəlğon bə dast dəğande nızni. Çımi bəpeşt əv bo kamişə mıddəti ozod kardə bıənine.

⁴ İjən az vindime taxton iyən çəvon səpe niştəkəson. Bəvon bo hıkm karde ixtiyor doəbe. Vindime İsa barədə şoydəti kardəkəson iyən Xıdo kəlomi roədə qiy jə biə conon. Komon ki səcdə kardəşonnıbe bə əşivoə həyvoni iyən bəçəy heykəli iyən dəmgə ğəbul kardəşonnıbe bəştə təvili yaan dasti. Əvon bəyji bin de Məsihi bə ivirə həzo sor podşoəti kardışone. ⁵ Im iminə bəyji beye. Əmandə mardon esə boy detosə həzo sor təmom nıbe bəyji nıbin. ⁶ Baxtəvər iyən mığəddəsin ə şəxson ki, iminə bəyji beyədə bə jimon oqardin. Dıminə marde çəvon səpe səlohiyəti nişe. Əvon çe Xıdo iyən Məsihi kahinon bəben iyən i həzo sor Deəy bə ivirə podşoəti bəkarden.

Şəyton şodoə be bə qoqurdə qol

⁷ İ həzo sor təmon be bəpeştə Şəyton ıştə zındono vadoə bəbe. ⁸ Çəyo bebəşe ki, zəminisə ço səmtədə biə milləton – Yəcuc iyən Məcuci bə dast dəğandı, bə canq qırdə bıkə; əvon dıyo ğumi ğədərədən, çəvon hisob zıne beydəni. ⁹ Əvon marş kardışone həmə zəminisə, bə mihosirə qətişone Xıdo xəlği niştəco iyən piyə şəhri. İntasi osmono otəş eqıniye, sutışe məhv kardışe əvoni. ¹⁰ Əvoni bə dast dəğandə iblisən şodobe bə əşivoə həyvoni iyən duyəvoje peyğəmbəri şodoə biə vırə – bə otəşinə qoqurdə qol. Əyo bəvon şəv-ruj zol əzob doə bəbe.

Çe mardon mıhokimə

¹¹ Az vindime dıjdə sipiyə taxt iyən çəy səpe Nıştəkəs. Zəmin iyən osmon Çəy huzuro vitin iyən əvon həni pəydo nıbin. ¹² Az vindime ki, mardon həmməy yolıku bəruk mandən taxti navədə.

Kitobon obin iyən Jimoni Kitob nomədə biə co qıləy kitobən obe. Kitobədə nıvıştəyon əsosədə mardon bəştə əməlon mıvofığ mıhokimə kardə bin. ¹³ Dıyo təslim kardışe ıstəku biə mardon, marde iyən mardon məskəniyən təslim kardışone ıstəku biə mardon. Har qıləyni bəştə əməlon mıvofığ mıhokimə kardə bin. ¹⁴ Marde iyən mardon məskən bə otəşinə qol şodoə be. In otəşinə qol dıminə mardeye. ¹⁵ Çiki nom Jimoni Kitobədə nıvıştə bınıbe həmonə odəm bə otəşinə qol şodoə be.

Tojə osmon iyən tojə zəmin

21 Az vındıme qıləy tojə osmon iyən tojə zəmin. Sıftənə osmon iyən sıftənə zəmin nıbe, həni dıyoən nıbe. ² Az vındıme mığəddəsə şəhr – tojə Yerusəlim, əv osmono, Xıdo tonon evardə beydəbe. Şəhr boştə bəqi dərostə biə vəyu ğəzinə hozı kardə biəbe. ³ Az məsəme taxto jıqo votə qıləy barzə sədo: «Imeha, çe Xıdo məskən insonon arədəy. Xıdo İştən deyəvon ivirədə jimon bəkarde. Əvon Çəy xəlğ bəben, Xıdo çəvon Xıdo bəbe, deyəvon bəjiye. ⁴ Xıdo çəvon çəşə arson həmməy bəmole. Həni marde nıbəbe. Yas, nolə iyən doj həni hiç əbını, çumçiko sıftənə çiyon dəvardin şin».

⁵ Taxtədə Nıştəkəsi votışe: «Imeha, Az har çiy tojədən soxtəydəm». İjən votışe: «Bınıvışt, çumçiko in sıxanon etiboynin iyən həğigin!» ⁶ Əy votışe bəmi: «Təmom be! Azim Alfa iyən Omeqa, Sıftə iyən Oxoy. Az jimoni ovi səvono bə təşiqətəkəsi həvov ov bədom. ⁷ Ğalib oməkəs imoni irs bəste: “Az boəy Xıdo bəbem, əv isə Bomı zoə bəbe”. ⁸ Tarsəkəson, beimonon, ləinon, ğəttolon, beəxloğon, sehrbozon, bıtperəston iyən duyəvojon həmməy aqıbat isə de otəşi iyən qoqurdi sutə qolədə bəbe. Im dıminə mardeye».

Tojə Yerusəlim

⁹ Çəyo de haft bəlo pur haft qılə tos qətə haft qılə mələki qıləyni oməy, demı qəp jəşe, votışe: «Boy, az bəti çe Pəsəvə jen bəninə vəyu nişo bıkəm». ¹⁰ Əy de Rufi vositə mını bardışe bə qıləy barzə bandi sə. Çəyo nişo kardışe bəmi osmono, Xıdo tonon evardə biə mığəddəsə şəhr Yerusəlim. ¹¹ Əv Xıdo ehtışomiku şəvəğ jəydəbe. Çəvrəy ruşnə ən ğıymətinə sığ biə bənə billurə yaşəmə sıği viriskə jəydəbe. ¹² Çəvrəy dijdə iyən bılındə divon iyən donzə dərvozə hestışbe. Dərvozonədə donzə qılə mələk mandəbe. Dərvozon səpe İsraili donzə ğəbilə nomon nıvıştə biəbe. ¹³ Şərg tərəfədə seqlə dərvozə, şimal tərəfədə seqlə dərvozə, cənub tərəfədə seqlə dərvozə iyən ğərb tərəfədə seqlə dərvozə hestbe. ¹⁴ Şəhri divo donzə bınəçə səpebe, iyən çe Pəsəvə Donzə həvari nomon çı bınəçon səpe nıvıştə biəbin.

¹⁵ Demı qəp jə mələki dastədə şəhri, çəy dərvozon iyən divon pamyeyro qıləy ğızılə ləvo hestbe. ¹⁶ Şəhr çoquli formədəbe iyən çəvrəy dırozi bəçəvrəy nıvəy bərobərbe. Mələki pamuşe de ləvo şəhr: çəvrəy dırozi, nıvəy iyən bılındi 12 000 stadi be. ¹⁷ Əy pamuşe şəhri divo: çəy ğalini de insoni pamyə sadı çılı ço qulac be, kom ki mələki oko doəşbe. ¹⁸ Divo de yaşəmə sıği, şəhr isə bənə şişə viriskə jə de xalisə ğızılı peqətə biəbe. ¹⁹ Şəhri divo bınəçə de har curə ğıymətinə sığon dərostə biə – iminə bınəçə de yaşəmə sıği, dıminəni de kavuyə yaquti, seminəni de sardoniksi, çominəni de zumrudi, ²⁰ pencminəni de dəmarinə sardoniksi, şəşminəni de sıə sardoniksi, haftminəni de zardə yaquti, həştminəni de berili, nəvminəni de topazi, daminəni de zəbərəcədi, yonzəminəni de firuzə, donzəminəni de ametisti. ²¹ Donzə dərvozə donzə qılə mırvaribe, har qıləyni qıləy mırvariyo soxtə biəbe. Şəhri əsosə kuçə xalisə ğızıləbe, bənə şişə viriskə jəydəbe.

²² Az şəhrədə məbəd nıvındıme, oxo çəvrəy məbəd Kulli-İxtiyor Rəbbə Xıdo iyən Pəsəvə İştəne. ²³ Şəhri ruşnə kardeyro nə bə həşi, nə bə ovşumi ehtiyoci nişə, çumçiko Xıdo ehtışom əyo ruşnə kardeydə, Pəsəvə çəvrəy çoy. ²⁴ Milləton çəy ruşnədə bənəven, dınyo podşoon ıstə cəh-cəloli əyo bəvarden. ²⁵ Çəvrəy dərvozon ruji dırozi hiç bastə nıbəben, oxo əyo şəv əbını.

²⁶ Milləton cəh-cələl iyən izzət əyo vardə bəbe. ²⁷ Hiç qıləy mırdolə çiy, ləinəti kardəkəs iyən duyəvojəti kardəkəs əslo dənibəşe əyo. Əncəx çe Pəsəvə Jimoni Kitobədə nom bəkəson əyo dəbəşen.

Jimoni ovi ru

22 Mələki nişo doşe bəmi bənə billuri viriski jə jimoni ovi ru. In ru Xıdo iyən Pəsəvə taxto beşeydəbe ² iyən şəhri əsosə kuçə miyono ru beydəbe. Çe ruy har dı tərəfədə donzə curə mivə vardə jimoni do hestbe. Ə do sor donzə manq mivə vardeydə. Çəy livon bə milləton bo şifo doye. ³ Həni lənətmandə hiçiy əbini. Çe Xıdo iyən Pəsəvə taxt əyo bəbe iyən Çəy xıdmətəvonon Bəy ibodət bəkarden. ⁴ Əvon Çəy dimi bəvinden, çəvon təvilonədə Çəy nom bəbe. ⁵ Həni şəv nıbəbe, hiç kəsi ehtiyoci əbini nə bə çoy, nəən bə həşi ruşnə, çumçiko Rəbbə Xıdo boəvon ruşnə bəbe. Əvon zol podşoəti bəkarden.

İsa omeydə

⁶ Mələki votışe bəmi: «In sıxanon etiboynin iyən həğiğın. Peyğəmbəron rufon idorə kardə Rəbbə Xıdo İştə mələki vığandışe ki, bı nezoni bəninə hodison Bəştə xıdmətəvonon nişo bıkə». ⁷ İsa voteydə: «İmeha, Az rəyrə omeydəm! Çı baxtəvərə bı kitobi peyğəmbərəti sıxanon rioyət kardəkəs!»

⁸ Az Yəhya imoni məsəme iyən vindime. İmoni məsəədə iyən vindeədə eqnim bə imoni bəmi nişo kardə mələki pobon ki, səcdə bıkəm bəy. ⁹ Əmma əy votışe bəmi: «Ne, ımı məkə! Azən bənə tı iyən bənə ıştı peyğəmbərə boon iyən bı kitobi sıxanon rioyət kardəkəson bə ico çe Xıdo xıdmətəvonim. Bə Xıdo səcdə bıkə!». ¹⁰ İjən votışe bəmi: «Bı tumari peyğəmbərəti sıxanon mihi məjən, niyo məkə! Oxo vaxt həni neze. ¹¹ Nohəxəti kardəkəs bıdə həniyən nohəxəti bıkə. Mırdoləti kardəkəs həniyən mırdoləti bıkə. Saleh bıkəs isə bıdə həniyən salehə koon bıkə. Mığəddəs bıkəs həniyən mığəddəs bıbu».

¹² İsa voteydə: «İmeha, rəyrə omeydəm. Çımı doəninə mikofot Bəmikuy iyən bə har kəsi çəy əməli əvəzi bədom. ¹³ Azim Alfa iyən Omega, İminəni iyən Oxonəni, Sıftə iyən Oxoy!»

¹⁴ Çı baxtəvərin ıştə liboson şıştə pok kardəkəson! Çəvon jimoni doy mivə hardeyro icozə bəbe, əvon şəhri dərvozonku bə dilə dəbəşen. ¹⁵ Bənə sıpə mırdol bıkəson, sehrbozon, beaxloğon, gəttolon, bıtpərəston iyən duyəvojəti piyəkəson iyən duyəvojəti kardəkəson əyo dəşe əzınin.

¹⁶ İjən voteydə: «Az İsa İştə mələki vığandıme ki, bə imoniyə icmon aid bıə in şəhodəti bəşmə bırosnı. Az Davudi Rəğ-rişə yən Nəsıl, ruşinə Rujobə Astovəm».

¹⁷ Ruf iyən vəyu voteydə: «Boy!» Bıdə məsəkəsən bıvotı: «Boy!» Bıdə təşiqətəkəs bo, piyəkəs həvoy peqəti jimoni ovi.

¹⁸ Az in kitobi peyğəmbərəti sıxanon məsə har kəsi xəbədo kardeydəm: harki bımon jıçiy əlovə bıko, Xıdoən bəy bı kitobədə nıvıştə bıə bəlon bədo. ¹⁹ Harki çı kitobi peyğəmbərəti sıxanonədə jıçiy peqəto, Xıdoən bı kitobədə nıvıştə bıə jimoni doyo iyən mığəddəsə şəhro bəy rəsə baxşə pebəqəte.

²⁰ Bımon şəhodət kardəkəs voteydə: «Bəle, rəyrə omeydəm!» Amin. Boy, ya Rəbb İsa!

²¹ Rəbb İsa lutf de har kəsi bıbu! Amin.

